

LAGYO

Laiká

(Acts)

Yesuq, Mauhkûng Má Shuí Yù Huí É Hkyô

¹ Htohpilug ê, Yesuq yhang hkyin yu tô é lagyô pé lé, Chyoiyúng Woi-nyí wum-o èq dang ban pying tô é htâng má, Garai Gasang yhang lé mauhkûng shut shuí yu é buinyi jé shoq, ² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngò kê kat bê nghut lhê. ³ Yesuq gi, shí hkâm é htâng má, Yhang dui toq bê hkyô lé, lungíng é saksé myo myô èq yhangmoq lé tân shit mù, buinyi myí xê nyí gyoro má yhangmoq chyáng lé htoq shit shit kut luí, Garai Gasâng é mingdán hkyô lé hko kyô ri. ⁴ Yhang, yhangmoq eq rahá zup tô é hkûn, hkunmó hkyô é gi, "Nungmoq gi, Yerusalem wà mó mai a htoq é za, ngá chyáng mai wó gyô yu é, ngá wâ ê danggidiq byí tô é chyunghuq lé láng nyí keq. ⁵ Hkâsu mù gâ le, Yohan gi, wui èq wui-myhup hkám byí é nghut lhê; nghut kôlhang, nungmoq kúm gi, buinyi hkâ-myháng a myáng má, Chyoiyúng Woi-nyí mai baptisma wó hkam yù kó râ nghut lhê." gâ ri.

⁶ Lagyô pé gi, Yhang eq rahá chôm zup míng tô é hkûn, Yhang lé, "Yhumsîng ê, nàng, haû Israelaq byu pé lé mingdán dum xuq byi râ gi, ahkuí yhang nghut bê lhú?" ga myí akô.

⁷ Yesuq gi, "Áwa gi, Yhâng é ahkáng ayá èq kut to bê é ahkýíng yam-yoq pé lé, nungmoq sé nó a

ra. ⁸ Nghut kôlhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú mù luí, Yerusalem wà mó eq Yuda mau banshoq, Samariq mau eq maumyî htáng shoq, ngá é saksê pé dut kó râ nghut lhê." ga luí, yhangmoq lé taí ri.

⁹ Dang haû ban taí é htâng má, yhangmoq wú nyi le, Yhang gi, mauhkûng shut shuí yu é huí mù, yhangmoq hí mai Yhang lé a myàng loshoq, mhut eq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkûng shut ru wú tsuq nyi bum ashî le, hpyu é mebu wut é byù í yuq gi, radá dâm yhangmoq nàm má htoq yap lò mù, ¹¹ "Galile byu pé ê, haí mù luí mauhkûng shut wú tsuq nyi akô lhú? Nungmoq é hí mai mauhkûng shut shuí yù huí é, haû Yesuq mauhkûng shut doq ló é u lé, nungmoq myang kat é su, Yhang dum jé lé râ nghut lhê." ga taí akô.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wà mó shut taû ló bekô.* Haú gyoro gi, Bánno buinyi má ge sô é í za wê ri.

¹³ Yhangmoq jé ló kôjáng, yhangmoq nyi nyi kô é yhûm ahtoq pyâm mâ é wap shut doq ló akô; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Alhpe é yhangzo Yakuq, Zelutuq dut é Simun, góyuq Yakuq é yhangzo Yudaq pé nghut akô.

¹⁴ Yhangmoq lhunglhâng bang gi, myiwe wui le, Yesuq é yhângnu Mariq le, yhanggu pé le kut mù, i-myit rahkat za kyû chôm dung dung kut nyi akô.

* **1:12** Tsanlun bùm eq Yerusalem gyoro gi, déng rawuí hkup kó we ri.

15 Buinyì haú yoq má, Petruq gi, lumjínq é gumang gu-nhá† wuì rasho í xê yuq kô zup zínq tô é gung gûng má, toq yap mù, 16 "Gumang gu-nhá wuì ê, Yesuq lé chyup é bang lé hkyô shuí hî é sù Yudaq eq séng luî, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri. 17 Yhang gi, nga-nhúng má nghap lhôm é hui mù, hpúng sará ayá wó bê sù nghut kôlhang shí hkyô dut bê nghut ri." ga taí ri.

18 (Yudaq gi, yhang kut é agè ashop é muzó mai wó é ahpau éq myigùng ratóng wui yu é htâng, haú má yhang, a-nghop dông byit gyó mù wam buq goq luî, û banshoq buq myín byuq bê nghut ri. 19 Haú hkyô lé Yerusalem wà mó má nyi é lhunglhang bang wó gyo kôjáng, myigùng haú lé yhangmoq é myíng dông, 'Akeladama' ga myhíng akô; haú gi, 'Sui myigùng', gâ é nghut ri.)

20 Petruq xoq taí é gi, "Hkâsu mù gâ le, Hkya-on Kungtôn Laiká má, 'Yhâng é jowò chamchyuiyuì dut byuq sháng gaq; haú má ó le a nyi kô sháng gaq.'✠ ga luî le, dum 'Yhang wó é ayá lé byù góyuq wó yu pyám byi sháng gaq.'✠

ga luî le, bo tô ri. 21-22 Haú mù luî, Yohan baptisma byí hi é hkûn mai, Yesuq lé nga-nhúng chyáng mai shuí yu é buinyì jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyì banshoq pé má, nga-nhúng eq yhang zum nyi sù rayuq lé, hkyin kat râ dut ri. Haú yuq gi,

† 1:15 Gumang gu-nhá gâ é lé, Grik má gi, gumang za gâ to lhê.

✠ 1:20 Hkya-on 69:25 ✠ 1:20 Hkya-on 109:8

Yesuq dum dui toq é hkyô lé nga-nhúng eq rahá saksé dut râ sù nghut lhê." gâ ri.

²³ Haú hkûn, yhangmoq gi, Yustu ga le myhîng é, Barsabaq gâ é Yosep eq Mahtiaq nhik lé hkyin tô akô. ²⁴⁻²⁵ Haú mù, yhangmoq kyûdung kô é gi, "Byù banshoq é i-myt lé sê é Yhumsîng ê, Yudaq Iskarut gi, yhang ló gíng é jowò shut ló râ ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tûn shit laq ò." ga akô. ²⁶ Hau htâng, yhangmoq, byù hkyîn shosé she le, Mahtiaq chyáng ang bê. Haú mai, Mahtiaq lé gi, haú lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjîng bang banshoq gi, jowò rallhum má za, chôm zup míng nyi tô akô. ² Haú hkûn, laidun mó lo é su gâ é htê gi, byodàn ratung, mauhkûng mai mying htoq lô mù luí, yhangmoq zing tô é yhûm byíng shoq dut to bê nghut ri. ³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq taí nhang é eq rajung za, laklaí dang dông nyo lo bum akô.

⁵ Haú u lé, mauhkûng ô má joq é mingdán hkanmó mâ é, tarâ hkunggâ é Yudaq byu pé gi, Yerusalem wà mó má bíng nyi bum akô. ⁶ Haú mying é htê lé wó gyo kôjáng, byù rajùm rayò zíng lé

* **2:1** Penteko-ti gâ é gi, Lhoqlhai Poí lai é htâng ngo xê nyi jé é buinyi má, kut é poí lé gâ lhê.

lô kômù, ó le ô é myíng dông sê gyô yù kô é yanmai, maú úng-âng byuq bùm kôluí, ⁷ maú bùm uchyang taí kô é gi, "Wú keq, ahkuí dang taí nyi é byù shí bang lhungháng gi, Galile byu pé chyat a nghut kó lú? ⁸ Haú nghut é wa, hkâsu mù nga-nhúng ó le ô é yhumsing mau mâ é myíng dông sê gyô yu lhê lú? ⁹ Parhti, Medi, Elam mau mâ é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming mâ é bang, Romaq myuq mai lé bíng nyi é Yudaq byu pé eq Yudaq noqkuq htûng má lhing wang lò bang, ¹¹ Kreti zinlóng eq Arabiq mau mâ é bang, nga-nhúng gi, yhangmoq hko kyô é Garai Gasâng é mauhpo muzó hkyô lé, yhumsing mau mâ é myíng dông yhang wó sê gyô yu ri-nhung." gâ ri. ¹² Yhangmoq banshoq bang gi, maú úng-âng byuq kômù, "Shí gi, haí wá nghut lhê lú?" ga le, rayuq eq rayuq myí lhùm bum akô.

¹³ Nghut kôlhang, byù ra-am gi, "Shí bang gi, î shuq wut é bang nghut akô." ga luí, taí jihpoi bum akô nghut ri.

Petruq Hko Kyô É Mungdang

¹⁴ Haú hkûn, Petruq gi, lagyo góbang raxe rayuq eq toq yap mù, htê mó eq byù haú bang lé taí é gi, "Yudaq byu pé eq Yerusalem wà mó má nyi nyi é lhunghâng bang ê, rago gyô wú keq! Ngò, nungmoq lé, shí hkyô taí kyo kôlé. ¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí. ¹⁶ Shí hkyô kúm gi, myiqhtoi

Yoelaq taî tô é eq rajung za dut é nghut ri. ¹⁷ Yhang taî tô é gi,

'Garai Gasang îsu gâ ri: Ló htâng é buinyî pé má,
Ngò Ngá é Woi-nyí lé byù lhunghâng bâng é
ahtoq má hut gyun râ nghut lê.

Haû mù, nungmoq é yuqzo byizô pé gi, myiqhtoi
htoi kó râ; nungmoq é zorâm wuî gi, my-
oqwup shing-rân myàng kó râ; nungmoq é
hpaû mâng pé gi, yhupmoq myàng kó râ
nghut lê.

¹⁸ Buinyî haú pé má, Ngá é dui-nhâng zoshâng hpô
pé eq dui-nhâng zoshâng myhî pé é ahtoq
má lhâng, Ngò Ngá é Woi-nyí lé hut gyun mù
luî, yhangmoq gi, myiqhtoi htoi kó râ nghut
lê.

¹⁹ Ngò gi, ahtoq mauhkûng htoq má mauhpo muzó
pé lé, a-ô myigùng htoq má, kumlhá pé lé,
sui eq, myi eq, myihkau dùm pê èq kut mù
tûn shit râ.

²⁰ Haû Yhumsing é kô hkikhkam é buinyî a jé
shimá, buî gi, mauchut byuq, lhamó gi, sui
dut byuq é hí dut râ nghut lê.

²¹ Haú hkûn, Yhumsing é myìng lé lâng é bang yuq
hkanmó gi, hkyi yu é hui kó râ nghut lê. [✧]

gâ ri.

²² Israelaq byu pé ê, dang shî lé gyô yù keq,
nungmoq sê é eq rajung za, Nazaret wà byù
Yesuq nungmoq é hí má tûn shit é, laklaí kumlhá,
mauhpo muzó eq kumlhá pé gi, Yhang lé Garai
Gasang nhang kat é saksé dut bê nghut ri. ²³ Shí
yuq gi, Garai Gasang myit hpyit tô é hkyô eq, hí
te sê é hpaqchyî dông, nungmoq chyáng ap pyâm

✧ 2:21 Yol 2:28-32

é hui mù, nungmoq gi, agè ashop byu pê é loq èq, Yhang lé tapzîng htoq má jén sat pyám nhâng bekô nghut ri. ²⁴ Nghut kôlhang, haû shî-nò hkyô gi, Yhang lé wó hkûm zing jung a nghut é yanmai, Garai Gasang gi, Yhang lé shî-nò jamjau mó mai, lhut pyám byi luî lhoq dui toq yû bê nghut ri.

²⁵ Dawiq gi, shî yuq eq séng luî taî é má,

'Haû Yhumsîng gi, ngá é myoq hí má hkâ-nhám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún râ a nghut lo.

²⁶ Haû mù, ngá i-myt gi, nguínón nyî luî, ngá nhut shô gabú hkya-ôn nyi ri;

ngá é gungdu le myit myoqbyù jowò má nyi nyi râ nghut lhê.

²⁷ Hkâsu mù gâ le, nàng, ngá é woi-nyí lé mo-sumhkung má tô pyám to râ a nghut.

Nàng, náng é Chyoiyúng Sû lé bup byuq é hui nhâng râ a nghut.

²⁸ Nàng, ngo lé asak dui é hkyô sé nhâng bê.

Náng é myoq hí má, nàng, ngo lé gabú hkyô lhoq pyíng byi râ nghut lhê. [✧]

gâ ri.

²⁹ Gumang wuî ê, nga-nhûng é îchýí îké Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhûng chyáng joq tô é lé le, ngò, nungmoq lé a gyuq a kyum wám taî lhê. ³⁰ Dawiq gi, myiqhtoi rayuq nghut é yanmai, yhâng é awut ashín mâ é rayuq lé, yhâng é hkohkâm tanghkuq má zùng nhâng râ ga Garai

✧ 2:28 Hkya-on 16:8-11

Gasang byi tô é danggidiq lé sê to mù, ³¹ 'Hkrisduq† gi, mosumhkung má pyâm to a hui râ eq, Yhâng é gungsho a bup byuq é za, dum dui toq lô râ nghut lhê.', gâ é hkyô lé te sê to luî taí tô ri. ³² Garai Gasang gi, haû Yesuq lé lhoq dui toq yù bê. Ng-amoq banshoq bang gi, haú hkyo é saksê pé nghut nyi ri. ³³ Haû mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shî su wó myâng, wó gyo bekô nghut ri. ³⁴⁻³⁵ Hkâsu mù gâ le, Dawiq gi, mauhkûng htoq tsáng myhâng má a doq lô wú kôlhang, yhang gi,
 'Haû Yhumsîng Garai gi, ngá é Yhumsîng lé,
 "Ngò, náng é gye pé lé, náng é hkyî nang tanghkuq
 kut pyâm byî é hkyíng jé shoq,
 Ngá é loqyo hkyam shut zung nyi shi aq." gâ ri.'✧
 ga luî, taí ri.

³⁶ Hau é yanmai, Garai Gasang gi, nungmoq èq tapzîng má jén sat pyâm é haû Yesuq lé, Yhumsîng eq Hkrisduq dut nhang é hkyô, Israelaq byu pé lhunglhâng bang hkyak sê nyi kó sháng gaq ô." gâ ri.

Sâng-hi Lumjîng É Bang

³⁷ Yhangmoq gi, haû lé wó gyô bùm kôjáng, yhangmoq é i-myt má záng kô é nghut mù luî, "Gumang wuê ê, ngamoq hkâsu kut lo râ lhú?" ga luî, Petruq eq lagyo góbang lé myî akô.

† **2:31** Grik dong Hkrisduq gâ é gi, xû but hui Sû gâ é lichyúm nghut mù, Hebre dong Mesaia gâ é eq rajung za nghut lhê. ✧ **2:34-35** Hkya-on 110:1

³⁸ Petruq gi, "Nungmoq yuq hkanqmó myit lhing mù, Yesuq Hkrisduq é mying mai wui-myhup hkâm yù keq; Haú jáng, nungmoq é yubak hkyut pyám byî é hui kó râ nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yû kó râ nghut lhê. ³⁹ Hkâsu mù gâ le, danggidiq haú gi, nga-nhûng é Yhumsing Garai Gasang ji yù râ bang banshoq nghut é, nungmoq eq nungmoq é yhangzo yhangshû pé eq le, mau we má nyi é lhunglhâng bang eq le, sêng lhê." ga luí, yhangmoq lé tai kyô ri.

⁴⁰ Yhang gi, dang gotû myo myô èq le saksé hkâm mù, "Shí agé ashop é amyû mai wó lut htoq lo keq ô!" ga luí, yhangmoq lé lhoq pun lhoq kyíng ri.

⁴¹ Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyíng kô jat wàng lo bum bekô nghut ri.

Lumjínq Bang Zùm Yap É Hkyô

⁴² Haú bang gi, lagyô pé mhoqshit é hkyô, zùm yap é hkyô, muk hpê gam é hkyô† eq akyû dúng é hkyô má, i-myt rahkat za chôm châng nyi akô.

⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjínq é lhunglhâng bang gi, rawò má za zup zíng to mù, azíng zè banshoq lé chôm chung nyi akô.

⁴⁵ Yhangmoq gi, yhumsing é sutzè pé lé, úng pyám mù, yuq hkanqmó lé, yhang râ tô é eq rajung za gàm byî akô. ⁴⁶ Yhangmoq gi, nyí wuí myit

† **2:42** Muk hpê gam hkyô gâ é lé lichyúm í dông wó yu lhê - radông gi, rahá chôm zo chôm shuq é lé gâ lhê; radông gi, Poído chôm zô é lé gâ lhê.

rahkat zâ éq noqkuq yhûm wàng má nyi nyi akô. Yhumsing é yhûm pé má le muk hpê gam é hkûn, ⁴⁷ Garai Gasang lé hkya-on kungtôn uchyang, gabú é eq myit huí é eq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsîng gi, nyí wú yhangmoq chyáng hkyi yù hui bang jat lò nhang ri.

3

Hkyî Hten Sû Rayuq Lé, Petruq Lhoq Gê Byî É Hkyô

¹ Ahkuî, Petruq eq Yohan gi, myinhtâng zó sum hkyíng lhé é kyûdung nám má, noqkuq yhûm shut doq e ló akô. ² Haú hkûn, înú unghkaú mai hkyî hten lugù dut é byù rayuq lé, noqkuq yhûm má wang lé lô bâng chyáng mai dung zo sháng gaq ga, Yúngl hó hkum ga myhîng é hkúmdong má nyí hksång nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhûm haú má wang e ló é lé, myàng luî, lhom dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haú mù, yhang, yhangnhik chyáng mai rajung jung wó yú râ lé myit myoqbyù luî, yhangnhik lé rago za saí wú tô ri.

⁶ Petruq kúm gi, "Ngùn, hîng gi, ngò a wó; nghut kôlhang, ngò wó é nang lé byi lé: Nazaret wà byù Yesuq Hkrisduq é myîng mai toq sô ló aq." ga táí uchyang, ⁷ yhâng é loqyo loq má zui mù láng toq kat ri; haú hkûn jáng, yhâng é hkyî kochang-chap pé wúm bo lò bê nghut ri. ⁸ Haú mù, yhang gi, radá dâm toq yap mù sô kat luî, so uchyang, byàm

uchyang Garai Gasang lé hkya-on mù, yhangnhik eq rahá noqkuq yhùm má wang ló ri. ⁹ Yhang sô e ló nyi é eq Garai Gasang lé hkya-on kungton nyi é lé, lhunglhâng bang chôm myang akô. ¹⁰ Haú yuq gi, noqkuq yhum é Yúngl hó hkum gâ é hkúmdong má zung to mù, dung zo sù nghut é lé yhangmoq matsîng kô é nghut mù luî, yhâng chyáng dut lò bê hkýo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byìn châng tô é hkûn, shiwa byu pé gi, wú maú uchyang, Sholumon jiro p shut, yhangmoq chyáng din yán wang lé lo bum akô. ¹² Petruq haú lé myàng jáng, shiwa byu pé lé taî é gi, "Israelaq byu pé ê, shí yuq é hkyô lé haî mù luî maú nyi akô lhú? Nga-nhik é dingmán hkyô eq wum-o a-tsâm eq, shí yuq lé wó so nhang é su ngâm luî, ngá-nhik lé wú tsuq bum akô lhú? Haú dong a nghut. ¹³ Abraham, Isak eq Yakup pê é Garai Gasang, nga-nhông é îchyí îwa pê é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byí é nghut ri; nungmoq kúm gi, Yhang lé sat hui shoq ga ap pyám kômù luî, Pilat zau hpó mai Yhang lé nhang pyám râ ga myit to bê lé, nungmoq gi, Yhâng é hí má yhang, Yhang lé he-ngik pyám akô nghut ri. ¹⁴ Haú chyoiyúng dingmán é Sù lé nungmoq he-ngik pyám kômù, byù sat sù lé sheq dúng htoq yû kôluî, ¹⁵ Asak Yhumsîng lé gi, sat pyám bekô. Garai Gasang kúm gi, haú yuq lé shi é mai lhoq dui toq yû bê nghut ri; ngá-nhik gi, haú hkýo é saksé nghut nyi lhê. ¹⁶ Yesuq é myìng lé lumjîng é yanmai, haú lumjîng myit mai za, shí nungmoq myang é sê é

sû lé wum-o lhoq pyíng byi bê nghut ri; nghut bê, Yesuq lé lumjíng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuî, gumang wuì ê, nungmoq é uphkâng bang kut é su, nungmoq le haú hkyô lé a sé mù kut pyâm é hkyô lé ngò sê nyi lhê. ¹⁸ Nghut kôlhang, haú hkyô gi, Garaî é Hkrisduq shî-nò jamjau hui râ nghut lhê ga luî, myiqhtoi banshoq bang lé hí hí mai taí nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng mâ é nguínón é ahkyíng yàm yoq jé lô râ matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi râ matú le, nungmoq é yubak mara hkyut pyám byî é hui râ matú le, nungmoq gi, myit lhíng mù Garai Gasâng chyáng lhing lò keq. ²¹ Garaî Gasang gi, a-nham pyat mai, Yhâng é chyoiyúng myiqhtoî pé é nhut mai, taí nhang to bê eq rajung za, nyi mi-nyì, joq mijoq lé asik dum saî é pyat jé shoq, Yesuq lé mauhkûng htoq má nyi nhang to râ nghut lhê. ²² Hkâsu mù gâ le, Mosheq taí tô é le, 'Haú Yhumsíng Garaî Gasang gi, nungmoq é yhanggu yhangmâng pé chyáng mai, nungmoq é matú ngò sù é myiqhtoi rayuq pô htoq lô nhâng râ nghut lhê; haú yuq taí mitaí nungmoq gyo ra râ nghut lhê. ²³ Myiqhtoi hau é dang lé a gyo sù ó yuq nghut kôlhang, yhumsing é byù myû mai chyung hpyit pyâm é hui râ nghut lhê. ✧ gâ ri.

²⁴ Gè gè yhang, Samuelaq mai, yhâng é htâng má châng pô htoq lo é myiqhtoî pé banshoq bang

hko kyô lo é má le, buinyì shí pé eq séng mù taì to bekô nghut ri. ²⁵ Nungmoq gi, haù myiqhtoì pé é dang silí wunlí eq, Garai Gasang mai, Abraham lé, 'Náng é awut ashín é yanmai, mingkan htoq mâ é byù myû chângiup hkungsô wó kó râ nghut lhê!'[☆] gâ é eq rajung za, nungmoq é îchyí îwâ pé eq tô tô é danggidiq lé wó hkam yù râ bang nghut akô. ²⁶ Garai Gasang gi, nungmoq yuq hkangmó lé yhumsing agè ashop é hkyô mai wó lhing taù lò nhang é dông, shimân byi râ matú, Yhâng é dui-nhâng zoshâng lé pô htoq lô nhâng luì, nungmoq chyáng hí nhang kat byi bê nghut ri." gâ ri.

4

Petruq Eq Yohan Nhik Chyup Huì É Hkyô

¹ Hkyangjông pé, noqkuq yhûm zúng é suwún hpó eq Saduke pé gi, Petruq eq Yohan shiwa byu pé lé dâng nyo nyi é hkûn, htoq lé lô kômù, ²yhangnhik, shiwa byu pé lé mhogshit é eq, Yesuq é yanmai shi byuq bê bang Yesuq má dum dui toq lô râ gâ é hkyô lé taì nyi kô é yanmai, yhangmoq gyai yhang myit myô nyi bum akô. ³ Haù mù, yhangmoq gi, yhangnhik lé chyup yû luì, myinhtâng mauchut lô bê nghut é yanmai, htang napkyó jé shoq htóng má lhûng tô akô. ⁴ Nghut kôlhang, mungdang lé wó gyô yu é bang myo myo gi, lumjîng kômù luì, yuqgè ngo hkyîng kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myî Jep Wú É Hkyô

[☆] **3:25** Apûn 22:18; 26:4

⁵ Htang nyí, yhangmoq é zau wuî, suwún wuî eq tarâ sará pé gi, Yerusalem wà mó má chôm huî zup akô. ⁶ Hkyangjong mó Anna, Kayahpaq, Yohan, Alesander pé eq hkyangjong mó é amyû pé banshoq le, haú má bo tô akô. ⁷ Haú mù, yhangmoq gi, Petruq eq Yohan lé gung gûng má nyhi to luî, "Nungnhik gi, haî a-tsam, ó yuq é myìng mai mù shí lé kut akô lú?" ga myî akô.

⁸ Haú hkûn, Petruq gi, Chyoiyúng Woi-nyí byíng tô é nghut mù luî, yhangmoq lé taî é gi, "Mingbyû wuî é zaugun suwún wuî ê, ⁹ hkyî hten sù shí yuq lé lhoq gê byí é jeju yanmai, yhang hkâsu kut lhoq ge yù huî é hkyô lé, hkû-nyí nungmoq ngá-nhik lé myî gôn wú naú kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq èq tapzîng má jén sat pyâm mù, Garai Gasâng èq shí é mai lhoq dui toq yu é, Nazaret wà byù Yesuq Hkrisduq é myìng mai, shí yuq gi, nungmoq é hí má îsu wáng wáng zán zán yap tô é nghut ri.

¹¹ 'Yhûm saí bang nungmoq hkyin htoq pyâm é luqgok gi, htungchyûn mâ é ahkyak dik é luqgok dut bê.'[☆]

gâ é gi, Yesuq lé taî é dông nghut ri. ¹² Hkyi yù hkyô gi, Yhang mai lai luî gotû a nyì lo, hkâsu mù gâ le, nga-nhung hkyi yu é hui râ matú, mauhkûng a-ô má, Yhâng é myìng mai lai luî, xângzo byu pé lé byí tô é myìng gotû a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum taî é lé myàng kôjáng, yhangnhik, jong a doq wú é, mayû byù za nghut é hkyô lé sé

☆ 4:11 Hkya-on 118:22

to kô é yanmai, maú nyi bum akô; nghut kôlhang, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agó, lhoq gê byi é hui sù le, yhangnhik eq rahá yap tô é lé, yhangmoq myàng kô é nghut mù luí, taí râ hkyô haí le a joq lo kó nghut ri. ¹⁵ Haú mù, yhangnhik lé, haú Yudaq byin tú wapdoq* mai lhoq htoq to mù, yhangmoq rayuq eq rayuq hpyé lhum kô é gi, ¹⁶ "Shí nhik lé hkâsu kut lé gè râ lú? Yhangnhik kut shit e laklaí kumlhá gi, Yerusalem wà mó má nyi é lhunglhang bâng é hí má de za dut bê nghut é yanmai, nga-nhúng haú lé a wó hê lo nghut ri. ¹⁷ Nghut kôlhang, mingbyú wuì má shí hkyô je riyhang a byo myín ló sháng gaq, ahkuí mai myìng haú lé lang mù ó lé le a taí kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yù luí, Yesuq é myìng lé lang mù, haí le hkâtaí, hkâmhoqshit kó ga chôm hkúm akô. ¹⁹ Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gè râ, a gè râ lé, nungmoq yhang doqđân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a taí é, a wó nyi nghut lhê." ga luí, yhangmoq lé dum tú taí akô.

²¹ Haú hkún, yhangmoq gi, dut laí lò bê hkýo é yanmai, shiwa byu pé Garai Gasang lé hkya-on kungton nyi bùm kôluí, yhangnhik lé dâm byi râ hkyô a myàng kó é nghut mù luí, yhangnhik lé dum tân kyuq luí nhang pyám bekô nghut ri. ²² Hkâsu

* **4:15** Yudaq byin tú wapdoq lé Grik đông gi, San-hedrin gâ lhê.

mù gâ le, haû laklaí kumlhá dông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjıng Bıng É Kyúdung Dang

²³ Yhangnhik gi, nhang kat pyâm é hui kôjáng, yhangnhik é luzúm wui chyáng taû ló kômù, hkyangjong agyi pé eq suwún wui eq yhangnhik lé hkyım é dang banshoq lé, ló taı kyo akô nghut ri.

²⁴ Haû hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyúdung kô é gi, "Mauhkıng eq myigıng, wuıshuq lung-aû eq, haú pé má, nyı mi-nyı lé hpan tô é, ahko ahkáng lhunglháng wó é Yhumsıng ê,

²⁵ Náng, náng é dui-nhâng zoshâng, ngamoq é ıchyı íkê Dawıq é nhut mai, Chyoıyúng Woi-nyı eq taı tô é gi,

'Haı mù luı, tıngbaù amyú pé gi, nhikjum yô akô? haı mù luı, byu pé gi, akôm dâ pyâm akô lhú?

²⁶ Haû Yhumsıng eq Yhâng é Hkrisduq lé gumlau toq râ matú, mingkan hkohkâm pé gi, toq mù, zau suwún wuı eq rahá zup zıng bum akô.[✧]

²⁷ Gè gè yhang, Herut eq Pontu Pilat nhik gi, tıngbaù pé eq Israelaq byu pé le mù, wà mó shı má chôm zıng to kôluı, náng xú but byi é sù,[†] náng é Chyoıyúng dui-nhâng zoshâng Yesuq lé gumlau toq râ dâ nyı akô. ²⁸ Náng é wum-o a-tsam eq náng ô nau é dông dut râ matú, hí hkún mai náng myıt

✧ **4:26** Hkya-on 2:1-2 † **4:27** Xú but é hkyô gi, Yudaq byu pé htıng dông xú but byi jáng, rajung jung kut râ matú hkyin masat yu é hkyô nghut lhê. Xú but byi é sù gi, Grik dông Mesaia gâ é nghut lhê.

hpyit doqdân tô é hkyô lé, yhangmoq gi, kut pyám bekô nghut ri. ²⁹ Yhumsîng ê, ahkuî yhangmoq taî kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit eq náng é dang lé taî râ matú wum-o byi laq! ³⁰ Náng é wum-o bo é loq lhâm kat luî, noli nojàng lé lhoq gê byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gâ akô.

³¹ Haû su, kyû ban dung kôjáng, yhangmoq zîng tô é jowò gi, dui nún lô mù, yhangmoq lhunglhâng bang gi, Chyoiyúng Woi-nyí byíng lô luî, Garai Gasâng é mungdang lé a gyuq a kyum é za taî bùm bekô nghut ri.

Azîng Zê Lé Chôm Gam Chûng Kô É Hkyô

³² Haû lumjîng é lhunglhâng bang gi, i-myit rahkat za nghut nyi akô; ó yuq le, yhumsîng wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haû Yhumsîng Yesuq dum dui toq é hkyô lé a-tsam mó eq saksé hkâm nyi kô é nghut mù luî, yhangmoq banshoq bâng é ahtoq má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhûm wó é bang ó yuq nghut kôlhang, haú pé lé adàm dàm ûng pyám luî wó yu é ngùn le gi, ³⁵ lagyô pê é hkyî wang má lé to byî akô. Haû mù luî, a wó a lòm sù ó yuq lé le ra tô é eq rajung za gàm byî akô nghut ri.

³⁶ Haú hkûn, Barnaba ga luî lagyô pê eq myhíng byi é, Kupru ming mâ é Lewiq byù Yosep le, yhang wó é maumyî ratóng lé ung luî, wó yu é ngùn lé lagyô pê é hkyî wang má, lé to byî ri. ³⁷ Barnaba

gâ é dang lichyúm gi, myit wum byí su é yhangzo
gâ é lichyúm nghut lhê.

5

Anani Eq Sahpira Njik É Hkyô

¹ Nghut kôhang, Anani ga sũ gi, yhangmyi Sah-
pira eq rahá, yháng nhâm wó é maumyí ratóng lé
ûng pyám luí, ² yhangmyi le bo sê é dông, ngùn haũ
ra-am lé gi, haq myhit yu to mù, ra-am lé za lagyo
pê é hkyí wang má lé to byí akô.

³ Haũ mù luí, Petruq gi, "Anani ê, Chyoiyúng
Woi-nyí lé mhaũ pyám râ matú eq, maumyí hpau
mâ é ra-am lé haq yu to râ matú, haĩ mù luí,
náng é myit má Tsadán le byíng nhang tô lhê lú?
⁴ Maumyí haũ joq tô le, náng é zè nghut lhê a nghut
lú? Wó ung é ngùn le náng é zè nghut ashĩ, a
nghut lú? Haĩ mù luí, nàng haũ dông dâ lhê lú?
Byù lé mhaũ é a nghut, Garai Gasang lé mhaũ
pyám bê nghut ri." ga tâ ri.

⁵ Anani gi, dang haũ lé wó gyo jáng, lêng mù,
shi byuq bê nghut ri. Haũ hkyô lé wó gyô é bang
banshoq le, gyai yhang gyuq bùm bekô nghut ri.
⁶ Haũ hkũn, zorâm wuè gi, toq mù, yháng é mâng lé
htup luí, ê waq myhup pyâm akô. ⁷ Hau htâng, sum
hkyíng kô myáng jáng, yhangmyi le, wang lé lo ri.
Haũ su dut é hkyô lé gi, yhang a sé nghut ri.

⁸ Haũ hkũn, Petruq gi, "Ngo lé tâ kyô wú aq.
Nungnhik ûng é maumyí hpau gi, shí gũ za nghut
lhê lú?" ga myi jáng, yhang gi, "Nghut lhê, haũ gũ
za nghut bê." ga tũ tâ ri.

⁹ Petruq gi, "Nungnhik gi, haũ Yhumsing é Woi-
nyí lé îsu kut chyam wú râ matú, hkâsu mù chôm

myit huî akô lhú? Wú aq, náng é yhumsîng hpó lé ê myhup pyám bang gi, haû hkúmdong má jé bê; yhangmoq gi, nang lé le waq htoq pyám kó râ nghut lhê." ga taî ri.

¹⁰ Radá dâm, yhang le lagyo hpô é hkyî wang má lêng shi byuq bê. Zorâm wui le wang lo wú le, myiwe haû shi to lánng é lé myàng kôluî, waq ê mù, yhanglang é nàm má, ê myhup pyám bekô. ¹¹ Hau é yanmai, haû hkun lhê é hpúng byù banshoq bang eq, haû su dut ê hkyô lé wó gyo má wó gyô é bang gi, gyai yhang gyuq bùm bekô nghut ri.

Byù Myo Myo Lé, Lagyô Pé Lhoq Gê Byî É Hkyô

¹² Ahkuî, lagyô pé gi, mingbyù wui é hí má limik kumlhá eq mauhpo muzó myo myo lé, kut shit nyi akô. Haû lumjîng bang gi, i-myt rahkat zâ èq, Sholumon jiropp má chôm hui hui kut bum akô. ¹³ Shiwa byu pé gi, yhangmoq lé hkunggâ nyi bùm kôlhang, yhangmoq lé a wám ê zum bùm kó. ¹⁴ Nghut kôlhang, haû Yhumsîng lé lumjîng é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri. ¹⁵ Haû mù luî, byu pé gi, Petruq laî lo é hkún, yhâng é wupzo za lháng rayuq yuq é ahtoq má zang sháng gaq ga, nòhpyo huî é bang lé, wà mâ é hkyô yàm má waq htoq é mù, yhuphpú pé eq taphkang pé má lheq tô akô. ¹⁶ Hau htoq agó, Yerusalem awui ayàm mâ é wà pé mai le, byù ajùm ayò gi, no é bang eq agè ashop é nat wang zing-ri huî é bang lé shuî jé lé bum akô; haû bang lhunglhang gi, lhoq gê lhoq yô byî é huî bum akô nghut ri.

Lagyô Pé Zing-ri Huî É Hkyô

¹⁷ Hkyangjong mó eq yhâng é luzúm wuí, Saduke hpúng má é byu pé kúm gi, gyai yhang wú manon bùm kôluí, toq mù, ¹⁸ lagyô pé lé chyup yú luí, wà má é htóng má lhûng tô akô. ¹⁹ Nghut kôlhang, haû myín lé, Yhumsîng é maumang lagyo rayuq gi, htóng hkum pé lé hpông pyám mù, yhangmoq lé shuí htoq yú uchyang, ²⁰ "Nungmoq htoq lô mù, noqkuq yhûm má ê yap to luí, dui é asak hkyô sik eq sêng é danglù banshoq, shiwa byu pé lé taí kyo keq." ga taí ri.

²¹ Napsûn myoqmyàng zó lé, yhangmoq gi, noqkuq yhûm má wàng mù yhangmoq wó gyô yu é eq rajung za, shiwa byu pé lé, mhoqshit hí lô akô.

Haú u lé, hkyangjong mó eq yhâng é luzúm wuí gi, Israelaq byu pé é suwún wuí lhunglhâng bang lé ji yù mù, Yudaq byìn tú wapdoq chòm zung yú luí, lagyô pé lé ê shuí yù râ matú htóng shut byù nhang kat akô. ²² Haú bang kúm gi, htong má jé é hkûn, lagyô pé lé a myàng kôjáng, dum taû lò mù lo taí kyo kô é gi, ²³ "Htóng hkum le ging ging myhî to láng ri, htóng zúng bang le hkum yâm má yap tô akô. Nghut kôlhang, hpông wú le, ahkaû má ó le a nyi to lo nghut ri." gâ ri. ²⁴ Noqkuq yhûm zúng é zau hpó eq hkyangjong agyì wuí gi, dang haû lé wó gyo kôjáng, "Shí hkyô hai dut lô râ lú?" ga, gyai gyuq maú bum akô.

²⁵ Haú hkûn, byù rayuq wang lé lô mù, "Wú keq, nungmoq eq htóng má lhûng tô é bang gi, noqkuq yhûm má yap to mù byu pé lé mhoqshit nyi bum akô." ga luí, yhangmoq lé taí kyô ri. ²⁶ Haû mù luí, zau hpó haû gi, yhâng é a-ô má é bang eq ê mù, lagyô pé lé ê shuí yu akô. Nghut kôlhang, shiwa byu

pé luqgok èq dú lô kó râ lé gyuq kô é yanmai, htân htân a wám kut kó nghut ri.

²⁷ Lagyô pé lé shuí jé lô kôjáng, Yudaq byìn tú wapdoq hí má yhangmoq lé nyhi tô akô. Haú hkûn, hkyangjong mó gi, ²⁸ "Yesuq é myìng lé lang luí a mhoqshit râ matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jàm shoq, nungmoq kut bekô nghut luí, Yesuq é sui lé, ngamoq é ahtoq má ke byi râ dâ nyi akô." ga luí, yhangmoq lé taí akô.

²⁹ Haú hkûn, Petruq eq gotû lagyô pé tù taí kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo râ dut lhê. ³⁰ Nga-nhông é íchyí íwâ pê é Garai Gasang gi, nungmoq èq tapzîng má lhâng sat pyâm é Yesuq lé, shi e mai lhoq dui toq kat bê nghut ri. ³¹ Israelaq amyû lé, myit lhîng hkyô eq mara hkyut byi hkyô hpóng byi râ matú, up é ahkáng wó Sû eq hkyi yù Sû kut nhâng râ ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyo é saksé pé nghut nyi lhê; mungdang lé gyô yù luí châng é bang lé Garai Gasang byi tô é Chyoiyúng Woi-nyí le, shí pê é saksé nghut lhê." ga akô.

Gamalelaq Hpaqchyí Byî É Hkyô

³³ Yhangmoq gi, dang haú lé wó gyo kôjáng, lûm gyo nhik-yo naú kômù, lagyô pé lé sat pyám râ lháng myit akô. ³⁴ Nghut kôlhâng, mingbyû ban-shoq bâng é hí má aróng wó é tarâ sará Gamalelaq

* **5:31** Garai é loqyo loq gâ é gi, hpautap hkungga gíng é jowò lé taí nau é nghut lhê.

gâ é Hparishe rayuq, haû Yudaq byìn tú wapdoq má toq yap mù, lagyo pé lé razup zo lhoq htoq to nhâng luí, ³⁵ yhang taí é gi, "Israelaq byu pé ê, shí bang lé hkâsu kut râ hkyô, rago za hí myit wú keq. ³⁶ Hkâsu mù gâ le, hí hpyang Htudaq gâ é byù rayuq pô htoq lô mù, yhânggùng yhang byù mó rayuq yuq nghut lhê ga taí jáng, byù myi shô kô yhâng chyáng châng wú bekô. Yhang sat pyâm é hui luí, yhang htâng châng é lhunglhâng bang le byo myín byuq kômù, haí le a wó kut dut byuq akô nghut ri. ³⁷ Hau htâng, myìng jihpán guq yu é buinyi má, Yudaq gâ é Galile byù rayuq pô htoq mù, mingbyû wuì lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhâng bang le, byo myín byuq bekô nghut ri. ³⁸ Ahkuí le, shí bang lé haí le hkâgon ko, yhangmoq kâm é đông nghut nyi kó sháng gaq; yhangmoq kut nyi é hkyô eq dâ nyi é hkyô pé gi, byù myit đông kut é nghut jáng, htên byoq byuq râ za nghut lhê. ³⁹ Nghut kôhang, Garai Gasâng chyáng mâ é nghut le gi, nungmoq wó lhoq hkyîng pyám kó râ a nghut. Garai Gasâng é gyè sheq dut lò kó râ nghut lhê." gâ ri.

⁴⁰ Dang haû lé yhangmoq gyô htuk bum akô. Haû mù, lagyo pé lé wut yù mù luí, nhuq bat yù kômù, Yesuq é myìng lé lang luí mhoqshit é hkyô a ge kut râ nghut lhê ga taí kômù, nhang pyâm akô nghut ri.

⁴¹ Lagyo pé kúm gi, Yesuq é myìng é yanmai ru hpuzô é hkyô gi, gingdán nyi ri, ga myit yù kômù, Yudaq byìn tú wapdoq haû mai gabú myit èq htoq lò bekô. ⁴² Hau htâng, yhangmoq gi, nyí wuì làng

noqkuq yhûm má le, rayhûm htâng rayhûm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuî, chángzô pé myô jat lo nyi é buinyì pé má, Grik dang nyo é Yudaq byu pé gi, yhangmoq é chuimó myhî pé lé, nyí wui lhê é gàm tso gàm huq é hkyô má rago a wó kut kô é yanmai, Hebre myíng mu é Yudaq byu pé lé mara hûn dang taí bum akô. ² Haú hkûn, lagyo raxe í yuq gi, chángzô pé lhunglhâng bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyâm to mù, zangbó amû lé za lajang nyi é nghut le gi, a htuk râ nghut lhê. ³ Haú mù luî, gumang wui ê, Chyoiyúng Woi-nyí byíng é eq hpaqchyî byéng-yá bo é nhik bo byù nyhit yuq lé nungmoq chyáng mâ é hkyin to keq. Haú bang lé muzó shí lhum hun to râ nghut lhê. ⁴ Ngamoq kúm gi, kyûdung é hkyô eq mungdang hkô é hkyô lé za, noqzuq tung kut nyí râ nghut lhê." ga taí akô.

⁵ Dang haú lé shiwa byù lhunglhâng bang gyô htuk kômù luî, lumjíng myit kô é, Chyoiyúng Woi-nyí byíng é Stehpan ga sù eq, Hpilip, Prokoru, Nikanora, Timun, Parmena, Yudaq noqkuq htûng má lhing wang lò bê sù Antioku wà mó mâ é Nikolaq pé lé hkyin yù mù, ⁶ lagyô pê chyáng shuí ló akô; lagyô pé gi, kyûdung byi kômù, yhangmoq lé loq ke byi akô nghut ri.

⁷ Garai Gasâng é mungdang gi, je myô jam lò luî, Yerusalem wà mó má chángzô pé gyai myô jat

lawán lo é htoq agó, hkyangjông pé myo myo le, haû lumjínq hkyô má châng nyi bum akô.

Stephan Chyup Yû Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pê é hí má mauhpo muzó pé eq limik kumlhá mó pé tân shit ri. ⁹ Haû hkûn, luthkyô ga bâng é tarajong eq sêng é Kuruni, Alesander eq Kiliki, Asia mau mâ é bang ra-am gi, toq mù, Stehpan eq dang chyin chyin lhûm akô. ¹⁰ Nghut kôlhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ûng kó nghut ri.

¹¹ Haû mù, yhangmoq gi, "Shí yuq, Mosheq eq Garai Gasang lé rhoi dang taí nyi é lé, ngamoq wó gyô ri." ga luí, mhaû taí nhâng râ byù haq lung tô akô.

¹² Haû mù, yhangmoq gi, mingbyû wuè eq nhik bô suwún wuí, tarâ sará pé lé, chun htau mù, Stehpan lé chyup yû nhâng luí, Yudaq byìn tú wapdoq má shuí nyhi tô akô. ¹³ Mhaû é saksé byu pé lé le lhoq hâng kat luí, haû bang gi, "Shí yuq, shí chyoiyúng jowò* eq jep é tarâ lé shut shai é dang ru taí nyi ri. ¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq eq byí tô é htunghking lé htaí pyám râ nghut lhê ga luí, yhang taí é dang lé ngamoq wó gyô é nghut lhê." ga taí akô.

¹⁵ Haû Yudaq byìn tú wapdoq má zung to bang banshoq, yhang lé chôm wú tsuq nyí kô é hkûn,

* **6:13** Shí chyoiyúng jowò gi, Yerusalem noqkuq yhûm lé gà lhê.

yhâng é myoqdong gi, maumang lagyô é myoqdong su dut é lé, yhangmoq myang akô nghut ri.

7

Stehpan Taí É Dang

¹ Haú hkûn, hkyangjong mó gi, "Dang haú pé têng lhê lhu?" ga luí, yhang lé myi jáng,

² Stehpan tû taí é gi, "Gumang wuè eq îwa wuè ê, gyô wú keq, nga-nhúng lhunglhâng bâng é íchýí Abraham gi, Haran wà má a ló nyí shi lé, Mesopotamiaq mau má nyi tô ashî hkûn, hpungwup shingkang bo é Garai Gasang gi, yhâng chyáng lé htoq shit mù, ³ 'Náng é ming eq náng é amyû mai htoq ló luí, ngò tûn shit râ ming shut e ló aq.'[☆] ga luí, yhang lé taí ri.

⁴ Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shî má yhang lé htot lô nhâng bê nghut ri. ⁵ Garai Gasang gi, shí ming má yhang lé silí wunlí nghû râ, hkyî rahkô nang í é myigùng lháng a byî é nghut kôlháng, yhang, zodù lháng a wò shi mai, yhang lé le, yhâng é awut ashín pé lé le, maumyî shî byi râ ga danggidiq byî to bê nghut ri. ⁶ Hau htoq agó, shí hkyô lé Garai Gasang xoq taí é gi, 'Náng é awut ashín pé, tûngbau ming má bíng nyí mù, haú ming bâng eq myi shô zàn jùn zô é eq zing-rî é lé hui kó râ. ⁷ Nghut kôlháng, yhangmoq lé jùn zô é amyû lé le, ngò jéyáng rà nghut lhê.' gâ ri. 'Haú hkûn, yhangmoq gi, haú ming mai htoq lô mù, jowò shî má ngo lé noqkuq

☆ 7:3 Apûn 12:1

kó râ nghut lhê.[☆] ga le, Garai Gasang taî ri. ⁸ Hau htâng, yhang lé ahpyo-kuq hpyit byi râ hkyô eq sêng é dangshikaq le, byi ri. Haû mù, Abraham gi, Isak lé hku é htâng shit nyi buinyi má ahpyo-kuq hpyit byi ri; Isak gi, Yakup lé hkû mù, Yakup gi, îchyí îwa achyûng raxe í yuq lé hku kat bê nghut ri.

⁹ Haû îchyí îwâ pé gi, Yosep lé manôn kôluî, Egutuq ming shut jùn dông ûng kat akô. Nghut kôlhang, Garai Gasang gi, yhang eq rahá nghut nyi mù luî, ¹⁰ wuîhke jamjau banshoq mai yhang lé lhoq lhut yû mù, Egutuq hkohkâm Hpara-uq é hí má le myoqdong wó, hpaqchyí byéng-yá le bò nhang é yanmai, hkohkâm haû gi, Egutuq ming eq, yhâng é hkohkâm-wâng banshoq lé up nhang ri.

¹¹ Haû u lé, Egutuq ming eq Hkanan ming banshoq má mutmó gyó lô mù, wuîhke jamjau mó hui bekô. Nga-nhûng é îchyí îwâ pé le zoshuq a myang hô zo lo dut byuq bekô nghut ri. ¹² Ahkuî, Yakup gi, Egutuq ming má guqzo joq é hkyô lé wó gyo jáng, nga-nhûng é îchyí îwâ pé lé sâng-hî dàm ê nhang ri. ¹³ Htang dàm dum ê é hkûn, Yosep gi, yhanggu yhangmâng pé lé yhang ó nghut é hkyô taî kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htâng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egutuq ming má jé gyó lô luî, yhang eq nga-nhûng é îchyí îwâ pé gi, banshoq haû ming má shî lô byuq bekô nghut ri. ¹⁶ Yhangmoq é mâng lé gi, Shehkem wà má yu taû lô mù, Shehkem wà má é Hamora é yhangzo yhangshu pé chyáng mai, Abraham éq

☆ 7:7 Apûn 15:13-14

ngùn byi mù wui hpyit tô é lupdùng má ló myhup
tô akô nghut ri.

¹⁷ Abraham lé Garai Gasang byi tô é danggidiq
dik râ ahkyíng jé lo nyi é u lé, ¹⁸ nga-nhùng é amyû
gi, Egutuq ming má Yosep lé a sê é hkohkâm pô
htoq é pyat jé shoq, myoluq jebe lò bekô nghut
ri. ¹⁹ Hkohkâm hpó haû gi, nga-nhùng é amyû
htoq má a ge é hpaqchyî da luî, nyheqnú pé lé shi
byuq sháng gaq ga, dú pyám nhang é đông mai nga-
nhùng é íchýi íwâ pé lé zing-ri bê nghut lhê.

²⁰ Haû u má, Mosheq lé hkû to bê. Yhang gi,
Garai Gasâng é hí má gyai yúnglhô é sù nghut ri;
yhang gi, yhângwâ é yhùm má lhamó sum hkyap
baú tô é hui mù, ²¹ htot tô tô é hui jáng, yhang
lé Hpara-uq é byizô èq xe yù mù, zosîng kut yû
luî, hku kô ri. ²² Mosheq gi, Egutuq ming mâ é
hpaqchyî byéng-yá banshoq lé mhoq yû luî, nhut
shô a-tsam eq hkyî loq a-tsam gyai bò sù nghut ri.

²³ Yhang asak myi xê zàn jé lò jáng, yhâng é
gumang Israelaq byu pé chyáng ê kûm wú râ matú
wó myit htoq kat ri. ²⁴ Ê jé jáng, zing-ri hui nyi é
sù rayuq lé ê myâng luî, haú yuq lé búng mù, zing-
rî nyi é Egutuq byù lé, loqchoq hpuq é đông sat
pyâm ri. ²⁵ Mosheq gi, yhâng é byu pé lé yhâng
é loq đông Garai Gasang hkyi yù hkyô byi nyi é
lé, yhâng é amyû pé sê gyo byi nhô ngàm kôlháng,
yhangmoq a sê gyo byi kó nghut ri. ²⁶ Htang nyí lé,
Israelaq byù yhangchang mabyoq htoq nyi é má, e
ang mù, yhangnhik lé pyîn naû luî, 'Ahkaú nhik ê,
gumang yhangchang sheq ru nghut lhê nhîng, haí
mù rayuq eq rayuq byoq lhum nyi akô lhu?' ga tâi
ngón wú ri.

²⁷ Luzúm hpó lé zing-rî nyi sù yuq gi, 'Ngamoq é ahtoq má zau eq tarâ agyì kut râ matú, nàng lé ó yuq hkyin tô é lhú?' ²⁸ A-nyí nap Egutuq byù lé sat pyâm é su, ngo lé le sat pyâm nau ri lhú?'[✧] ga luî, tû taí uchyang yhang lé dún chyûn pyâm ri. ²⁹ Mosheq gi, dang hau é yanmai, hpâng luî Midian ming má é nyi byuq ri. Haû má yuqzo í yuq ê wó ri.

³⁰ Haû ming má myi xê zàn lai jáng, Sinaq Bùm yàm, yoso hkaû mâ é myi gyúng tô é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haû lé myàng jáng, hau é yanmai maú luî, wú wú râ ga huî e ló le, Yhumsîng é htê htoq lo é gi, ³² 'Ngò gi, náng îchyí îwâ pê é Garai Gasang, Abraham, Isak, Yakup é Garai Gasang nghut nyi lhê.'[✧] gâ ri. Mosheq kúm gi, gyuq nán luî, a wám tu wú nghut ri.

³³ Haû Yhumsîng gi, 'Náng é hkyî-tsung hkyut pyâm aq, nàng yap tô é jowò gi, chyoiyúng é myigùng nghut lhê. ³⁴ Egutuq ming má ngá é amyû pé zik zo huî nyi é hkyô lé, ngò gè gè yhang myàng bê; yhangmoq é ngàu nhik ngàu htê lé ngò wó gyo bê; yhangmoq lé hkyi yù râ matú ngò gyó lé é nghut lhê; ahkuî, lé aq, ngò, nang lé Egutuq ming shut nhang taû kat râ.'[✧] ga luî, yhang lé dum taî ri.

³⁵ Yhangmoq èq, 'Nang lé zau eq tarâ agyì kut râ matú, ó yuq hkyin tô é lhú?' ga luî he-ngik pyâm é Mosheq lé yhang, mhanpúng má htoq shit é mau-mang lagyo dông mai, Garai Gasang gi, yhangmoq é zau eq hkyi yù sù kut nhâng luî, taû nhang kat é nghut ri. ³⁶ Haû Mosheq yhang, Egutuq ming má

✧ 7:28 Htoq Ló 2:14 ✧ 7:32 Htoq Ló 3:6 ✧ 7:34 Htoq Ló 3:5, 7-8,10

le, Nhonng Nè má le, yoso hkaû pé má le, myi xê zàn gyoro má mauhpo muzó pé eq limik kumlhá pé tũn shit uchyang, yhang é byù myû pé lé Egotuq ming mai shuí htoq lô ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pô htoq lô nhâng râ nghut lhê. ✧ ga luí, taí tô é sũ le Mosheq yhang nghut ri. ³⁸ Yoso hkaû má nghut nyi ashî hkũn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhũng é îchyí îwâ pé eq le rahá nghut sũ gi, yhang yhang nghut nyi ri; nga-nhũng lé ap byi râ asak dui é mungdang lé lom yu é sũ le, yhang nghut nyi ri.

³⁹ Nghut kôlhang, nga-nhũng é îchyí îwâ pé kúm gi, yhang é dang lé a kâm gyo kômù, yhang lé he pyám luí, Egotuq ming shut taú nau é myit bo bum akô. ⁴⁰ Haû mù, Arun lé, 'Egotuq ming mai nga-nhũng lé shuí htoq lo é Mosheq gi, haí dut byuq bê hkyô lé, ngamoq a sé lo; haû mù, nga-nhũng hí má so byi râ hparà lhô pé saí byi aq. ✧ ga taí akô.

⁴¹ Haú buinyi pé má, yhangmoq gi, nojũng zo lhô saí mù, alhô haû lé hkungga nhông byi uchyang, yhangmoq é loq èq saí tô é muzó jizó má gabú nhik dik nyi akô. ⁴² Haû mù luí, myiqhtoí pê é laiká má kâ tô é gi,

'Israelaq byu pé ê, myi xê zàn tup yoso má chung é shigu eq hkungga gi, ngo lé nhông byi é nghut akô lhú?

⁴³ Nungmoq gi, nungmoq noq râ matú saí yu é alhô, Molak é zúm eq Rehpan hpara é kyí lé

sheq, waq lhing wún ko é yanmai,
 Babelon lai shoq ngò nungmoq lé lhoq lhâm pyám
 râ nghut lhê.[✧]

ga luî, bo tô é eq rajung za, Garai Gasang gi,
 yhangmoq chyáng mai myoqdong lhing pyám mù,
 mauhkûng htoq mâ é buì, kyî, lhamó pé lé noqkuq
 râ matú ap pyám bê nghut ri.

⁴⁴ Mosheq lé, nàng myang é azòng eq rajung za
 saí aq ga, Garai Gasang taî é dông saî tô é saksé
 zúm lé, haû yoso má nga-nhûng é íchýí îwâ pé wó yû
 bekô nghut ri. ⁴⁵ Haû mù, nga-nhûng é íchýí îwâ pé
 gi, yhangmoq é myoq hí mai Garai Gasang èq hkat
 htoq pyám byî é byù myû pê é mau má, Yoshuq
 eq rahá wang nyi ló kô é hkûn, saksé zúm haû lé
 yu wang ló akô. Haû gi, Dawiq é pyat jé shoq joq
 to bê nghut ri. ⁴⁶ Dawiq kúm gi, Garai Gasang hí
 má myoqdong wó sù nghut mù luî, Yakup é Garai
 Gasang matú nyi jowò saí râ ahkáng dung kôlháng,
⁴⁷ Sholumon èq sheq saí bê nghut ri.

⁴⁸ Nghut kôlháng, Myhang htáng htum Sû gi, byu
 é loq èq za saí é yhûm má nyi é a nghut, haû hkyô
 eq séng luî myiqhtoi wá taî tô é gi,

⁴⁹ 'Mauhkûng gi, ngá é zùng tanghkuq, myigùng gi,
 ngá é hkyî nang jang nghut nyi lhê;
 ngá é matú hkasû é yhûm saí byi shi kó râ lhú? Ngò
 nô yù râ jang gi, hkâmá nghut kó râ lhú?

⁵⁰ Haû banshoq lé ngá é loq èq baú saî tô é a nghut
 kó lhú? ga luî, haû Yhumsîng taî ri.[✧]
 gâ ri.

⁵¹ I-myyit htân mù, i-myyit eq nohkyap má ahpyo-kuq a hpyit é bang* ê, nungmoq gi, nungmoq é îchyí îwâ pé su, Chyoiyúng Woi-nyí lé hkâ-nhám le lhom he-ngik pyâm nyi akô; ⁵² Nungmoq é îchyí îwâ pé èq a zing-rî wú é myiqhtoi, ó yuq wá nyi lhê lhú? Haû Dingmán Sû pô htoq râ hkyô lé hko kyô é bang lé, yhangmoq sat pyâm é chyat nghut akô; ahkuî, nungmoq le, haû Dingmán Sû lé ap pyâm é bang eq sat pyâm é bang nghut nyi akô. ⁵³ Maumang lagyô èq shit kyo byî é tarâ lé nungmoq wó yû kôlhang, haû lé a cháng kó nghut ri." gâ ri.

Stephan Lé Luqgok Èq Dú Sat É Hkyô

⁵⁴ Haû hkyô lé yhangmoq wó gyo kôjáng, yhangmoq é nhiklum má lûm htaû záng kô é yanmai, Stephan lé, zuì wang ngat kyáng shoq wú nhikyô nyi akô. ⁵⁵ Stephan kúm gi, Chyoiyúng Woi-nyí byíng mù, mauhkûng shut tu wú kat le, Garai Gasâng é hpungwup shingkang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haû mù, yhang gi, "Wú keq, mauhkûng hpông tô é lé le, Garai Gasâng é loqyo hkyam shut haû Byu Yhangzo yap tô é lé le, ngò myàng ri." ga taî kat ri.

⁵⁷ Haû hkûn, yhangmoq gi, htê mó o mó garu uchyang, yhumsing é nohkyap xaû pyâm mù, radá dâm yhang lé chôm htim kômù, ⁵⁸ yhang lé wà mai she htoq ló kôluî, luqgok èq chôm dú ló bekô nghut ri; saksé kut é bang gi, Sholuq gâ é zoram é hkyî wang má yhangmoq é buhîng pé lé hkyut bum tô akô.

* **7:51** I-myyit eq nohkyap má ahpyo-kuq a hpyit é bang gâ é gi, Garai dang lé a lûm a cháng é bang lé gâ lhê.

⁵⁹ Luqgok eq dú nyi bùm kô é u lé, Stehpan gi, "Yhumsîng Yesuq ê, ngá é woi-nyí lé hap yù laq." ga kyûdûng ri. ⁶⁰ Hau htâng, yhang gi, hkyihput htuoq mù, "Yhumsîng ê, yhangmoq kut é mara haû lé hkyut pyám byi laq." ga luî, htê mó eq wut dûng ri; haû ban taí jáng, yhang kâng byit byuq bê nghut ri.

8

Hpúng Byû Lé Sholuq Zing-rî É Hkyô

¹ Sholuq gi, haû má nyi to mù, Stehpan lé sat pyâm é muzó má myit bo huî ri.

Haú nyí mai, Yerusalem wà mó mâ é noqkuq hpúng gi, zing-ri mó huî lo é nghut mù luî, lagyo pé mai lai luî, lumjîng bang lhunglháng gi, Yuda mau eq Samariq mau jowò hkangmó má byo myín ló bekô. ² Nghut kôlhang, tarâ hkunggâ é bang gi, Stehpan lé yhum pyâm é htâng má, yhang é yanmai iyon mó huî nyi akô nghut ri. ³ Sholuq kúm gi, rayhum htâng rayhûm wàng mù, myiwe yuqgè lé she hkyut htoq yû luî, htóng má lhúng tô é dông mai, noqkuq hpúng haû lé lhoq hpyoq ló nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowò hkangmó má mungdang lé hkô kyô ló akô. ⁵ Haú hkûn, Hpilip gi, Samariq mau mâ é myuq ra-myuq shut e ló mù, Hkrisduq é hkyô lé hkô kyô ri. ⁶ Byû ajùm ayò gi, Hpilip taí kyô é hkyô lé wó gyô é eq, yhang tûn shit é limik kumlhá lé myàng kôjáng, i-myit rahkat za eq yhâng é dang chôm gyô nyi bum akô. ⁷ Nat wang júng é byû myo myô pê chyáng mai, agè ashop é nat pé wut garu uchyang htoq ló byuq

bum akô; gùngjum shi é bang eq hkyî htên é bang myo myo le, ge ló byuq bum akô. ⁸ Haû mù luî, haû myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byù rayuq gi, hí lé haû myuq má myoqheq hpaqchyî kut shit mù, Samariq byu pé lé lhoq maú luî, yhâng gùng lé yhang, laklaí sù nghut lhê gâ ri. ¹⁰ Byù tiq ko banshoq le, "Byù shí yuq gi, 'haû a-tsam mó' gâ é, Garaî chyáng mai hpungwup a-tsam wó yû sù nghut ri." ga luî, yhâng é dang lé gyô bum akô. ¹¹ Haú yuq gi, myáng myáng yhâng é myoqheq hpaqchyî èq yhangmoq lé lhoq maú lo é yanmai, yhâng dang lé chôm lum bum akô. ¹² Nghut kôhang, Hpilip hko kyô é Garaî Gasâng é mingdán hkyô eq, Yesuq Hkrisduq é myìng eq sêng é gabú danglù hkyô lé, lumjìng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjìng mù luî, wui-myhup hkâm yù mù, Hpilip htâng châng wún ri. Hpilip é kumlhá mó eq laklaí kumlhá pé lé myàng jáng, yhang gi, gyai maú byuq ri.

¹⁴ Garaî Gasâng é mungdang lé Samariq byu pé, lhom hap yù bê hkyô lé, Yerusalem wà mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. ¹⁵ Yhangnhik gi, lé jé jáng, byù haú bang Chyoiyúng Woi-nyí wó yû râ matú kyúdung byí akô. ¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyó lô shi; Yhumsìng Yesuq é myìng mai wui-myhup hkâm yu é za ru nghut bùm ashî. ¹⁷ Haû mù luî, lagyô nhik yhangmoq é ahtoq

má loq ke byi jáng, yhangmoq gi, haû Chyoiyúng Woi-nyí lé wó hkâm yù bekô nghut ri.

¹⁸ Lagyô nhik é loq ke kat jáng Chyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngùn ê byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haú yuq gi, Chyoiyúng Woi-nyí wó yû râ matú, haû su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunhuq lé ngun eq wó wui yù râ nghut lê ga luí, myit é yanmai, náng é ngùn gi, náng eq rahá htên byoq byuq sháng gaq. ²¹ Náng gi, Garai Gasâng é hí má myit a dítng sù nghut é yanmai, shí hkyô má náng wó bo lóm râ a nghut. ²² Haû mù luí, shí agè ashop é hkyô mai myit lhîng mù, Yhumsîng Garaí chyáng dúng tôngbán aq. Haú hkûn, náng é unghkaú má myit pyâm é hkyô lé, mara hkyut pyâm byi abe. ²³ Náng gi, ladu lai shoq nhikhko zo mù, yubak marâ eq tuí zing to huí é lé, ngò myàng ri." ga yhang lé taí ri.

²⁴ Haú hkûn, Simun gi, "Nungnhik taí é hkyô haí le ngá chyáng a jé sháng gaq, ngá é matú haû Yhumsîng chyáng kyûdung byi kó laq." ga tú taí ri.

²⁵ Yhangnhik kúm gi, haû Yhumsîng é mung-dang lé saksé hkâm mù ban hko kyo jáng, Samariq byu pê é wà myo myo má, haû gabú danglù lé hko kyo uchyang, Yerusalem wà mó shut dum taû lò bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsîng é maumang lagyo gi, Hpilip lé, "Toq aq, Yerusalem wà mó mai Gaza shut ló é hkyô jé shoq, maupyí shut nyâng za e ló aq. Hkyô

haû gi, yoso hkyô nghut lhê." ga taî ri. ²⁷ Haû hkûn, yhang toq mù e ló ri. Haû u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má ê mù, ²⁸ dum taû lo é hkûn, yhâng é myanglhêng má zùng luî, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyâng e ló aq." ga taî ri.

³⁰ Haû mù, Hpilip gi, din ê mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lhú?" ga luî, yhang lé myí ri.

³¹ Haû yuq gi, "Mhoqshit sù yuq a nyi le, ngò hkâsu kut sê gyo râ lhú?" ga tâ taî mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi,
"Sat râ sau lé su, Yhang lé she e ló bê nghut ri;
sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkûn,
Yhang lé a tara é dông doqdân pyám bekô;
Yhâng é asak lé myigùng htoq mai yù pyám bekô
nghut mù luî, Yhâng é awut ashín lé ó yuq
wó gôn kyo râ lhú?"[✧]
gâ ri.

³⁴ Haû hkûn, haû u-nuk wa gi, Hpilip lé, "Haû nghut le gi, ngo lé taî kyo laq! Myiqhtoi shí yuq gi, ó lé lhoq ang luî, taî é nghut lhê lhú? Yhânggùng lé taî é nghut lhê lhú? Haû a nghut jáng, góyuq é hkyô lé taî é nghut lhê lhú?" ga myí ri. ³⁵ Haû hkûn,

✧ **8:33** Esai 53:7-8

Hpilip gi, Chyúmdang haû lé yù mù, Yesuq eq sêng é gabú danglù lé taî kyô ri.

³⁶ Haû su e ló kô le, wuì joq é má jé jáng, haû u-nuk hpó gi, "Wú aq, shî má wuì joq tô ri, wui-myhup hkâm yù râ matú ngo lé hkúm râ jang haî joq ashî lhú?" ga taî ri. ³⁷ Hpilip gi, "Náng i-myt banshoq èq, nàng lumjìng bê nghut le gi, hkâm yu le ge lhê." ga taî ri; yhang le, "Yesuq Hkrisduq gi, Garai Gasàng é Yhangzo nghut é lé, ngò lumjìng bê." ga tû taî ri.* ³⁸ Haú hkûn, yhâng é myanglhêng hkyìng nhâng mù, yhangnhik wuì má gyó wâng luì, Hpilip gi, u-nuk hpó lé wui-myhup hkâm byî ri. ³⁹ Wuì hkaû mai htoq ló kô é hkûn, haû Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luì, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyám râ ga, nhikmó-yô nyi é nghut mù luì, hkyangjong mó chyáng ê mù, ² Yhumsing é Hkyô lé lumjìng é myiwe yuqgè myàng mi-myàng lé chyup yû luì, Yerusalem wà mó shut wó she ló râ matú, Damaskuq myuq mâ é tarajong pé má byi râ laiká pé lé dúng chûng ri.

* **8:37** Bun zo 37 shí lé Chyúmlaiká ra-am má gi, bo lhê; ra-am má gi, a bò.

³ Yhang e ló le, Damaskuq myuq eq chyáng ló nyi é hkûn, yhâng é lhîngkhyuq má mauhkûng mai dàn loq tung duq bó htoq ló ri. ⁴ Yhang myigùng má lêng ngop tô é u lé, "Sholuq, Sholuq, nàng ngo lé haî mù zing-rî nyi lê lú?" ga luî, yhang lé taî é htê wó gyô ri.

⁵ Haú hkûn, yhang gi, "Yhumsîng ê, nàng gi, ó yuq nghut lê lú?" ga myi jáng, haú Yhumsîng gi, "Nàng zing-rî nyi é Yesuq nghut lê, ⁶ toq aq, myuq shut wang ló aq. Nàng zui saí râ hkyô lé lhom taî kyo râ nghut lê." ga tû taî ri.

⁷ Yhang eq rahá e ló é luzúm wuî gi, htê haú wó gyo kôhang, ó yuq lé le a myàng kô é yanmai, maú hong yap tô bum akô. ⁸ Sholuq toq mù, myoq hpông kat wú le, haî lé le a myàng dut byuq mù luî, yhangmoq gi, yhang lé loq mai shê mù Damaskuq myuq shut shuî wang ló akô. ⁹ Sholuq gi, sum nyí tup myoqjit byuq mù luî, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsîng gi, yhang lé, "Anani ê." ga shing-rán dông wut ri.

Yhang gi, "Yhumsîng ê, shî má nyi lê." ga tû taî ri.

¹¹ Haú Yhumsîng dum taî é gi, "Toq aq, Hkyô-Nyàng gâ é wà hkyô shut ê mù, Yudaq é yhûm má, Tarshu byù Sholuq lé ê hô aq, yhang gi, kyûdûng nyi ri. ¹² Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byî é lé, shing-rán dông myàng bê nghut ri." gâ ri.

¹³ Anani kúm gi, "Yhumsîng ê, shí yuq gi, Yerusalem wà mó má, náng é sân-yúng bang lé a ge é dông hkâ-myhó kut laî lo é hkyanglù lé ngò myo

myo wó gyô wú bê; ¹⁴ Shí pé má le, náng é myìng lé lãng é bang banshoq lé chyup râ ga, hkyangjong agyi pê chyáng mâ é ahko ahkáng wó yu to sú nghut ri." ga tâi ri.

¹⁵ Nghut kôlhang, Yhumsîng gi, "Ru ê aq, shí yuq gi, tûngbàu pé eq yhangmoq é hkohkam pê é hí má le, Israelaq byu pê é hí má le, ngá é myìng lé wùn waq râ matú, ngò chûng râ nghû luî hkyin to sú nghut lhê; ¹⁶ Ngá myìng é yanmai hkâ-í hpuzo ra hkyô lé, Ngò, yhang lé tûn shit râ nghut lhê." ga tâi ri.

¹⁷ Hau htâng, Anani gi, jé ê mù, yhûm haú má wàng luî, Sholuq é ahtoq má loq kê to mù, "Gumang Sholuq ê, náng myoq dum wó myàng mù, Chyoiyúng Woi-nyí byíng sháng gaq ga, nàng lé lo é hkyô má, nàng lé htoq shit é Yhumsing Yesuq èq ngo lé nhang kat é nghut lhê." ga tâi ri. ¹⁸ Haú hkûn jáng, Sholuq é myoq mai akyap sù é wuí gyó byuq mù, yhang myoq dum wó myàng bê. Haú hkûn, yhang gi, toq mù wui-myhup hkâm yù luî, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htâng, yhang gi, Damaskuq myuq mâ é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasâng é Yhangzo nghut é hkyô, haú hkûn jáng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhang bang gi, maú byuq bùm kômù, "Shí yuq gi, Yerusalem wà mó má myìng haú lãng é bang lé lhoq hten lhoq hpyoq sù nghut lhê, a nghut kó lhú? Ahkuî, shí má

le, haû su é bang lé chyup yû mù, hkyangjong agyi pê chyáng ló ap râ da luî jé lé é sù a nghut kó lhú?" ga myi bum akô. ²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé taî hpyi kyo luî, Yesuq gi, Hkrisduq yhang nghut nyi é hkyô lé saksé tân shit ri.

²³ Buinyí tsómra myáng é htâng má, Yudaq byu pé gi, yhang lé sat pyám râ matú haq dâ akô. ²⁴ Nghut kôlhang, yhangmoq dâ é hkyô lé Sholuq sê pyâm ri. Yhangmoq gi, yhang lé wó sat pyám shoq ga, nyí lé myín lé myuq hkum pé má lhom nyi akô. ²⁵ Sholuq é chángzô pé kúm gi, myín má yhang lé shuí yù mù, manghkoq má lúng nhâng luî, wà kyám xewâm mai lhoq nyhum hkyô kat akô nghut ri.

Sholuq, Yerusalem Wà Mó Má Taû Jé Lo É Hkyô

²⁶ Hau htâng, yhang gi, Yerusalem wà mó má jé lo é hkûn, chángzô pé eq zùm yap râ matú shikut wú kôlhang, yhang gi, chángzo dut bê hkyô lé a jing kô é yanmai, lunglhâng bang gi, yhang lé gyuq bum akô. ²⁷ Barnaba kúm gi, Sholuq lé lagyo pê chyáng shuí lò mù, Sholuq, hkyô má Yesuq eq hkâsu kut huí é hkyô lé le, Yesuq eq yhang lé taî é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkâsu kut hko kyô é hkyô lé le, yhangmoq lé taî kyô ri. ²⁸ Haû mù, Sholuq gi, yhangmoq eq rahá Yerusalem wà mó má htoq htoq wàng wàng kut nyî uchyang, Yhumsing é mying mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, taî he lhûm nyi akô; nghut kôlhang, yhangmoq gi, yhang lé sat pyám râ dâ akô. ³⁰ Haû hkyô lé, gumang wui

sé kôjáng, yhang lé Kesare wà mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkangmó mâ é noqkuq hpúng gi, haú yoq pé má, lhoq ging lhoq tîng é hkyô wó yû mù, nguingón nyi akô; haú Yhumsîng lé gyuq hkunggâ é hkyô má le, Choyiyúng Woi-nyî èq lhoq pun lhoq kyîng é hkyô pé má le châng nyî mù, myô jat lo bùm bekô nghut ri.

Ainea Ge Byuq É Hkyô

³² Haú hkûn, Petruq gi, haú mau pé má hkat kûm wún uchyang, Ludaq wà mó má nyi é sân-yúng bâng chyáng é jé ri. ³³ Haú wà má, gùngjum shî luí shít zân tup yhupjang mai a wó toq é Ainea gâ é byù rayuq lé é myang ri. ³⁴ Haú mù, Petruq gi, "Ainea ê, Yesuq Hkrisduq, nang lé lhoq gê byi bê nghut ri, toq mù, náng é yhuphpú hen yù aq." ga luí, yhang lé taî ri. Haú hkûn jáng, Ainea wó toq yap bê nghut ri. ³⁵ Ludaq eq Sharon pá má nyi é lhunglhâng bang gi, haú yuq lé myàng mù luí, Yhumsîng Yesuq chyáng lhing wang lo bum akô.

Dorka Ga Sû Dum Dui Lo É Hkyô

³⁶ Ahkuí, Yopa myuq má Tabihta gâ é chángzo myiwe rayuq nyi ri; myìng haú lé Grik dang dông gi, Dorka* gâ é nghut lhê. Myiwe haú gi, ge é muzó kut nyi é sù eq, asho awuí bang lé alu byî nyi é sù nghut ri. ³⁷ Haú u lé, yhang gi, nòhpyo hui mù shi ló bê nghut ri. Yhâng mâng lé gi, chi mù luí ahtoq gok má jang tô akô. ³⁸ Ludaq wà mó gi, Yopa myuq eq chyáng é yanmai, haú myuq má Petruq nyi é lé

* **9:36** Dorka gâ é lichyúm gi, "chochî" gâ é nghut lhê.

chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haú hkûn, Petruq gi, toq mù, haú nhik htâng châng e ló ri. Yhang jé jáng, ahtoq pyâm gok má shuí hâng yu akô. Chuimó myhî pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashî hkûn Dorka hkyup é buhîng eq gotû mebu pé lé tún shit nyi akô.

⁴⁰ Petruq kúm gi, lhunglhâng bang lé htoq ló nhâng mù, hkyihput htuq luî, kyûdung mù, mâng shut lhing wú luî, "Tabihta ê, toq aq!" ga taî ri, haú hkûn myiwe haú myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lâm kat mù yhang lé lâng toq yù luî, lumjîng bang eq chuimó myhî pé lé wut yù mù, duì gû ap byî ri. ⁴² Haú hkyô lé, Yopa myuq mâ é bang banshoq wó gyô ló kômù luî, byù myo myo gi, haú Yhumsîng Yesuq lé lumjîng bum akô nghut ri. ⁴³ Haú mù, Petruq gi, shokuq loqmú saî é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuî, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap mâ é nghut lhê. ² Yhang gi, tarâ hkungga myit bò luî, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myùng bang lé alú myo myo byi uchyang, Garai Gasang lé hkâ-nhám le kyûdûng nyi ri. ³ Ra-nyí lé, myinhtâng sum hkyíng kô má, Garai Gasâng

é maumang lagyo rayuq gi, yhang chyáng jé mù, "Koneli ê." ga luí, yhang lé wut é lé, shing-rán mai de de myang ri.

⁴ Haû mù, haú yuq lé wú tsuq to mù, "Yhumsîng ê, hai hkyô nghut lhê lhú?" ga gyuq myit eq myî ri.

Maumang kúm gi, "Náng é kyûdung dang eq alu byî é hkyô gi, Garai Gasâng é hí má, hkungga masat dông hkyâng bê nghut ri. ⁵ Ahkuí, Yopa myuq shut byù nhang kat mù, Petruq gâ é sù Simun lé ê shuí lò nhâng aq. ⁶ Yhang gi, wuimau yàm mâ é, shokuq hkyup zô é Simun yhúm má bíng nyi ri." ga tâ ri.

⁷ Koneli gi, yhang eq dang tâi é maumang lagyo ló byuq jáng, dui-nhâng zoshâng í yuq eq, yhang chyáng hkâ-nhám le châng nyi bang mâ é, tarâ hkunggâ é gyezo rayuq lé ji yù mù, ⁸ dut lai lo é hkyô banshoq, yhangmoq lé tâi kyo luí, Yopa myuq shut nhang kat ri.

Petruq É Shing-rán

⁹ Htang nyí nyí-káng u lé, yhangmoq, Yopa myuq jé ló yâm má, Petruq gi, kyûdung râ ga, yhumhkûng shut doq ló ri. ¹⁰ Haú hkûn, yhang gi, zòmut luí rajung jung zô nau nyi ri; nghut kôhâng, zoshuq ru gai nyi ashî le, yhang moq byuq ló mù myoqwup shing-rán myang é gi, ¹¹ mauhkûng bóng lô mù, hpajóng mó sù é lé, myi chyûn má zui luí myigùng shut lhoq hkyô kat é azíng lé myang ri. ¹² Haú hkaú má, myigùng htoq mâ é hkyî myi hkyî dap é jung dusak ahú hú eq dô yê é jung ahú hú, mau má dang é ngoq ahú hú, lúng tô ri. ¹³ "Petruq ê, toq mù, sat zo aq." gâ é danghtê le mying htoq lo ri.

14 Petruq kúm gi, "Yhumsîng ê, haû gi, a wó dut, achaq achyut é eq a sansêng é zè lé, ngò hkâ-nhám le a zô wú." ga tâi ri.✧

15 Haú hkûn, "Garai Gasang lhoq san lhoq séng bê zè lé, a sanséng hkâ-nghû." ga luí, yhang lé dum tâi kat ri.

16 Haû su ga sum dâm tâi é htâng má, zè haû lé radá dâm mauhkûng shut wup yu ló bê nghut ri.

17 Ahkuí, Petruq gi, yhang myang é shing-rán lé haí wá nghut lhê lhú ga luí, myit maú nyi é hkûn, haû Koneli nhang kat é bang gi, Simun é yhûm lé myang hô kômù, hkumtot má yap to luí, 18 Petruq gâ é sù Simun, yhûm haú má nyi a nyi é lé, wut myí wú akô.

19 Petruq gi, shing-rán haû lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyó ló aq; 20 yhangmoq gi, ngò nhang kat é bang nghut é yanmai, myit haí a úng-âng é za, yhangmoq eq rahá bo ló aq." ga tâi ri.

21 Haû mù, Petruq gi, haú bâng chyáng gyó ló luí, "Nungmoq hô nyi é sù gi, ngò nghut lhê, haí ra luí lé kô é lhú?" ga myí ri.

22 Yhangmoq tâi é gi, "Dingmán é, Garai Gasang lé gyuq hkunggâ é, Yudaq amyû lunglhang bâng é hí má myoqdong wó é, shô up gyezau Koneli gi, nang lé yhang é yhûm má ji hâng yù mù, nàng tâi é dang gyo yù râ matú, yhang lé chyoiyúng maumang lagyo èq tâi shit kyô é hkyô lé wó yù luí, ngamoq lé nhang kat é nghut lhê." ga akô.

23 Haû mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq

✧ 10:14 Nhung 11 lé wú aq.

mù, yhangmoq eq rahá bo ló ri; Yopa myuq mâ é gumang wuì ra-am le châng akô nghut ri.

Koneli Lé Petruq Huì É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhâng é gumang wuì eq buinùm ji-myi wuì lé ji tsíng to mù, yhangmoq lé lánng nyi ri. ²⁵ Petruq wang ló jáng, Koneli gi, te yù mù, yhâng é hkyí wang má paì gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga luì, taì uchyang yhang lé tu toq ri.

²⁷ Haù mù, Petruq gi, yhang eq dang nyô uchyang wang ló wú le, byù myo myo zup zíng tô bum é lé myang ri. ²⁸ Haù hkùn, yhang gi, yhangmoq lé, "Yudaq byù rayuq gi, noqkuq htông dông tûngbaù rayuq eq a wó zùm yap é, htoq htoq wàng wàng a wó kut é hkyô lé, nungmoq sé lugù nghut akô. Nghut kôhang, ó yuq lé le achag achyut dut ri, a sanséng dut ri nghû a ge taì é hkyô lé gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkùn, ngò a he pyâm é za châng lé lo é nghut lhê. Haù mù luì, haì ra kô é yanmai, ngo lé ji akô nghû ngò myí nau ri." ga taì ri.

³⁰ Haù hkùn, Koneli gi, "Laì lò bê myi nyí nyí, myinhtâng sum hkyíng má, ngá é yhùm má, ngò kyûdûng nyi le, danso loq, duqbó é mebu wut é byù rayuq ngá é hí má yap htoq shit mù, ³¹ Koneli ê, Garai Gasang gi, náng é kyûdung danghtê lé le gyo byi bê; nàng alu byí é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gâ é Simun lé ji nhâng aq. Haù yuq gi, wuimau yàm mâ é shokuq hkyup zô é

Simun yhûm má bíng nyi ri.' ga taî ri. ³³ Haû mù luî, haú hkûn jáng ngò náng chyáng byù nhang kat bê nghut lhê. Ahkuî, nàng jé é gi, gyai gê bê nghut ri. Yhumsîng yhang nang lé taî nhang é gû banshoq gyô yù râ matú, ahkuî ngamoq lhunglhang bang Garai Gasâng é hí má nghut nyi lhê." ga taî ri.

Petruq Hko Kyô É Mungdang

³⁴ Haú hkûn, Petruq dang-hi hpông é gi, "Garai Gasang, myoqdong a hkyin é hkyô lé, ahkuî ngò gè gè yhang sé bê. ³⁵ Byù myû chângjup má, Yhang lé gyuq hkunggâ é eq tengmán é muzó jizó saî é sù gi, Yhang é hí má myoqdong wó nyi ri. ³⁶ Nyi mi-nyì, joq mijoq é Yhumsîng, Yesuq Hkrisduq é yanmai, nguingsón hkyô eq sêng é gabú danglù lé hko kyo sháng gaq ga, Israelaq byu pè chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má taî pyo ló é hkyô lé, nungmoq sé gû nghut nyi lhê. ³⁸ Haû gi, Garai Gasâng eq Chyoiyúng Woi-nyí eq wum-o a-tsam byî to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat èq zing-ri huî é bang banshoq lé lhoq gê byî wún ri.

³⁹ Haû mù, Yudaq byu pè é ming má le, Yerusalem wà mó má le, yhang zui saî bê muzó banshoq é saksê pé gi, ngamoq nghut nyi lhê. Haú yuq lé yhang, yhangmoq sik zîng má jén sat pyám bekô nghut ri. ⁴⁰ Garai Gasang kúm gi, sum nyí nghû râ buinyi má, haú yuq lé lhoq dui toq kat é nghut mù luî, byù banshoq é hí má a nghut e za, saksé kut râ matú Garai Gasang hkyin to gù

nghut é bang ngamoq é hí má za htoq shit bê nghut ri. ⁴¹ Yhang shí é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shí bê bâng é tarâ agyì kut râ matú, Garai Gasâng eq Yhang lé hkyin tô é sù nghut é hkyô lé, byu pé lé hko kyo râ eq, saksé hkám râ matú, ngamoq lé hkunmó hkyô to bê nghut ri. ⁴³ 'Yhang lé lumjǐng é bang yuq hkangmó gi, Yhâng é mying é yanmai, yubak hkyut pyám byí é hui kó râ nghut lhê.' ga luí, taí é myiqhtoi banshoq gi, Yhâng é hkyô lé saksé hkam byí é bang nghut nyi akô." ga taí ri.

Chyoiyúng Woi-nyí Lé, Túngbaù Pé Wó Hap Yu É Hkyô

⁴⁴ Petruq gi, haú hkyô lé ru taí nyi ashí le, dang haú wó gyô é banshoq bâng ahtoq má Chyoiyúng Woi-nyí gyó jé lo ri. ⁴⁵ Túngbaù pé é htoq má lháng Chyoiyúng Woi-nyí gâ é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjǐng bang Yudaq byu pé gi, maú bum akô. ⁴⁶ Hkâsu mù gâ le, yhangmoq gi, laklaí dang nyo é lé le, Garai Gasang lé hkya-on kô é lé le, wó gyô bùm kô é yanmai nghut ri.

⁴⁷ Haú mù, Petruq gi, "Ngamoq su Chyoiyúng Woi-nyí hkâm yù bê bang lé, bap̄tisma a byi nhâng râ gi, wui lé ó yuq wó hkâm to râ lhú?" ga taí ri. ⁴⁸ Hau htâng, yhang gi, yhangmoq lé Yesuq Hkrisduq é myǐng lang luí wui-myhup hkâm yù râ matú pyǐng tô ri. Haú hkûn, yhangmoq gi, Petruq lé buinyì ra-í nyí, nyi gyó shi aq ga chôm hkâm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasâng é mungdang lhom yù bê gâ é hkyô lé, lagyô pé eq Yuda mau pé mâ é gumang wuì wó gyô akô. ² Haù mù, Petruq, Yerusalem wà mó má doq ló é hkûn, ahpyo-kuq hpyit hkyô lé myit zuq é lumjìng bang gi, ³ "Nàng gi, ahpyo-kuq a hpyit é bâng é yhûm má wàng mù, yhangmoq eq razo rashuq kut ri." ga luì, yhang lé mara lhom taì hun bum akô.

⁴ Haù hkûn, Petruq gi, haù dut lò bê hkyô lé awang mai ahpyo hpyot, yhangmoq lé taì sân kyô hi kat é má, ⁵ "Ngò gi, Yopa myuq má kyûdûng nyi le, moq byuq ló mù shing-rán myang é gi, mauhkûng mai hpajóng mó sù é myi chyûn shut zui luì, ngá shut lhoq hkyô kat é zè gyó jé lo é lé, myang ri. ⁶ Haù lé rago za saì wú le, myigùng htoq má hkyî myi hkyî dap é jung dusak, yosô zè, dô yé é jung eq, maulat nghoqzô pé bo tô é lé, ngò myàng luì, myit wú nyi é hkûn, ⁷ 'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsîng ê, haù gi, a wó dut, achay achyut é eq a sansêng é zè, ngá é nhut má hkâ-nhám le a wang wú.' nghû taì kat é nghut lhê.

⁹ Haù hkûn, 'Garai Gasang lhoq san lhoq yúng bê zè lé, a sanséng hkâ-nghû.' ga luì, mauhkûng mai dum taì kat ri. ¹⁰ Haù su ga sum dâm taì é htâng má, haù pé banshoq lé mauhkûng shut dum wup yu ló bê nghut ri.

¹¹ Haù hkûn jáng, Kesare wà mó mai, ngá chyáng nhang kat é byù sum yuq gi, ngò nyi é yhûm hkumtot má jé nyi tô akô. ¹² Chyoiyúng Woi-nyí

gi, ngo lé myit a úng-âng é za, yhangmoq htâng châng ê aq ga taí ri; shí gumang hkyuq yuq le ngo eq rahá ê mù, Koneli é yhùm má ngamoq wang é. ¹³ Haú hkùn, haú yuq gi, yhâng é yhùm má maumang lagyo lé htoq shit é hkùn, yhang hkâsu myang é hkyô lé le; maumang lagyô èq yhang lé, 'Yopa myuq shut byù nhang kat mù, Petruq gâ é sù Simun lé ê jî nhâng aq; ¹⁴ nàng eq náng yhumbyù lhunglhang bang hkyi yù hui rá danglù, yhang, náng chyáng wun lé lô byi rá nghut lhê.' ga taí é hkyô lé le, ngamoq lé taí kyô ri.

¹⁵ Ngò dang taí hi ló nyi é u lé, Chyoiyúng Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haú hkùn sheq, ngò gi, 'Yohan gi, wui èq wui-myhup hkám byí ri; nungmoq kúm gi, Chyoiyúng Woi-nyí èq wui-myhup hkám byí é hui kó rá nghut lhê.' ga luí, Yhumsîng taí é dang lé bûn kat ri. ¹⁷ Haú mù luí, Yhumsîng Yesuq Hkrisduq lé lumjîng é hkùn, ngamoq lé Garai Gasâng jeju chyunghuq byí é su, Yhang, yhangmoq lé le byí é nghut le gi, ngò gi, hkasú é byù nghut luí, Garai Gasang lé wó lhom hkûm pyám rá lhú?" ga taí ri.

¹⁸ Yhangmoq gi, haú hkyô lé wó gyo kôjáng, taí jang a joq lo kômù, "Ó! Nghut bê, Garai Gasang gi, tûngbaù pé lé le, asak dui rá matú myit lhîng hkyô byi bu-nhung!" ga luí, Garai Gasang lé chôm hkyâ-ôn akô nghut ri.

Antioku Wà Mâ É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín ló é bang gi, Hpínisi mau, Kupru zinlóng eq Antioku wà mó

je shoq byo lo kômu, Yudaq byu pé lé baú za, mungđang haú hko kyô akô nghut ri. ²⁰ Nghut kôlhang, yhangmoq má é Kupru byù eq Kuruni byù ra-am gi, Antioku wà mó má châng je lo kômu, Yhumsing Yesuq é gabú danglù lé, Grik pé lé le taí kyô bum akô. ²¹ Haú Yhumsing é loq gi, yhangmoq eq rahá nghut nyí mù luí, byù myo myo gi, lumjínq mù, Yhumsing chyáng lhing wang lo bùm bekô nghut ri.

²² Haú bâng é hkyô lé, Yerusalem noqkuq hpúng é no má hkyang je lo é nghut mù luí, yhangmoq gi, Barnaba lé Antioku wà mó je shoq nhang kat akô. ²³ Yhang je é hkûn, Garai Gasâng jeju bo nyi é lé myàng jáng, yhang gi, gabú luí, yhangmoq é myit nhiklum banshoq eq haú Yhumsing má lhumzuí nyi rá matú, lhunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Choyiyúng Woi-nyí le, lumjínq myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekô nghut ri.

²⁵ Hau htâng, Barnaba gi, Sholuq lé ê hô rá ga Tarshu myuq shut é mù, yhang lé myàng jáng, Antioku wà mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyi kô é nghut mù luí, byù myo myo lé wó mhoqshit akô. Chángzô pé gi, Hkristan gâ é myìng lé, Antioku wà mó má sâng-hi wó yù bekô nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé je bum akô. ²⁸ Haú bang má é Agabu gâ é sù gi, toq yap mù, Romaq mingkan tìng má mutmó gyó lô rá nghut é hkyô lé, Woi-nyí eq tân shit é đong taí kyô ri; (Haú gi,

hkohkâm Klodi é pyat má dut bê nghut lhê.)²⁹ Haû mù luî, chángzô pé gi, Yuda mau mâ é gumang wuì lé, ó le ó wó dut é myhó garum kat râ ga, myit hpyit yu bum akô.³⁰ Haû eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekô nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byû ram lé chyup yû mù, zing-ri râ ga ngantsâ nyi ri.

² Haû mù, Yohan é yhangmang Yakuq lé sham eq sat pyám nhang ri.³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jâng chyup yu ri. Haû dut é gi, mún a kat é muk zo poì u lé nghut ri.⁴ Herut gi, Lhoqlhai Poì lai jáng sheq, mingbyû wui hí má jéyáng râ ga myit tô é yanmai, yhang lé chyup yu é htâng má, htóng má lhùng to mù, yhang lé zúng râ matú, gye myi yuq yuq kut myi hpúng lé ap tô ri.

⁵ Haû mù, Petruq gi, htóng má lúng tô ri; hpúng byû wuì kúm gi, yhang é matú Garai Gasâng chyáng kyû gyai chôm dung byi nyi akô nghut ri.

⁶ Petruq gi, Herut eq yhang lé jéyáng râ matú she htoq yû râ hî myìn lé, shamtoq-tui í hkat eq tuí é huì luî, gyezo í yuq é gyoro má yhup myhî tô ri; zúng é bang le htóng hkum má zúng nyi bum akô.⁷ Haú hkûn, Yhumsing é maumang lagyo rayuq lé htoq shit mù, gok haû má duqbó lo ri. Maumang lagyo haû gi, Petruq é namcham má é hpuk kat mù, "Myap toq wú aq." ga nhaû ri; haú

hkûn, Petruq é loq mâ é toqjâng tui pé le gyut gyó ló bê nghut ri.

⁸ Maumang dum taí é gi, "Hpyihit hit mù, hkyî-tsung tsung aq." gâ ri; Petruq le taí é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum taí ri. ⁹ Haú hkûn, yhang gi, htóng mai yhâng htâng châng htoq ló ri; nghut kôlháng, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri. ¹⁰ Ahkuî, yhangnhik gi, zúng tô é jowò í wô lai mù, wà má htoq é shamtoq hkum má jé jáng, hkum haú le yhang baú bóng lô mù, yhangnhik htoq luí, wà hkyô rahkat má sô ló le, maumang lagyo gi, haú hkûn jáng, yhâng chyáng mai gâng ló byuq bê nghut ri.

¹¹ Ahkuî, Petruq gi, dum bûn gyîng lò jáng, "Yhumsîng gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tô é hkyô banshoq mai, ngo lé hkyi yù bê nghut é lé, ahkuî ngò gè gè sé bê." ga taí ri.

¹² Haú hkyô lé myit sê kat jáng, yhang gi, byù myo myo zing mù, kyûdûng nyi é jowò, Markuq gâ é Yohan é yhângnu Mariq é yhûm má jé ló ri. ¹³ Haú mù, yhang gi, yhûm wàng hkum lé ló bat é hkûn, Roda gâ é dui-nhâng zoshâng myiwe zo rayuq gi, gyô wú râ ga htoq lé lo ri. ¹⁴ Yhang gi, Petruq é htê nghut é lé sê gyô kat jáng, lûm gabú luí hkum a hpóng byi shí é za, yhúmhkaú shut din wang ló mù, "Petruq gi, hkum mhó lut má lo yap tô ri." ga ló taí kyô ri.

¹⁵ Yhangmoq kúm gi, "Nàng na bê nghut ri." ga yhang lé taí akô. Yhang gi, gè gè nghut ri ga ru

taî nyi ri. Dum, yhangmoq gi, "Yhâng é maumang lagyo nghut âng ri." ga taî akô.

¹⁶ Nghut kôlhang, Petruq gi, hkum ru bat nyî mù, yhangmoq hpông kat é hkûn, yhang lé myàng kôjáng, chôm maú byuq bum akô. ¹⁷ Yhang gi, yhangmoq lé zim za nyî keq ga loq lik shit mù, yhang lé Yhumsing èq htóng mai hkâsu kut shuí htoq yu é hkyô lé taî kyo luî, "Shí hkyô lé Yakuq eq gumang wui lé taî kyô kat keq." ga taî ri. Hau htâng, yhang htoq ló luî, jowò gó shut e ló bê nghut ri.

¹⁸ Ahkuî, maubó jáng, gyezô pé gi, Petruq haî dut byuq é hkyô lé a sé kô é yanmai, gyai maú gabyông bum akô. ¹⁹ Herut kúm gi, Petruq lé ho wú le a myàng jáng, zúng é bang lé myî gôn wú mù, yhangmoq lé sat pyám râ matú hkunmó hkyô ri.

Herut Hkohkâm Shi Byuq É Hkyô

Hau htâng, yhang gi, Yuda mau mai Kesare wà mó má gyó ló mù ló nyi nyi ri. ²⁰ Haú gyoro má, Herut hkohkâm gi, Turuq eq Sidun byu pé lé gyai nhik-yô nyi ri. Haú mù luî, yhangmoq gi, myit rahkat zâ èq yhâng chyáng ê mù, Blastu gâ é, hkohkâm wa lum tô é suwún hpó lé ê lûm hkaû mù, simsaq hkyô ê dúng akô. Hkâsu mù gâ le, yhangmoq é zoshuq wó râ matú gi, Herut é ming lé lùm hkaû nyî kô é yanmai nghut ri.

²¹ Haú hkûn, ding lhûm tô é buinyî má, Herut gi, hkohkâm hking wut chûng mù, hkohkâm tanghkuq má zúng luî, yhangmoq lé hkohkâm mungdang byî ri. ²² Haú jáng, mingbyû wui gi, "Htê shî gi, waxâng byu é htê a nghut, garai wá é htê sheq nghut ri." ga garû bum akô. ²³ Radá dâm,

Herut gi, Garai Gasâng é hpungwup shingkang lé a tê byí é yanmai, Yhumsing é maumang lagyo gi, yhang lé dàm byi luí, yhang gi, luq èq hkê é hui mù, shi byuq bê nghut ri.

²⁴ Haû Garai Gasâng é mungdang gi, sê é bang myô jat lò mù, je riyhang byo myín lô bê nghut ri.

²⁵ Barnaba eq Sholuq nhik gi, Yerusalem wà mó má yhangnhik saî tûm nyi é muzó ban saí jáng, Markuq gâ é Yohan lé shuí chûng mù, Antioku wà mó shut taû ló bekô nghut ri.

13

Barnaba Eq Sholuq, Hkyin Nhang Kat Huí É Hkyô

¹ Ahkuí, Antioku wà mó má é noqkuq hpúng má, myiqhtoí pé eq sará pé le lom nyi akô. Haú bang gi, Barnaba, Niger* gâ é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akô. ² Yhangmoq gi, zoshuq gám luí Yhumsîng lé noqkuq dojaú nyi é hkûn, Chyoiyúng Woi-nyí gi, "Ngá é mû wùn waq râ matú ji tô é Barnaba eq Sholuq nhik lé, hkyin to keq." ga taí ri. ³ Haû mù luí, yhangmoq gi, zoshuq gám luí kyûdung mù, yhangnhik ahtoq má loq ke byi kô é htâng, yhangnhik lé nhang htoq kat akô nghut ri.

Kupru Zinlóng Má Dut É Hkyô

⁴ Haû mù, yhangnhik gi, Chyoiyúng Woi-nyí èq nhang kat é eq rajung za, Seluki wà shut gyó ló mù, haû má é lhai ji luí, Kupru zinlóng má jé ló luí, ⁵ Salami wà mó má nyi nyi é hkûn, Yudaq byu pé é

* **13:1** Grik dong Niger gâ é gi, byù noq gâ é nghut lhê.

tarajong pé má, Garai Gasâng é mungdang hko kyô akô. Markuq gâ é Yohan le yhangnhik lé htuqluq htuqbang kut nyi ri.

⁶ Yhangmoq gi, haû zinlóng mai laî byit e ló mù Pahpu wà mó jé ló kô é hkûn, myiqhtoi pyoq nghut sù Bara-Yesuq gâ é Yudaq byù myoqheq sará rayuq eq htûng hui akô. ⁷ Haú yuq gi, Sergi Poluq gâ é, myit hpaqchyî kûng é ginwáng zau hpó é byù rayuq nghut lhê. Minggyî hpó haû gi, Garai Gasâng é mungdang gyô yù naù mù, Barnaba eq Sholuq nhik lé ji yu ri. ⁸ Haú hkûn, myoqheq sará gâ é lichyúm dông myhîng é Eluma le gâ é Bara-Yesuq kúm gi, ginwáng zau hpó lé haû lumjîng hkyô má a jau ló nhâng nau é nghut mù luî, yhangnhik lé lhom he tang pyâm ri. ⁹ Haú hkûn, Poluq le gâ é Sholuq gi, Chyoiyúng Woi-nyí byíng mù, yhang lé wú tsuq to luî, ¹⁰ "Myit goí é hkyô eq hpuq lô lhik é hkyô banshoq byíng tô é, nat é yhangzo nghut sù, tengmán hkyô hkangmó é gye hpó ê, Yhumsing é tengmán hkyô lé a lhoq hpyoq é a wó nyî lhú? ¹¹ Ahkuî, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq râ nghut lhê." ga tâ ri.

Haú hkûn jáng, yhâng é myoq gi, myhî-myhà ga luî mauchut tuq dut lò byuq ri; haû mù, yhang lé shê râ byù ho sop lhîng wún ri. ¹² Haú hkyô lé ginwáng zau hpó myàng jáng, Yhumsîng eq sêng é mhooqshit é hkyô lé wú maú luî lumjîng bê nghut ri.

Antioku Wà Mó Má Dut É Hkyô

¹³ Hau htâng, Poluq eq yhâng luzúm wuî gi, Pahpu wà mó mai lhaî ji mù, Pamhpuli mau mâ

é Perga wà má jé ló akô. Markuq gâ é Yohan kúm gi, yhangmoq eq gang luî, Yerusalem wà mó shut taû lú byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mâ é Antioku wà mó má jé ló akô. Bánno buinyì má, yhangmoq gi, tarajong má wang zung tô akô. ¹⁵ Haú hkûn, Mosheq é tarâ laiká eq myiqhtoi laiká pé lé ban nghap jáng, tarajong má up bang gi, "Gumang wuì ê, mingbyû wuì lé myit wum byi dang joq kô é nghut le gi, ahkuí taí lo keq." ga luî, yhangmoq chyáng taí nhang kat ri.

¹⁶ Haú hkûn, Poluq gi, toq yap mù, zîm byuq kó sháng gaq ga loq tû luî, "Israelaq byu pé eq Garai Gasang lé gyuq hkunggâ é byu pé ê, chôm gyô yù keq. ¹⁷ Israelaq byu pé é Garai Gasang gi, ngamoq é îchyí îkê pé lé hkyin yù bê nghut mù luî, Egotuq ming má byùbîng dut nyi to ashî hkûn, yhangmoq lé kô myhâng nhâng mù, hpungwup a-tsam bo é loq èq haú mau mai shuî htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming mâ é byuhú nyhit hú lé lhoq htên pyám luî, haú bâng é mingdán mâ é silí wunlí yhangmoq lé gàm byî ri. Haú gi, myi shô ngo xê zàn kô myáng ri.

²⁰ Hau htâng má, Garai Gasang gi, myiqhtoi Samuelaq é pyat jé shoq tarâ agyì pé lé to byî ri. ²¹ Hau htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamyin amyû mâ é, Kisha é yhangzo Sholuq lé byi luî, yhang gi, myi xê zàn up bê nghut ri. ²² Hau htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô

lé Yhang saksé hkâm é gi, 'Ngò nhik dik é Yese é yhangzo Dawiq lé myàng bê; yhang gi, ngò kut nhang é hkyô banshoq lé kut râ nghut lhê.' gâ ri.

²³ Garai Gasang gi, Yhâng é danggidiq joq é eq rajung za, Israelaq byu pê é matú, haú yuq é awut ashín mai, hkyi yù Sû Yesuq lé, pô htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhing hkyô eq sêng é bapisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tô akô lú? Ngò gi, haú yuq a nghut, wú keq, ngá é htâng má rayuq jé râ nghut lhê, haú yuq é hkyî-tsung tui hpyí râ lhang ngò a gíng.' ga tái ri.

²⁶ Abraham é yhangzo yhangshû pé eq Garai Gasang lé gyuq hkunggâ é tûngbàu, gumang wui ê, shî hkyi yù hkyô mungdang lé, nga-nhông chyáng byi kat bê nghut ri. ²⁷ Yerusalem wà mó mâ é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyì hkangmó nghap é myiqhtoî pê é dang lé le, a sê gyo kô é yanmai, Yesuq lé sat râ doqdân é hkûn, myiqhtoî pê é dang lé lhoq dik pyám bekô nghut ri. ²⁸ Yhâng chyáng shî gíng é mara a myàng kôlhang, Yhang lé sat pyám nhâng râ matú, Pilat chyáng dúng akô. ²⁹ Yhangmoq gi, yhang eq séng luí, kê to má kê to ban lhoq dik kêjáng, Yhang lé tapzîng mai yu hkyó mù, lup má kat tô akô nghut ri. ³⁰ Garai Gasang kúm gi, Yhang lé shi é mai lhoq dui toq yû bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhâng htâng châng é bâng chyáng buinyì tsómra myáng shoq htoq shit shit kut ri. Haú

bang gi, ahkuî, nga-nhúng Israelaq byu pê é hí má, Yhâng é saksé dut bekô nghut ri.

³² Haû mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê. '✧

ga luî, kê tô é eq rajung za, ³³ Garai Gasang gi, íchýí íwâ pé lé byi tô é danggidiq lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê. ³⁴ Hau htoq agó, Yhang htên byoq é hkâ-nhám a hui shoq, shi é mai lhoq dui toq yû râ hkyô eq séng luî, Garai Gasang taí é gi,

'Dawiq lé byí tô é danggidiq eq rajung za, chy-oiyúng é eq lungíng é jeju lé, ngò nungmoq lé byi râ nghut lhê. '✧

gâ ri. ³⁵ Hkya-on Kungtôn Laiká gó wô má le, 'Náng é Chyoiyúng Sû lé, Nàng htên byoq nhâng nau râ a nghut. '✧

ga taí tô ri.

³⁶ Ahkuî, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq luî, íchýí íwâ pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq huí é a nghut.

³⁸ Haû nghut é yanmai, gumang wuî ê, haú yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tarâ èq mara hkyut san byí é

✧ 13:32 Hkya-on 2:7 ✧ 13:34 Esai 55:3 ✧ 13:35 Hkya-on 16:10

a hui kôlhang, haú yuq lé lumjǐng é bang gi, hkyô
lhumjup má mara hkyut san byî é hui râ nghut lhê.

⁴⁰ Hau é yanmai,

'Wú keq, jihpoî é bang ê, maú mù luî htum byuq
keq;

nungmoq é buinyì pé má ngò rajung jung kut htoq
râ nghut lhê;

⁴¹ haú hkyô lé, rayuq yuq, nungmoq lé hkaî kyo
kôlhang, jǐng kó râ a nghut.'☆

ga luî, myiqhtoî pé taî é dang, nungmoq má a ang
sháng gaq, sidiq nyì keq." ga hko kyô nyi ri.

⁴² Ahkuî, Poluq eq Barnaba nhik tarajong mai
htoq ló le, htâng lhê é Bánno buinyì má le, haú pé
lé dum hkaî kyo râ matú yhangmoq chôm dǔng
akô. ⁴³ Chôm byo htoq ló kô é hkûn, Yudaq byu pé
eq Yudaq noqkuq htǔng má lhing wang lo é tarâ
hkunggâ é byù myo myo gi, yhangnhik é htâng má
châng bùm kô é nghut mù luî, Garai Gasâng jeju má
gǐng nyì râ matú, yhangnhik gi, yhangmoq lé lhoq
pun lhoq kyǐng akô nghut ri.

Tǔngbau Pé Chyang Lhing Lo É Hkyô

⁴⁴ Hau htang lhê é Bánno buinyì má, Garai
Gasâng é mungdang gyô yù râ matú, rawa bang
aluq shoî banshoq, lé zup zǐng to bum akô.

⁴⁵ Yudaq byu pé kúm gi, byù moq mó haú lé myàng
jáng, manon myit bau byǐng bùm kômù luî, Poluq
taî é dang lé taî htǔng é eq nhǐng pyâm akô.

⁴⁶ Poluq eq Barnaba le gyuq myit a bo é dǔng taî
é gi, "Garai Gasâng é mungdang lé, nungmoq lé hí
taî kyo râ dut é yanmai, ngá-nhik taî bê nghut lhê.
Nghut kôlhang, nungmoq gi, haú lé lhom he-ngik

☆ 13:41 Hbk 1:5

pyám kômù, ahtum abyuq é asak eq gingdán é dông yhumsing gùng lé a myit yù kô é yanmai, wú keq, ahkuî, ngá-nhik gi, tûngbaù pé shut lhing ló berá nghut lhê. ⁴⁷ Hkâsu mù gâ le, haû Yhumsing gi, 'Hkyi yù hkyô lé maumyî htum shoq wó chûng jé râ matú, Ngò, nàng lé tûngbaù pé é maubó dut nhâng bê.'[✧]

ga luî, ngamoq lé hkunmó hkyó kat bê." gâ ri.

⁴⁸ Tûngbaù pé gi, dang haû lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó râ matú hkyin to huî é lhunghâng bang le, lumjín bum akô nghut ri.

⁴⁹ Yhumsing é mungdang gi, haú ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wuî mâ é tarâ hkungga bang eq, haú wà mâ é suwún wuî lé, nhik lhoq yo kôluî, yhangnhik lé maukyo mai chôm hkat htoq pyâm akô.

⁵¹ Yhangnhik gi, yhangmoq lé a nau é hkyô tûn shit é dông, yhumsing é hkyî mâ é hpuilhaû lé yhangmoq chyáng ko hkyô pyâm to kômù, Ikoni wà mó shut ló byuq bekô nghut ri. ⁵² Chángzô pé kúm gi, gabú é htoq agó, Chyoiyúng Woi-nyí byíng nyi bum akô nghut ri.

14

Poluq Eq Barnaba Nhik, Ikoni Wà Mó Má Ló Jé É Hkûn Lhê Hkyô

¹ Ahkuî, Ikoni wà mó má nghut nyi é hkûn, Poluq eq Barnaba nhik gi, Yudaq byu pé é tarajong má

✧ 13:47 Esai 49:6

rahá wàng mù, Yudaq byù eq tûngbaù pé ajùm ayò lumjǐng bùm kó shoq, wum kat hko kyô akô. ² Nghut kôlhang, a lumjǐng é Yudaq byu pé gi, lumjǐng é gumang wui lé a ngui râ đông tûngbaù pé lé mhoq hpyoq yû mù, shuî gumlaû akô. ³ Haù mù luî, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akô; Yhang Yhumsing le yhangnhik é loq mai limik kumlhá eq mauhpo muzó dut nhang é đông, Yhâng é jeju mungdang lé saksé hkám byî nyi ri. ⁴ Haù wâ mâ é bang kúm gi, myit byo ló bûm kô é nghut mù luî, Yudaq byu pé chyáng ra-am, lagyo pé chyáng ra-am, lom byuq ló akô. ⁵ Ahkuî, tûngbaù pé le, Yudaq byù eq yhangmoq é uphkâng bang le, yhangnhik lé rhoi mù luqgok èq dú sat râ ga htím lo bum akô. ⁶ Nghut kôlhang, yhangnhik gi, haù hkyô lé bûn sê kat kôjáng, Lukaoni ginwáng mâ é Lustra eq Derbe wà mó eq, hau é awui ayàm wà tiq wà zo pé shut h pang e ló akô. ⁷ Haù pé má le, gabú danglù xoq hko kyô wún akô nghut ri.

Lustra Wà Mó Má Ló Jé É Hkûn Lhê Hkyô

⁸ Ahkuî, Lustra wà mó má, înu unghkaû mai hkyî hten mù luî, hkâ-nhám le hkyô a wó sô wú é sù rayuq zung tô ri. ⁹ Yhang le Poluq taî é dang lé gyô nyi ri. Poluq gi, haù yuq lé wú tsuq kat é hkûn, wó lhoq gê byi hui râ nghut lhê gâ é lumjǐng myit yhâng chyáng bo tô é lé, myàng byî ri. ¹⁰ Haù mù, Poluq gi, "Toq yap aq!" ga luî, htê mó èq yhang lé taî kat jáng, yhang gi, byam toq kat mù, wó so bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang đông,

"Nat hparà pé gi, byù gùng dông kut luí ngamoq chyáng gyó lô bekô nghut ri." ga luí, wut garu bum akô. ¹² Hau htâng, Poluq gi, dang myô tái sù nghut é yanmai, yhang lé Herme ga, Barnaba lé gi, Zeu ga myhíng byi akô. ¹³ Haú wà yàm mâ é Zeu hparà noqkuq yhúm hkyangjong hpó gi, wà hkum má nohtó pé eq ban hkóng pé yu lé mù, shiwa byu pé eq rahá yhangnhik lé hkungga nhông byi rá hen akô.

¹⁴ Nghut kôlhang, lagyo nhik Barnaba eq Poluq gi, haú lé wó gyo kôjáng, yhumsing é mebu lâng cheq pyám kôluí, shiwa hpong gung gùng shut din wang é kômù, garú tái kô é gi, ¹⁵ "Hkaú pé ê, haí mù haú su kut lo akô lú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tô pyâm to mù, mauhkúng eq myigùng, wuìshuq lung-aú eq haú pé má nyi mi-nyì, joq mijoq lé hpan to sù, rú dui nyi é Garai Gasâng chyáng lhing wang lò kó sháng gaq ngú luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byù myú chângjup lé hí hpyang lhê é pyat bán má ó le ó kâm é dông kut nhâng bê nghut ri. ¹⁷ Nghut kôlhang, Yhang gi, mauhkúng mai mau wô nhâng luí, kyôshi zui nhang é ahkyíng yam-yoq byi mù, nungmoq lé zoshuq agùn agó byi é eq, nungmoq lé i-myt ngón nhang nyi é dông, Yhang ge é hkyô lé tân shit mù, Yhang nyi é hkyô lé saksé hkâm nyi ri." ga akô. ¹⁸ Haú su ga tái kô le lhang, yhangnhik lé shiwa byu pé mai hkungga nhông byi rá hkyô lé, yhangnhik gi, gyai wuihke luí sheq wó hkúm pyâm akô nghut ri.

¹⁹ Hau htâng, Antioku wà mó eq Ikoni wà mó pé

mâ é Yudaq byu pé ra-am lé jé kômù, shiwa byu pé lé shuî-u luî, Poluq lé luqgok èq chôm dú kômù, yhang lé shi byuq bê su ngàm kô é yanmai, wà shinggan shut shê hkyut htoq pyâm akô. ²⁰ Nghut kôlhang, Poluq gi, yhâng é lhîngkyuq má chángzô pé yap tô kô é hkûn, toq mù wà shut tau wang lô ri. Hau htang nyí, yhang gi, Barnaba eq rahá Derbe wà mó shut e lô bekô nghut ri.

Antioku Wà Mó Má Taû Jé Lô É Hkyô

²¹ Haú wâ má yhangnhik èq gabú danglù hkô kyo kô é yanmai, byù myo myo gi, chángzô pé dut lo akô. Hau htâng, yhangnhik gi, Lustra, Ikoni, Antioku wà mó hkyô dum taû lô kômù, ²² chángzô pé lé myit lhoq ging byi uchyang, haû lumjîng hkyô má ru gîng nyí râ matú myit wum byî akô. "Nganhúng gi, Garai Gasâng é mingdán má wàng râ matú, wuîhke jamjau myo myo hui ra râ nghut lhê." ga le, mhoqshít akô. ²³ Yhangnhik gi, noqkuq hpúng hkangmó má, hpúng suwún kut râ bang lé hkyin yù mù, zoshuq gám luî kyûdung mù, yhangmoq lumjîng nyí é Yhumsîng Garaî chyáng ap byi tô akô. ²⁴ Hau htâng, yhangnhik gi, Pesidi ginwáng mai laî byit lô mù, Pamhpuli ginwáng má jé lô akô nghut ri. ²⁵ Haú ginwáng mã é Perga wà mó má mungdang hko kyo luî, Atali wà mó shut laî gyó lô akô nghut ri.

²⁶ Haû mai, lhaî ji mù, ahkuî yhangnhik wùn waq laî lô bê muzó é matú, Garaî Gasâng jeju má ap luî yhangnhik lé nhang kat é Antioku wà mó má dum jé lò bekô nghut ri. ²⁷ Jé lo é hkûn, yhangnhik gi, hpúng byû wuî lé wut tsîng yù mù, yhangnhik dông mai Garaî Gasang kut é hkyô banshoq lé le,

tûngbaù pé lé haù lumjîng hkyô hkum hpóng byî é hkyô lé le, shit kyô akô. ²⁸ Haù mù, yhangnhik gi, haù wâ má chángzô pé eq tsómra myang shoq nyi nyi akô nghut ri.

15

Ahpyo-kuq Hpyit Hkyô Eq Sêng É Manghkáng

¹ Ahkuî, Yuda mau mâ é byù ra-am gi, Antioku wà mó má lé jé mù, gumang wuì lé, "Nungmoq gi, Mosheq é htûngtarâ eq rajung za, ahpyo-kuq a hpyit é nghut jáng, hkyi yu é hui râ a nghut." ga luî, mhogshit bum akô. ² Hau é yanmai, myit a huì lhûm é hkyô htoq lô mù, Poluq eq Barnaba nhik gi, haù bang eq gyai yhang myîng myô lhûm akô; haù mù luî, gumang wuì gi, Yerusalem wà mó má nyi é lagyô pé eq suwún wui chyáng, haù hkyô lé ló hpyê lhum râ matú, Poluq, Barnaba nhik eq rahá, yhangmoq chyáng mâ é ra-am lé, nhang kat râ ga hkyin tô akô. ³ Haù mù, hpúng byû wuì yhangmoq lé dé kat kôjáng, yhangmoq gi, Hpinisi mau eq Samariq mau gyoro mai sô lai ló uchyang, tûngbaù pé lhing wang lò bê hkyô lé tai kyô akô. Haù mâ é gumang wuì lé gyai yhang gabú nhang akô nghut ri. ⁴ Yhangmoq, Yerusalem wà mó má jé kô é hkûn, hpúng byû wuì, lagyô pé eq suwún wuì gi, yhangmoq lé lhom hkûlum yù kô é nghut mù luî, yhangmoq gi, yhangmoq dông mai Garai Gasang kut é hkyô lhungháng lé, haù bang lé shit kyô akô.

⁵ Haù hkûn, Hparishe hpúng mâ é lumjîng bang ra-am gi, toq mù luî, "Tûngbaù pé lé, ahpyo-kuq

hpyit nhâng râ eq, Mosheq é tarâ dông cháng nhâng râ gi, ra yhang râ lê." ga taí bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuí, lagyô pé eq hpúng suwún wuì gi, shí hkyô lé chôm myit wú râ ga, zup tô bum akô. ⁷ Shí hkyô lé gyai yhang dang rhâng lhum bùm kô é htâng má, Petruq gi, toq mù luí, "Gumang wuì ê, Garai Gasang gi, ngá nhut mai taí é, haú gabú danglù lé, tûngbaù pé gyô yù mù lumjúng kó sháng gaq ga, hí hkún nungmoq chyáng mai ngo lé hkyin yù bê hkyô lé, nungmoq sé lugù nghut bê. ⁸ Haú mù, myit nhiklhum lé sé byi sù Garai Gasang gi, nga-nhúng lé byí é eq rajung za, yhangmoq lé le Chyoiyúng Woi-nyí byí é dông, yhangmoq lé hap yù bê hkyô lé saksé tûn shit bê nghut ri. ⁹ Garai Gasang gi, yhangmoq lumjúng luí, yhangmoq é myit nhiklhum lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri. ¹⁰ Haú nghut le gi, íchý íwâ pê èq le, nga-nhúng èq le a ung é wòlai lé, haú chángzô pê é lingzing má ke byí é dông mai, haí mù, ahkuí Garai Gasang lé chyam wú nyi akô lú? ¹¹ Nghut kôhang, ngamoq gi, yhangmoq eq rajung za, Yhumsing Yesuq é jeju mai za hkyi yu é huí é hkyô lé lumjúng é bang nghut lê." ga luí, yhangmoq lé taí ri.

¹² Haú hkún, zup míng tô é bang lhunglhang gi, zim za kut luí, Barnaba eq Poluq nhik mai, tûngbaù pê chyáng, Garai Gasang èq yhangnhik é loq dông limik kumlhá pé eq mauhpo muzó pé kut shit é hkyô, taí kyô nyi é lé chôm gyô nyi akô. ¹³ Yhangnhik dang ban taí kôjáng, Yakuq gi,

"Gumang wuê ê, ngá dang lé gyô wú keq. ¹⁴ Garai Gasang gi, tungbaù pê chyáng mai Yhâng mying é matú byù ra-myû hkyin yù râ ga, yhangmoq lé sâng-hi mai hkâsu kut lé kûm nyi é hkyô lé, Simun taí kyo bê nghut ri. ¹⁵⁻¹⁶ Shí hkyô gi,

'Hau é htâng má gi, ngò dum taù lò mù luí, lêng gyop byuq bê Dawiq é yhûm* lé dum saí râ nghut lhê.

Haù byoq htên tô é pé lé saí saí mù, haù lé dum lhoq toq râ nghut lhê.

¹⁷ Haù hkûn sheq, ngá myîng mai ji yu é tungbaù pé eq, myit gyo tô é byù lhunglhâng bang gi, Yhumsîng Garai lé hô kó râ nghut lhê ga,

¹⁸ a-nham mau htoq xâng hkun mai, shí hkyô pé lé sé nhang é Yhumsîng Garai taí ri.*

ga myiqhtoí pé kê tô é dang eq rajung za nghut ri. ¹⁹ Haù mù luí, ngò taí nau é gi, tungbaù pê chyáng mai Garai Gasâng shut lhing lo é bang lé, gotú haí le a lhoq wuê é za, ²⁰ hparà lhô pé lé kyáng byî é a sansêng é zoshuq pé lé le, ashop é dông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám râ matú za, yhangmoq lé, nga-nhúng laiká mai wó shit kat lhê. ²¹ Hkâsu mù gâ le, gó hkûn mai yhang, Mosheq é tarâ lé wà hkangmó má hko kyô ló kômù, Bánno buinyi hkangmó tarajong pé má nghap kyo kyo kut bûm kê é nghut lhê." ga taí ri.

Lumjîng É Tungbaù Pê Chyáng Hun Kat É Laiká

* **15:15-16** Dawiq é yhûm gâ é gi, Dawiq eq yhâng é awut ashin pé up é hkyô lé gâ é nghut lhê. ✧ **15:18** Amo 9:11-12

²² Haú hkûn, lagyô pé, suwún wuî eq, hpúng byû wuî lunglhâng bang gi, Poluq, Barnaba nhik eq rahá Antioku wà mó shut nhang kat râ byù lé, yhangmoq chyáng mai hkyin yù râ matú chôm myit hpyit akô. Haú eq rajung za, yhangmoq gi, gumang wui chyáng mâ é nhik bô suwún nhik Barsabaq gâ é Yudaq eq Sila lé hkyin yu akô nghut ri. ²³ Yhangnhik é loq má, hun kat kô é laiká gi,

"Antioku wà mó, Suriq mau eq Kiliki mau pé má nyi é, tûngbaù gumang wuî ê, nungmoq é gumang wuî nghut é, ngamoq lagyô pé eq suwún wuî gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng eq lhoq byok pyám luî, nungmoq é myit lé lhoq nhúng byi nyi é hkyô lé, ngamoq wó gyo bê. ²⁵ Haú mù, ngamoq lunglhâng bang gi, byù ra-am lé hkyin yù mù, ²⁶ nga-nhúng é Yhumsíng Yesuq Hkrisduq é matú, yhumsing asak lé lháng a há é nga-nhúng chyitdap é Barnaba, Poluq nhik eq rahá, nungmoq chyáng nhang kat râ matú chôm myit hui bê. ²⁷ Haú mù luî, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang tai kyo kó râ nghut lhê. ²⁸ Nungmoq é matú gi, hparà ló pé lé tîng byi é zoshuq eq sui, lingzing mai myhik sat é dusak sho eq ashop é dông gungsho zùm yap é hkyô pé lé, koi pyám râ hkyô mai lai luî, gotû wòwùn hûn râ hkyô a joq nghû luî, Chyoiyúng Woi-nyí le, ngamoq le, myit huî to bê. ²⁹ Nungmoq haú pé lé koi pyâm nyi kôjáng gi, gè râ nghut lhê.

Nguingón wángzán nyî kó sháng gaq ô!" ga kâ tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyó jé lô kômù, hpúng byû wùi lé ji tsíng to kôluí, haú hún kat é laiká lé ap byî akô nghut ri. ³¹ Hpúng byû wùi gi, laiká haú lé ban nghap kôjáng, wum-o byî é danglù hau é yanmai, gabú nyi bum akô. ³² Yudaq eq Sila gi, myiqhtôî nhik le nghut kômù luí, gumang wùi lé mungdang myo myô eq lhoq pun lhoq kying kômù, wum-o lhoq gíng to byî akô. ³³ Rayoq zo haú má nyi nyî kô é htâng má, gumang wùi gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. ³⁴ (Sila kúm gi, yhang ô nau é dông nyi gyó tô ri.)† ³⁵ Poluq eq Barnaba kúm gi, Antioku wà mó má nyi gyó to kômù, Yhumsíng Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyì tsómra myáng jáng, Poluq gi, Barnaba lé, "Yhumsing é mungdang hko kyô láí lo wú bê, wà hkyap hkgámó mâ é gumang wui chyáng taú lò luí, yhangmoq hkâsu dut nyi é hkyô lé, ló dum kúm wú lo goq." ga taí ri. ³⁷ Barnaba gi, Markuq gâ é Yohan lé le shuí chùng nau ri. ³⁸ Nghut kôlhang, Poluq gi, haú yuq lé a kâm shuí chùng nau nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzó a kâm xoq zui nau é sù nghut é yanmai nghut ri. ³⁹ Hau é yanmai,

† 15:34 Bun zo shí lhum gi, Grik Chyúmlaiká myo myo má a bò nghut lhê.

yhangnhik gi, gyai yhang taî shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chûng luî, lhaî ji mù Kupru zinlóng shut e ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui èq yhang lé Yhumsîng Garaî é jeju má ap kat kô é htâng má, yhangnhik gi, htoq e ló byuq bekô. ⁴¹ Haú mù, Poluq gi, Suriq mau eq Kiliki mau mai sô laî ló uchyang, haú mâ é noqkuq hpûng pé lé wum-o lhoq ging byî wún bê nghut ri.

16

Poluq Eq Sila Nhik Chyang Timohti Châng É Hkyô

¹ Poluq gi, Derbe wà mó má jé é htâng, Lustra wà mó má dum jé ri. Haú wà má, Timohti gâ é chángzo rayuq nyi ri. Yhâng nu gi, Yesuq lé lumjîng é Yudaq myiwe myhí nghut ri; yhâng wa kúm gi, Grik amyû nghut ri. ² Timohti gi, Lustra wà mó eq Ikoni wà mó má nyi é gumang wui èq hkya-ôn é hui sù nghut ri. ³ Poluq gi, hkyowui má yhang lé shuí chûng naù mù luî, ahpyo-kuq hpyit byî ri. Hkâsu mù gâ le, yhâng wa gi, Grik nghut é hkyô lé haú mâ é Yudaq byu pé lhunghâng bang sé kômù, haú bang lé myit tê byî é yanmai nghut ri. ⁴ Haú mù, yhangmoq gi, rawa htâng rawà mai laî ló uchyang, Yerusalem wà mó mâ é lagyô pé eq hpúng suwún wui, chôm myit hpyit tô é hkyô lé, châng kó sháng gaq ga, yhangmoq lé taî kyô akô. ⁵ Haú mù luî, hpúng byû wui gi, lumjîng hkyô má wum-o bo lò kômù, ra-nyí èq ra-nyí byù du myô jat lo nyi ri.

Makedoni Byù Rayuq Lé, Poluq Shing-rán Myang É Hkyô

⁶ Ahkuî, yhangmoq gi, Asia mau má mungdang ê hko kyo râ hkyô lé Chyoiyúng Woi-nyí èq yhangmoq lé hkûm pyâm é yanmai, Hprugi mau eq Galatiq mau đông sô lai lô mù, ⁷ Musi mau kyo má jé lô kêjáng, Bihtuni mau shut wang lô râ dâ akô; nghut kêlhang, Yesuq é Woi-nyí gi, yhangmoq lé ahkáng a byi nghut ri. ⁸ Haû mù, yhangmoq gi, Musi mau mai sô lai lô luî, Troa myuq má gyó jé lô akô. ⁹ Haû má, myín lé, Poluq gi, Makedoni byù rayuq lé yap to mù, "Makedoni mau shut dap lé luî, ngamoq lé le garúm yû laq." ga luî, yhang lé dung wut nyi é shing-rán myang ri. ¹⁰ Shing-rán haû lé Poluq myang é eq, Makedoni byu pé lé gabú danglù hko kyo râ matú, ngamoq lé Garai Gasang wut yù bê nghut ri nghû myit yù luî, haú hkûn yhang, ngamoq gi, Makedoni mau shut dap ê râ matú rì rì kut lô bê nghut lhê.

Ludia Gâ É Myiwe Myhí Hpúng Byû Dut Lo É Hkyô

¹¹ Haû mù luî, ngamoq gi, Troa myuq mai Samohtake zinlóng ang ang shut lhai ji ê mù luî, htang nyí gi, Neapoli và má jé bê nghut lhê. ¹² Haû mai lai jáng, Makedoni mau má, Romaq byu pé xuq tô é, haú ginwáng mâ é ahkyak và mó nghut é, Hpilipi myuq má ngamoq jé mù, haú má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyûdung jowò joq nhô ngam mù, và hkum shinggan mâ é, wuilàng yàm shut htoq ê luî, haú má zing to lánng é myiwe wuì lé, zung gyó mù nyo hi é nghut lhê. ¹⁴ Haû dang gyo nyi é bang má, Garai Gasang lé noqkuq é, Htuatira myuq byû, pán nê ung zo sù

Ludia gâ é myiwe myhí rayuq bo ri; Yhumsîng Garai gi, Poluq taî kyô é hkyô lé rago gyô yù sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyù wui wui-myhup ban hkâm yù kôjáng, "Nungmoq gi, ngo lé haû Yhumsîng Yesuq má lumjîng bê sù nghut é dông, myit yù byí kô é nghut jáng, ngá yhûm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haû kyûdûng é jowò shut e ló nyi le, nat wang júng luí gumhpân hpan é jùnmyhí rayuq ngamoq lé lhom huí ri. Haû yuq gi, gumhpân hpan é dông yhâng yhumsîng wui lé ngunzè gyai yhang hô byí é sù nghut lhê. ¹⁷ Myiwe haû gi, Poluq eq ngamoq htâng má châng to mù, "Shí bang gi, nungmoq lé hkyi yù hkyô taî kyô wún é, Myhang Htâng é Garai Gasâng é dui-nhâng zoshâng wui nghut bum akô ô!" ga wut garû ri. ¹⁸ Buinyi myo myo haû su chyat châng garû wún é yanmai, Poluq gi, gyai yhang myit hpêbu byuq mù, lhing wú kat luí, nat haû lé, "Yesuq Hkrisduq é myìng lang luí ngò nang lé hkunmó hkyô kat lhê, yhâng chyáng mai htoq ló byuq aq." ga luí, nat haû lé, nhik-yô kat ri. Haû hkûn jáng, nat haû gi, yhâng chyáng mai htoq ló byuq bê nghut ri.

¹⁹ Ahkuí, myiwe hau é yhumsîng wui gi, ngunzè myàng zo râ myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gai mâ é suwún wui chyáng she hkyut e akô. ²⁰ Dum, yhangmoq gi, yhangnhik lé tarâ agyì pê chyáng shuí ê mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htunghking lé

mhoqshit byî nyi é dông, ²¹ nga-nhông é myuq lé gunjâng nyi akô nghut ri." ga taî akô.

²² Haû mù luî, shiwa byu pé gi, yhangnhik lé chôm htîm akô. Tarâ agyî pé gi, yhangnhik é mebu lé lâng hkyut pyám luî, wumchûm hkat èq bat râ matú, hkunmó hkyô kat akô. ²³ Yhangmoq gi, yhangnhik lé gyai yhang nhuq bat yu é htâng, htong má lhông kat mù, rago za wú zúng râ matú htóng suwún lé hkunmó hkyô tô akô. ²⁴ Htóng suwún hpó gi, haû sù é hkunmó lé wó jáng, yhangnhik lé hkyî kyum hut luî, htóng mâ é, je ahtê gok má lhông tô ri.

Htóng Suwún Hpó Hkyi Yù Huî É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyûdung luî, Garai Gasang lé mahkôn hkyâ-ôn nyi kô é hkûn, htóng byû góbang gi, yhangnhik é htê lé chôm gyô nyi bum akô. ²⁶ Haû hkûn, byodàn ratung layàng mó nún lô mù htóng yhûm gón le nún lô luî, hkum pé banshoq le radá dâm bóng hà lo bum ri; dum nghut jáng, yuq hkgamó mâ é toqjâng tui pé le gyut gyó byuq bê nghut ri. ²⁷ Htóng suwún hpó gi, yhup bûn lò mù, htóng hkum pé bóng hà tô bum é lé myang kat jáng, htóng byu pé ban hpang byuq bùm bekô râ nghut lhê ga myit yù luî, shâm shê mù, yhânggùng yhang sat shî râ dâ ri. ²⁸ Nghut kôlhang, Poluq gi, "Ê, náng gùng yhang náng haû su hkâkut, ngamoq banshoq shî má nyi tô lhê." ga luî, htê mó èq wut garu taî kat ri.

²⁹ Haû hkûn, yhang gi, duq é myibung lé dúng yù mù, ahkaû shut din wang lô luî, Poluq eq Sila nhik é hí má gyuq nán é eq ngóm gop tô ri. ³⁰ Hau htâng,

yang gi, yangnhik lé shuí htoq yû lui, "Sarâ nhik ê, ngò hkyi yu é hui râ matú, haí kut ra râ lú?" ga myi kat ri.

³¹ Haú hkûn, yangnhik gi, "Yhumsîng Yesuq lé lumjîng jâng, nâng eq nâng yhumbyù lunglhang bang hkyi yu é hui râ nghut lhê." ga tai akô.

³² Hau htâng, yangnhik gi, haú htóng suwún hpó eq yhang yhumbyù lunglhang lé, Yhumsing é mungdang hko kyô akô. ³³ Haú myîn haú u lé yang, htóng suwún hpó gi, yangnhik lé shuí ê mù, yangnhik é dâm pé lé tsing chí pyám byi lui, haú htâng, yang eq yhang yhumbyù banshoq bang wui-myhup hkâm yù bekô nghut ri. ³⁴ Hau htâng, yang gi, yangnhik lé, yhang é yhúmkaú má shuí wang ló mù, zoshuq hkang byi ri. Yang eq yhang yhumbyù banshoq bang gi, Garai Gasang lé wó lumjîng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jâng, tarâ agyì wui gi, "Haú nhik lé nhang pyám aq." ga, htóng suwún hpô chyáng pyata pé lé tai nhang kat akô. ³⁶ Haú hkûn, htóng suwún hpó gi, "Nungnhik lé nhang pyám aq ga, tarâ agyì wui mai byù nhang kat ri; haú mù, ahkuí, nungnhik gi, ngón za htoq ló lo keq." ga lui, Poluq lé tai ri.

³⁷ Poluq kúm gi, "Nga-nhik gi, Romaq mingdán byû sheq ru nghut le wa, myi gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôlui nhîng, ahkuí tsik za haq nhang pyám râ dâ akô nhung lhi? A wó dut, yangmoq

yhang sheq lé shuí htoq yú kó sháng gaq." ga luí, yhangmoq lé tû taí kat ri.

³⁸ Pyata pé gi, tarâ agyì wuì lé dang haú pé ló taí kyo kôjáng, tarâ agyì wuì gi, Poluq eq Sila nhik Romaq mingdán byù nghut é hkyô lé wó gyo kôjáng, gyô gyuq kôluí, ³⁹ yhangmoq yhang, yhangnhik chyáng lé mù, tôngbán luí, shuí htoq yú mù, wà haú mai htoq ló byuq râ matú chôm dúng akô. ⁴⁰ Haú mù, Poluq eq Sila nhik gi, htóng mai htoq ló é htâng, Ludia é yhûm má wang ló akô; haú má, gumang wuì eq le hui kômù, yhangmoq lé wum-o byi luí, htoq ló bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhpipoli wà mó eq Apolon wà mó mai sô laí ló mù, Htesaloni wà mó má jé akô. Haú wà má gi, Yudaq byu pé é tarajong ralhú joq ri. ² Poluq gi, yhang lhaq kut nyi é eq rajung za, tarajong má wàng luí, Bánno buinyì sum nyí yhang, Chyúmdang má bo é eq séng mù, yhangmoq eq chôm ming lhum uchyang, ³ Hkrisduq wuîhke jamjau hui mù, shí bê mai dum dui toq lô râ hkyô lé taí hkoq san kyo luí, "Nungmoq lé, ngò hko kyô nyi é haú Yesuq gi, Hkrisduq nghut lhê." ga taí ri. ⁴ Yudaq byu pé mã é ra-am gi, gyô jing kômù, Poluq eq Sila nhik chyáng lé xoq yu akô; haú eq rajung za, Garai Gasang lé hkunggâ é Grik pé myo myo eq, ahkyak é myiwe wuì tsómra myo shoq le, gyô jing kômù, lé xoq yu akô.

⁵ Nghut kôlhang, a gyô jing é Yudaq byu pé gi, manôn kôluí, gài mâ é byùngang jùm ra-am lé lung yù mù, byù moq mó tsing yù luí, rawa é shuí gabyong kômù, shiwa byu pè é hí má Poluq eq Sila nhik lé wó shuí htoq shit shoq ga, Yason é yhûm má htîm e ló akô. ⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng lêng she ê kômù, "Mingkan gón lé atau ahú kut é byù shí nhik, ahkuí shí má jé jáng, Yason gi, yhâng é yhûm má lhom hkûlum yu ri. ⁷ Yhangmoq lhunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é dông kut é bang nghut akô." ga taí garû bum akô. ⁸ Shiwa byu pé eq wà suwún wui gi, dang haú lé wó gyo kôjáng, myit wui myit hke dut nyi bum akô. ⁹ Hau htâng, yhangmoq gi, manghkáng a lhoq htoq râ matú Yason eq góbang lé danggidiq zè byi nhâng mù, nhang pyám bekô nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myîn jáng yhang, gumang wui gi, Poluq eq Sila nhik lé Beria wà mó shut nhang kat akô; yhangnhik gi, haú wà má jé jáng, Yudaq byu pè é tarajong má wang ló akô nghut ri. ¹¹ Haú Beria wà mó byu pé gi, Htesaloni wà mó byu pè htoq má je riyhang nhik bo bum akô; haú mù, danglù haú lé gyai ô nau é myit eq hap yù mù, danglù shí teng a têng é hkyô lé wó sé shoq ga, nyí wui Chyúmdang lé chôm nghap wú nyi akô nghut ri. ¹² Haú mù luí, Yudaq byu pé myo myo gi, lumjینگ bum akô, haú

eq rajung za, aróng wó é Grik myiwe wuì eq yuqgè wuì myo myo le, lumjǐng bûm bekô nghut ri.

¹³ Poluq gi, Beria wà mó má le, Garai Gasâng é mungdang hko kyô nyi é hkyô lé, Htesaloni wà mó mâ é Yudaq byu pé sé kôjáng, yhangmoq gi, haú má lé kômù, wà byù wuì lé mhoq hpyoq luì, gabyông lò nhang akô. ¹⁴ Haú hkûn, gumang wuì gi, Poluq lé wuimau yàm jé shoq, radá dâm dé kat akô; nghut kôlhang, Sila eq Timohti nhik gi, Beria wà mó má nyi gyó tô akô nghut ri. ¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló râ matú pying kat é dang lé wun chûng mù, dum taû lò bekô nghut ri.

Poluq, Ahten Myuq Má Nyi É U Lhê Hkyô

¹⁶ Ahkuì, Poluq gi, Ahten myuq má haú nhik lé lánng nyi tô é u lé, haú wâ má rawa é hparà lhô baú dut tô é lé myàng mù luì, yhâng i-myt gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggâ é Grik pé eq le, gài pé má hui mihui bang eq le, nyí wuì taì sân kyô lhûm nyi akô nghut ri. ¹⁸ Haú mù luì, Epikuri hpaqchyî eq Sto-i hpaqchyî* lé sê é, myit wú hpaqchyî bo é bang ra-am gi, yhang eq dang chyin chyin lhûm akô; haú hkûn, yhang gi, Yesuq é hkyô eq dum dui toq hkyo é gabú danglù lé hko kyô é yanmai, ra-am gi, "Byù pyok shí yuq gi, haì wá taì nyi lhê lhú?" ga; ra-am

* **17:18** Epikuri hpaqchyî gi, htang pyat a joq, ahkuì ngón yû rà za ahkyak gâ é nghut lhê. Sto-i hpaqchyî gi, haì wá dut kôlhang i-myt zim za kut mù, htang pyat matú chiq a ra gâ é nghut lhê.

gi, "Góming hparà pê é hkyô lé taí kyo sù nghut sam ri." ga, taí bum akô nghut ri. ¹⁹ Hau htâng, yhangmoq gi, Aripagu gâ é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lhu? ²⁰ Nang eq taí é maú nhô za gâ é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akô. ²¹ (Ahten byu pé eq haú má nyi é góming byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akô nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé ê, nungmoq gi, hkyô hkat hkanmó má hparà lhô pé lé gyai yhang dat gyuq hkungga kô é lé, ngò myang ri. ²³ Hkâsu mù gâ le, ngò sô lhing wún mù nungmoq jaú é ze pé lé rago wú wú lé, 'A sê é Garaí matú.', ga luí, kâ tô é hkungga gyap ralhum lé myang záng ri; haú nungmoq a sê é za jaú nyi é Garaí hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoq lé hpan tô é Garaí Gasang gi, mauhkûng eq myigùng é Yhumsîng le nghut lhê mù luí, byu loq eq saí é noqkuq yhûm má nyi râ a nghut. ²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung râ é sù lé su, byu loq eq dojaú râ sù a nghut. ²⁶ Yhang gi, gunchyung rayuq mai za byuhú chângjup myô lò nhâng mù, myidàm htoq jàm shoq má nyi nhâng luí, yhangmoq é matú hí hí mai ahkyíng yam-yoq

eq nyi râ jowò masat to byi bê nghut ri. ²⁷ Yhang gi, nga-nhúng yuq hkanmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri. ²⁸ Hkâsu mù gâ le, nungmoq é jihkyang kat bang, 'Nga-nhúng le yhâng é awut ashîn pé nghut nyi lê.' ga taí tô bum é eq rajung za, nga-nhúng gi, Yhang é yanmai wó nyi, wó dui é eq ísu wó dut é nghut lê.

²⁹ Haû mù, nga-nhúng gi, Garai Gasâng é yhangzô pé nghut nyi é yanmai, Garaî gùng gi, byu é hpaqchyî loq eq kyûng kê tô é hîng, ngùn, luqgok pé eq pûng lê nghú luî hkâ-myt yù kó. ³⁰ Laî lò bê haû myoq a bóng shi é pyat lé, Garai Gasang gi, haî le a ga lhaî pyâm to kôlhang, ahkuî gi, jowò hkanmó mâ é byù lhunglhang bang lé, myit lîng keq ga hkunmó hkyô to bê nghut ri. ³¹ Hkâsu mù gâ le, Yhang hkyin to sù mai mingkan gón lé tara é dông jéyáng râ buinyi ra-nyí masat to bê nghut ri. Shí hkyô lé, byù lhunglhang bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoî pyám byi akô; ra-am kúm gi, "Nàng shí hkyô taí é lé ngamoq dum gyô wú nau ashî." ga taí akô. ³³ Hau htâng, Poluq gi, haû zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htâng cháng kômù, lumjîng bang dut bekô nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotû byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq luí, Korinhtuq myuq má jé lo ri. ² Haû má, yhang gi, Romaq myuq mai Yudaq byù lhunglhâng bang htoq ló byuq râ dut lhê ga, hkohkâm Klodi eq hkunmó hkyô é yanmai, a myáng shi lé Itali ming mai yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng ê ri. ³ Yhangmoq gi, jonghpang saí zo bang chyat nghut kô é yanmai, muzó pûng kôluí, Poluq gi, yhangnhik eq rahá nyi nyi mù, muzó chôm saí akô. ⁴ Bánno buinyi hkangmó, Poluq gi, tarajong má Yudaq byù eq, Grik pé lé, taí sân kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haû Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhâng, Yudaq byu pé gi, lhom he-ngik pyám kômù, yhang lé rhoí dang taí pyám akô; haû mù, Poluq gi, yhâng mebu ko shit é dông yhangmoq lé a nau é hkyô tún shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, tûngbau pè chyáng e ló berâ nghut lhê." ga luí, yhangmoq lé taí ri.

⁷ Hau htâng, yhang gi, tarajong mai htoq luí, jong haû eq yhep nghut é, Garai Gasang lé no-qkuq é Titu Yustu ga su é yhûm má wang ló ri. ⁸ Krispu gâ é tarajong má up sù gi, yhâng yhumbyù lhunglhâng bang eq rahá, Yhumsing lé lumjîng

akô. Korinhtuq myuq byu pé myo myo le, Poluq é dang lé gyô yù mù, lumjínq luí, wui-myhup hkâm yu bum akô nghut ri.

⁹ Ra-myìn lé, shing-rán ralhú mǎ Yhumsîng mai Poluq lé taí é gi, "Hkâgyuq, taí aq, zim za hkâ-nyî. ¹⁰ Ngò nǎng eq rahá nghut nyi lhê, nǎng lé ó yuq èq le haí wó kut rǎ a nghut, hkâsu mù gǎ le, myuq shî má, ngá é byù myo myo nyi bum lhê." gǎ ri. ¹¹ Haú mù luí, Poluq gi, Garai Gasáng é mungdang mhóqshit uchyang, razàn eq lhamó hkyuq hkyap yhang, haú myuq má nyi nyi ri.

¹² Galio ga sǔ, Ahkaia mau má é ginwáng zau kut nyi é u lé, Yudaq byu pé gi, myit rahkat zǎ èq Poluq lé chôm chyup yǔ kôluí, tará hpyit wap má she háng kômù, ¹³ "Byù shî yuq gi, jep é tará eq shai lhûm é dǒng, Garai Gasang lé noqkuq rǎ matù, byu pé lé mhóq hpyoq wún ri." ga mara hûn akô.

¹⁴ Haú hkûn, Poluq tú taí rǎ dǎ lò jáng, Galio gi, Yudaq byu pé lé, "Yudaq byu pé ê, muzó shî gi, tará lu laí é muzó, haú a nghut jáng, agè ashop é muzó mai, dut lo é nghut le gi, nungmoq lé ngò gyo byi rǎ hkyô joq lhê. ¹⁵ Nghut kôlhang, muzó shî gi, nungmoq é tará eq séng luí, dang eq séng luí, myìng eq séng luí, taí lhum kô é hkyô nghut é yanmai, nungmoq yhang ru ló hpyit lhum keq. Haú sǔ é muzó má, ngò gi, tará agyì kut byi rǎ a nghut." ga taí mù, ¹⁶ tará hpyit wap mai yhangmoq lé hkat htoq pyám nhang ri. ¹⁷ Haú hkûn, yhangmoq lhunglhang bang gi, tarajong má up sǔ Sositeni lé chyup yǔ mù, tará hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taû Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjínq bang eq nyi nyi ri. Hau htâng, yhang gi, haú bang lé shi-kyâm to luî, Priskila eq Akula nhik lé byinzùm kut mù, lhaî ji luî Suriq mau shut e ló akô. Hau hí má, yhang gi, danggidiq tô tô é yanmai, Kenhkrea wà má xâm nyhâm pyâm ri.* ¹⁹ Yhangmoq Ehpesu myuq má jé kô é hkûn, Poluq gi, Priskila eq Akula nhik lé nyhi pyâm to luî, yhang baú tarajong má wàng mù, Yudaq byu pé lé taî sân kyo byi ri. ²⁰ Haû mâ é bang gi, yhangmoq eq rahá rayoq zo nyi shi râ dông yhang lé dung kô é nghut kôlhâng, yhang gi, a nhô lo nghut ri. ²¹ Haû mù, yhang gi, Ehpesu myuq mai lhaî ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidiq byi tô ri. ²² Ahkuî, Poluq gi, Kesare wà mó má ló jé dap jáng, Yerusalem wà mó shut doq ló mù, noqkuq hpúng lé ló huî tô é htâng, Antioku wà mó má dum gyó ló ri.

²³ Yhang gi, haû wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawà mâ é chángzô pé lé wum-o lhoq ging byi ri.

Apolo Zui Saî É Muzó

²⁴ Ahkuî, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyî bò sù nghut é htoq agó, Chyúmdang le gyai kûng é sù nghut ri. ²⁵ Yhang gi,

* **18:18** Xâm nyhâm pyâm é gi, Yudaq htùng dông rajung jung kut râ matú danggidiq to luî, haû lé ban kut jáng, yhumsing xâm lé nyhâm pyâm é nghut lhê.

Yohan é baptisma hkyô lé za sé sù nghut kôlhang, Yhumsing é hkyô lé mhoq yû bê nghut luî, Yesuq é hkyô pé lé mhoq yu to bê eq rajung za wum zuq tung ga luî, hkyak hkyak mhoqshit byî ri. ²⁶ Ahkuî, yhang gi, gyuq kyûm myit a bo é za tarajong má taî hi ló ri. Haú hkûn, Priskila eq Akula nhik gi, haú lé wó gyo kôjáng, yhang lé ji yù mù, Garai Gasâng é mungdang hkyô lé azó tung taî sân kyo byî akô nghut ri.

²⁷ Apolo gi, Ahkaia mau shut dap e ló nau é hkûn, gumang wuî gi, yhang lé wum saî byi mù, yhang lé lhom hkûlum yù râ matú, chángzô pé chyang laiká ká byî kat akô; yhang gi, jé jáng, Garai Gasâng jeju mai lumjîng bê bang lé, gyai yhang wó garúm sù dut bê nghut ri. ²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luî Chyúmdang má tûn shit uchyang, byu pé hí má Yudaq byu pé lé, wum kat wó taî ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

¹ Ahkuî, Apolo gi, Korinhtuq myuq má nyi tô é hkûn, Poluq gi, mau káng mai sô laî ló mù, Ehpesu myuq má jé ri. Haú má, yhang gi, chángzô pé ra-am eq hui luî, ² yhangmoq lé, "Nungmoq gi, lumjîng é hkûn, Chyoiyúng Woi-nyí lé, wó yû bekô lhú?" ga myî ri.

Haú hkûn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tû taî akô.

³ Haû mù, Poluq gi, "Haû nghut jáng, nungmoq gi, haí jung baptisma hkam yù kô é lhú?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tâi akô.

⁴ Haú hkûn, Poluq gi, "Yohan é baptisma nghu é gi, myit lhîng mù wui-myhup hkâm yu é hkyô lé gâ lhê. Yohan gi, yhang é htâng má jé lé râ sù, haú Yesuq lé sheq lumjîng râ lhê ga shiwa byu pé lé tâi ri." ga tâi ri. ⁵ Yhangmoq gi, dang haú lé wó gyo kôjáng, Yesuq é myîng lang luí baptisma byí é lé, hkam yu bum akô. ⁶ Poluq gi, yhangmoq é htoq má loq ke byi jáng, haú Chyoiyúng Woi-nyí gi, yhangmoq htoq má jé lé mù, yhangmoq gi, laklaí dang nyo lo é htoq agó myiqhtoi le htoí lo bum akô. ⁷ Haú bang lhunglháng gi, yuqgè raxe í yuq kó nghut ri.

⁸ Hau htâng, Poluq gi, tarajong má wàng luí, gyuq kyûm myit a bo é za lhamó sum hkyap Garai Gasâng é mingdán hkyô lé tâi sân kyo mù, lhoq pun lhoq kyîng yu ri. ⁹ Nghut kôlhang, ra-am gi, myit htan lo bùm kôluí a kâm lumjîng kô é htoq agó, haú Yhumsing é Hkyô lé byu pé hí má lhoq hpoí pyám byi kôjáng, Poluq gi, yhangmoq chyáng mai htoq luí, chángzô pé lé shuî chûng mù, Turanu gá su é hpaqchyí mhoq jong má, nyí wuî tâi sân kyô lhûm nyi akô. ¹⁰ Haú su kut í zân yhang mhoqshit nyi é yanmai, Asia mau gón mâ é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akô nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklaí kumlhá kut ri. ¹² Haú mù, Poluq chyáng mâ é

hpajet eq hpyihit rajung jung lé, nò bâng chyáng yu ló mù, ló záng byi jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akô.

¹³ Haú u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é myìng mai, ngò, nungmoq lé hkat htoq lhê." ga, agè ashop é nat wang júng to bâng é ahtoq má, Yhumsìng Yesuq é myìng lé lang luí, hkat chyam wú akô. ¹⁴ Skewa gâ é, Yudaq hkyangjong agyì rayuq é yuqzo nyhit yuq le haú su kut wun akô. ¹⁵ Ra-nyí lé, agè ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akô?" ga tû taí mù, ¹⁶ agè ashop é nat haú wang júng é byù gi, yhangmoq htoq má byam doq jí to luí, nhuq bat yú mù yhangmoq lé ung pyâm ri. Yhangmoq gi, yhúm haú mai gùngchín sui nê yang yang hpang htoq ló bekô nghut ri.

¹⁷ Haú hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglhang bang gi, chòm gyô gyuq bum akô. Yhumsìng Yesuq é myìng gi, hkya-on lhoq toq é hui bê nghut ri. ¹⁸ Lumjìng bê bang myo myo gi, lé mù, yhumsìng kut shut é agè ashop hkyô lé, myo myô hí má yín yu akô. ¹⁹ Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akô. Mausau haú pé é ahpau lé sôn wú le, ngùn chap ngo mun záng ri. ²⁰ Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut laî htâng má, Poluq gi, Makedoni mau eq Ahkaia mau đông sô laî ló mù, Yerusalem wà mó má ló jé râ ga myit hpyit yû luî, "Haû má ló jé tô é htâng má, ngò, Romaq myuq má le, jé wú râ dut ashî." ga taî ri. ²² Haû mù, yhang lé htuqbang garúm é Timohti eq Erastu nhik lé hí Makedoni mau shut nhang kat luî, yhang gi, Asia mau má rayoq rabun zo nyi gyó tô ri.

²³ Haú yoqlé, haû Yhumsing é Hkyô yanmai gyai yhang gabyông lo bum akô. ²⁴ Demetri gâ é ngùn bat zo sù rayuq gi, Artemi hpara é ngùn yhùm zông zo saí luî, mù saí luzúm wuî lé wó sùt nhang nyi ri. ²⁵ Yhang gi, yhâng é ngùn bat zo luzúm wuî eq haú jung amû kut é góbang lé le ji tsing to mù, taî é gi, "Luzúm wuî ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq saí é zè lé, garaî pé a nghut ga, shî Poluq ga sù mai byù myo myo lé mhoq hpyoq yû mù, hkyô shuî lhoq nghoq nyi é hkyô lé, nungmoq wó myâng, wó gyô nyi akô. ²⁷ Haû mù luî, nga-nhúng é muzó shî gi, hpoî byuq râ lé chiq râ é za a nghut, hparà myhí mó Artemi é noqkuq yhùm gi, haî a dut byuq luî, Asia mau gón eq mingkan gón mai noq é hparà myhî é shingkang hpoî byuq râ lé le myit chiq râ dut bê." gâ ri.

²⁸ Yhangmoq gi, dang haû lé wó gyô bùm kôjáng, nhik mó gyô yo kôluî, "Ehpesu myuq byu pé é Artemi gi, kô nyi sháng gaq ô!" ga chôm garú bum akô. ²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm

Makedoni byù Ge-u eq Aristakuq nhik lé chyup she yù mù, yhangmoq é poî wàng mó shut radá dâm chyîn chyap wang ló bum akô. ³⁰ Poluq gi, moq hpúng hau hí má htoq shit naû kôlhang, chángzô pé gi, yhang lé a wàng nhâng kó nghut ri. ³¹ Poluq é luzúm wuî nghut é, haú mau mâ é suwún wuî ra-am lhang, yhang lé poî wàng hkaû má a ê râ matú, hkúm pyám nhang akô nghut ri.

³² Zíng tô é bang gi, hai hû háng le a sé lo dut byuq kômù luî, ra-am rajung ga garû bum akô. Myo mi-myo gi, haî mù luî yhangmoq haú má nyi tô é lé lhang a sê bùm kó nghut ri. ³³ Yudaq byu pé gi, Alesander lé hí má chôm chyûn htoq kat kôluî, shiwa hpong mai ra-am gi, yhang hká dông taí râ hkyô lé mhoq byi kat akô. Alesander le shiwa hpong lé taí san kyo naû luî, zim byuq râ matú loq tu ri. ³⁴ Nghut kôlhang, Alesander, Yudaq byù nghut é lé sé kôjáng, yhangmoq lhunglhang bang gi, rahtê za kut kôluî, "Ehpesu myuq byu pé é Artemi gi, kô nyi sháng gaq ô!" ga hkyíng hkum í hkum kô garû bum akô.

³⁵ Haû, myuq chyare hpó gi, shiwa moq mó lé lhoq zim luî taí é gi, "Ehpesu myuq byu pé ê, Ehpesu myuq shí gi, Artemi myhí mó é noqkuq yhûm eq mauhkûng mai byit gyó lo é yhâng é alhó lé, wú zúng nyi é wà nghut é hkyô lé, mingkan má a sê é ó yuq wa nyi lhê lú? ³⁶ Haû mù luî, shí hkyô pé gi, wó he pyám jung a nghut é yanmai, zim za nyi le ge lhê, hân so hân dùn hkâkut ko. ³⁷ Shí nhik gi, noqkuq yhûm lé hpýoq zo su nhik le a nghut, nga-nhûng é hparà myhí lé lhoq hpoi su nhik le a nghut kô é le nhîng, nungmoq shuí lé bekô nghut

ri. ³⁸ Demetri eq yhâng é ngùn bat zo luzúm wuî gi, rayuq yuq é ahtoq má mara hûn râ hkyô joq kô é nghut jâng, tarâ rûng pé hpông tô lê. Tarâ agyî pé nyi lê. Haú má yhangmoq ê kó sháng gaq. ³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chôm taí pyám râ nghut lê. ⁴⁰ Hkû-nyî gabyông é mù shí má, mù htoq wang a bo é yanmai, nga-nhúng lé mara hûn râ chiq râ ri. Shî su kut chôm míng é hkyô lé, hai é yanmai nghut lê nghû, nga-nhúng a wó taí kyo nghut ri." gâ ri. ⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lâi Lô É U Lê Hkyô

¹ Haú gabyông é hkyô zîm byuq é htâng má, Poluq gi, chángzô pé lé ji yù luî, yhangmoq lé wum byi dang taí to mù, shi-kyâm to luî, Makedoni mau shut htoq e lô bê nghut ri. ² Yhang gi, haú mau mai sô lâi lô uchyang, byu pé lé wum byî é dang myo myo taí luî, Grik mau má lô jé bê. ³ Yhang haú má lhamó sum hkyap nyi yù mù, lhaî ji luî Suriq mau shut ê râ hen nyi é hkûn, Yudaq byu pé gi, yhang lé gyám nyî kô é yanmai, yhang gi, Makedoni mau đông tau lò râ lé myit hpyit bê nghut ri. ⁴ Yhang eq rabyìn za châng é bang gi, Beria wà mó mâ é Purû yhangzo Sopata, Htesaloni wà mó mâ é Aristakuq eq Sekundu nhik, Derbe wà mó mâ é Ge-u, Timohti, Asia mau mâ é Tuhkiku eq Trohpimu nhik pé nghut akô. ⁵ Yhangmoq gi, hí so

láng luî, ngá-nhik lé Troa myuq má ló láng nyi akô.
⁶ Nghut kôlhang, ngá-nhik gi, Azuma Poi* lai é htâng má, Hpilipi wà mó mai lhai ji ló le, ngo nyí nghû jáng, Troa myuq má yhangmoq lé hui luî, haú má nyhit nyí chôm nyi é nghut lhê.

Troa Wà Má, Utuhku Ga Sû Lhoq Tui Toq Huî É Hkyô

⁷ Rabat é sâng-hi nyí lé, ngamoq gi, muk hpê gàm râ matú lé chôm zup zîng tô é hkûn, Poluq gi, htang nyí ló byuq râ ga hen tô é yanmai, chángzô pé lé gunggàm jé shoq hko kyô nyi ri. ⁸ Ngamoq zup zîng nyi é haú ahtoq pyâm wap má, myibung myo myo le duq tô ri. ⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luî, yhûm sum tsáng mai byit gyó mù, yhang lé bún toq wú le shi byuq bê nghut ri. ¹⁰ Haú hkûn, Poluq gi, gyó ló mù, po ngop to luî, "Hkâdân ko, yhang soq bo ashî." ga tai ri. ¹¹ Haú mù, yhang gi, dum tau doq ló luî, muk lé hpé mù, zo luî, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duì gù shuî ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Mâ É Hkyowui

¹³ Poluq gi, myi hkyô ló râ matú hen tô é yanmai, yhang lajang byî é eq rajung za, yhang lé Asu wà má lhai lhom shuî ji râ matú, ngamoq gi, lhai ji mù hí ló láng bê nghut lhê. ¹⁴ Haú mù, yhang gi, Asu wà má ngamoq eq hui luî, ngamoq gi, yhang

* **20:6** Múnchi a bo é Muk zo Poi lé, Azuma Poi le gà lhê.

lé lhaî má shuî jî chûng mù, Mitulene myuq shut e ló bê. ¹⁵ Htang nyi, ngamoq gi, haû mai lhaî jî mù, Kiu zinlóng yâm mai laî ló luî, hau htang nyí gi, Samu zinlóng má laî dap ló luî, htang nyí gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyì lé Yerusalem wà mó má wó jé shoq gâ é yanmai, Asia mau má buinyì a kâm lhoq htum naù mù luî, Ehpesu myuq lé lhaî pyâm to râ matú, myit hpyit to bê nghut ri.

Ehpesu Hpúng Suwún Wuî Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byù nhang kat luî, hpúng suwún wuî lé ê jî nhang ri. ¹⁸ Haú bang jé lé kôjáng, yhang yhangmoq lé taí é gi, "Ngò, Asia mau má sâng-hi jé é buinyì mai, nungmoq eq hkâsu kut nyi nyi é ahkyíng banshoq lé le; ¹⁹ Yudaq byu pé jeq hô luî, ngò wuîhke jamjau hui zo kôlhang, haû Yhumsing é muzó lé, ngò myit gyai lhoq nyhúm é eq ngaubyi ngaù nhap é eq wùn waq é hkyô lé le; ²⁰ nungmoq é matú akyû bo é hkyô banshoq lé, a myhit to loshoq taí é hkyô lé le; shiwa byu pé hí eq rayhúm htâng rayhúm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhîng mù Garai Gasâng chyáng lhîng lò ra eq, nga-nhúng é Yhumsing Yesuq lé lumjîng ra hkyô lé, saksé hkâm kyo lugù nghut bê lé le, nungmoq sê nyi akô.

²² Ahkuî, ngò gi, Woi-nyí má tuí tô é hui bê yanmai, Yerusalem wà mó má e ló lhê; haú má, ngò haî ló dut râ lé kúm gi, a sé nghut ri. ²³ Ngò gi, htóng eq wuîhke jamjau hkyô ngo lé láng tô ri ga, wà hkangmó má Chyoiyúng Woi-nyí eq lhoq pûn é

hkyô lé za sê nyi lhê. ²⁴ Nghut kôlhang, ngò gi, dìn râ hkyô ban dìn râ eq, Garai Gasâng jeju eq sêng é gabú danglù lé saksé hkám râ matú, Yhumsíng Yesuq ngo lé byi tô é muzó lé ban wùn waq râ za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkún, ngò eq huí é nungmoq lhunglhang bang gi, htâng nùng má ngo lé a myàng lo kó râ nghut é lé, ahkuí ngò sê to bê. ²⁶ Haú mù luí, ó yuq nghut kôlhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkám tô lhê. ²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo râ matú, ngò zaú tô é hkyô a joq wú é yanmai nghut lhê. ²⁸ Nungmoq gi, yhumsing gùng lé le, nungmoq lé Chyoiyúng Woi-nyí èq up zúng nhang é sau hpúng† lhunglhang lé le, zúng nyí keq. Garai Gasang Yhâng suí èq wui tô é noqkuq hpúng lé le, rém zúng nyí keq. ²⁹ Ngò ló byuq é htâng má, sau hpúng lé a shogyô é, ashop é wamhkui gi, nungmoq chyáng jé râ nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yû shoq ga, shut é dông taí é byu pé lhang nungmoq chyáng mai htoq lô râ nghut lhê. ³¹ Haú mù luí, nungmoq yuq hkanngmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tíng mù,

† 20:28 Sau hpúng gâ é gi, lumjǐng é bang lé gâ lhê.

lhoq chyoiyúng é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hîng, ngùn, mebu pé lé le a myoqnoq wú. ³⁴ Ngá é loq shî í loq gi, ngò eq ngá htâng châng é bang ra châ é lé kut byi bê hkyô lé, nungmoq yhang sé gû nghut lhê. ³⁵ Ngò kut é muzó banshoq gi, nungmoq é alik dut bê nghut luí, shî su kut shikut é dông mai, nga-nhúng gi, wum-o nyhóm bang lé htuq bang luí, 'Lhom yu é htoq má byí é gi, je riyhang hkungsô wó nyi ri.' ga luí, Yhumsîng Yesuq taí é dang lé bûn nyi sháng." gâ ri.

³⁶ Poluq gi, haû su ga ban taí jáng, hkyihput htuq mù, yhangmoq lhunglhâng bang eq rahá za kyûdûng ri. ³⁷ Yhangmoq lhunglhâng bang gi, yhang lé po to luí, bopuq puq mù, chôm ngaù akô. ³⁸ Htâng nùng má, yhang lé dum myàng râ a nghut lo gâ é dang yanmai, yhangmoq gi, je riyhang yón kuq bum akô. Yhang lé, lhai má jé shoq lé châng dé kat akô nghut ri.

21

Yerusalem Wà Mó Shut Doq Ló Nyi É ULhê Hkyô

¹ Ngamoq gi, yhangmoq lé kang pyâm to luí, lhai jî chûng mù, nyâng za Kusa zinlóng má jé é nghut lhê. Hau htang nyí gi, Rode zinlóng má jé mù, haû mai Patara wà má dum jé bê. ² Haú wâ má Hpinisi mau shut dap ló é lhai lé, ngamoq myàng luí, haû mai chôm jî chûng bê. ³ Haú hkûn, ngamoq gi, Kupru zinlóng lé myàng jáng, hau é loqyo hkyam dông lai ló luí, Suriq mau shut e ló le, hpugá zê lé hkyó râ matú, Turuq myuq má nô é nghut lhê. ⁴ Haú wâ má, chángzô pé lé myang hô

luí, yhangmoq chyáng nyhit nyí bíng yu é. Chángzo haú bang gi, Chyoiyúng Woi-nyí eq lhoq pún é dông Poluq lé Yerusalem và mó shut a ló rà matú, chôm hkúm akô. ⁵ Nghut kôlhang, nyhit nyí haú lai jáng, ngamoq gi, ngamoq é hkyowuì shut dum xoq sô htoq ló bê. Chángzô pé lhunglhang bang gi, yhangmoq é myi zo wuì eq rahá, ngamoq lé và shinggan jé shoq châng dé kôluí, ngamoq gi, yhangmoq eq rahá wuiyàm má hkyihput htuq mù, kyû chôm dung bê nghut lhê. ⁶ Hau htâng, rayuq eq rayuq ban shi-kyâm lhum jáng, ngamoq gi, lhaí má wàng bê; yhangmoq gi, yhûm shut dum tau ló byuq bekô nghut ri.

⁷ Ngamoq gi, Turuq myuq mai lhaí jî chûng mù, Toleme và má jé ló bê. Ngamoq gi, haú wâ mâ é gumang wuì lé shichyên yù mù, yhangmoq eq rahá ra-nyí chôm nyi kún é nghut lhê. ⁸ Htang nyí gi, ngamoq haú wâ mai htoq ló mù, Kesare và mó má dum jé bê. Haú wâ má, haú htuqluq htuqbang nyhit yuq* má bò sô, gabú danglù hko taí é Hpilip gá su é yhûm má, ngamoq wang bíng bê nghut lhê. ⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhûm má rayoq zo nyi é htâng má, Agabu gâ é myiqhtoi rayuq, Yuda mau mai jé lé ri. ¹¹ Yhang gi, ngamoq chyáng jé lé luí, Poluq é hpyihit lé yù mù, yhânggùng yhang loq eq hkyí pé má tui mù luí, taí é gi, "'Shî hpyihit yhumsing lé, Yerusalem và mó mâ é Yudaq byu pé mai shî su kut lhom tui luí, tûngbaù pé é loq má ap pyám kó rà nghut lhê;' ga luí, Chyoiyúng Woi-nyí taí ri." gâ ri.

* **21:8** Lagyo 6:1-6

¹² Dang haû lé wó gyo jáng, haú mâ é bang eq ngamoq gi, Poluq lé Yerusalem wà mó má a doq ló râ matú, gyai yhang chôm hkúm bê nghut lhê.

¹³ Nghut kôlhang, Poluq gi, "Nungmoq gi, haî mù luî ngaubyi ngau-nhap kut é eq, ngo lé myit wum gyui râ đông kut nyi akô lú? Ngò gi, Yhumsîng Yesuq é yanmai, Yerusalem wà mó má, tuî é huî râ za a nghut, shî hkâm râ matú le rì rì nghut lhê." ga tû taî pyâm ri. ¹⁴ Yhang lé wó taî hkúm râ su a dut lo jáng, ngamoq gi, "Garai Gasang ô nau é đông nghut sháng gaq." ngu luî, zim za chôm nyi bùm bê.

¹⁵ Hau htâng má, ngamoq gi, zè món chûng mù Yerusalem wà mó shut doq ló bê nghut lhê.

¹⁶ Kesare wà mó mâ é chángzô pé ra-am le, ngamoq eq rabyìn za nghut kôluî, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhùm má shuî ló mù, yhâng chyáng bing nhang akô.

Yerusalem Wà Mó Má, Yakuq Lé Ê Huî É Hkyô

¹⁷ Yerusalem wà mó má ngamoq jé é hkùn, gumang wuî gi, ngamoq lé gabú tung lhom hkûlum yu akô. ¹⁸ Htang nyí, Poluq eq ngamoq gi, Yakuq lé ê huî le, hpúng suwún wuî le zîng nyi to lánng akô. ¹⁹ Poluq gi, yhangmoq eq ban shichyen jáng, yhang wùn waq lai lo é hpúng mù đông mai, Garai Gasâng eq tûngbaù pé chyáng kut byi bê hkyô pé lé, jikhúm nuqguq shit kyô ri.

²⁰ Yhangmoq gi, haû lé wó gyo kôjáng, Garai Gasang lé hkya-ôn akô. Hau htâng, Poluq lé taí kô é gi, "Âmang ê, Yudaq byu pé má lumjîng é bang hkâ-myhó hkyîng mun nghut bê lé, nàng sê lhê. Haú bang lhungháng gi, jep é tarâ má myit zuq to

bê bang chyat nghut bum akô. ²¹ Nghut kôlhang, yhangmoq lhunglhang bang gi, tûngbaù pê chyáng nyó lúng tô é Yudaq byù banshoq bang lé, nàng, yhumsing yhangzo yhangshû pê é matú ahpyo-kuq hpyit a ra ngu é eq nga-nhûng é htûng tarâ lé châng nyi a ra nghû luî, Mosheq é tarâ lé tô pyám râ dông mhoqshit ri gâ é dang lé, wó gyô yu bùm bekô nghut ri. ²² Nàng jé bê hkyô lé, yhangmoq wó gyo berâ za nghut lhê. Ahkuí, ngamoq hkâsu kut lo râ lúh? ²³ Haù mù, ngamoq taí é dông kut aq, ngamoq chyáng danggidiq mó byi bê byù myi yuq nyi lhê. ²⁴ Nàng gi, haù bang lé ji yù mù, yhangmoq eq rahá lhoq san lhoq yúng yû aq, yhangmoq lé u wó wuq yù râ matú, ahpau le htoq byi aq. Haù hkûn sheq, byù lhunglhang bang gi, yhangmoq wó gyô tô é hkyô a têng byuq é eq, nàng yhang lhang, jep é tarâ lé, châng kut nyí sù nghut é hkyô lé, sé kó râ nghut lhê. ²⁵ Lumjínng é tûngbaù pê é matú kúm gi, hparà lô pé lé tîng byí é zoshuq, sui, lingzing mai myhik sat é dusak sho eq ashop é dông gungsho zùm yap é hkyô pé lé, yhangmoq koi pyám râ matú, ngamoq chôm doqdan luî, kâ hùn kat bê nghut lhê." ga akô.

²⁶ Haù mù luî, Poluq gi, hau htang nyí haù bang lé ji yù luî, yhangmoq eq rahá, lhoq san lhoq yúng yû mù, noqkuq yhûm má wàng luî, yhangmoq yuq hkingmó é matú hkungga wó byi shoq ga, yhangmoq é lhoq san lhoq yúng buinyi ngap bê hkyô lé, taí kyô ri.

Poluq Chyup Yû Huí É Hkyô

²⁷ Buinyi nyhit nyí haù ngap râ yàm má, Asia mau mâ é Yudaq byu pé ra-am gi, noqkuq yhûm má Poluq lé myàng kômù, shiwa byu pé lé shuí

gabyong luî, yhang lé chyup yû mù, garû tai kô é dang gi, ²⁸ "Israelaq byu pé ê, garúm yû keq, shí yuq gi, nga-nhông byuhú lé le, jep é tarâ lé le, jowò shî lé le, shut shai é đông jowò hkanqmó mâ é byù banshoq lé mhoqshit sù nghut ri. Hau htoq agó, noqkuq yhûm má Grik pé lé shuí háng é eq, chyoiyúng jowò shî lé achraq achyut kut é sù nghut ri." gâ akô. ²⁹ (Hkâsu mù gâ le, yhangmoq gi, Ehpesu myuq byû Trohpimu ga sù eq Poluq wà hkaû má rahá nghut kô é lé, myàng kômù, haú yuq lé noqkuq yhûm shut shuí háng nhô ngam pyám kô é yanmai nghut ri.)

³⁰ Rawà gón gabyông lo mù, shiwa byu pé lnhghkyuq mai din lé lô kôluî, Poluq lé chyup zing to uchyang, noqkuq yhûm shinggan shut she hkyut htoq ló akô. Haú hkûn jáng, hkum pé lé myhî pyâm akô nghut ri. ³¹ Poluq lé yhangmoq sat râ dâ nyi kô é hkûn, Yerusalem wà gón gabyông nyi akô gâ é hkyô lé, Romaq dap up zaú é no má, lò jé ri. ³² Haú mù, yhang gi, radá dâm shô up gyezau ram eq gyezô pé lé shuí chûng mù, byù hpúng shut, din yán gyó ló akô. Yhangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyîng byuq akô nghut ri.

³³ Haú hkûn, dap up zau hpó gi, Poluq chyáng ê jé mù, yhang lé chyup yû luî, toqjâng tui í hkat eq tuí to nhang ri; hau htâng, yhang ó yuq nghut é hkyô lé le, haí kut shut é hkyô lé le myî wú ri. ³⁴ Shiwa byu pé kúm gi, rayuq rajung ga garû bum akô. Haú mù, gyezau hpó gi, lûm garu kô é yanmai, têng é hkyô lé rago a wó sê yù jáng, Poluq lé gyewap má shuí ló nhang ri. ³⁵ Poluq gi, zumhtâng wang má

jé lo é hkûn, byù moq mó lûm htim chyîn chyap lô kô é yanmai, gyezô pé gi, yhang lé waq doq lô akô. ³⁶ Shiwa byu pé gi, "Yhang lé sat pyám keq." ga châng garû nyi akô nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

³⁷ Gyezô pé gi, Poluq lé gyewap má shuî wàng râ za nghut é hkûn, Poluq gi, dap up zau hpó lé, "Ngò nàng lé dang wó nyô râ l hú?" ga myi jáng, dap up zau hpó gi, "Nàng, Grik myíng dat mu lhê l hú?"

³⁸ Nàng gi, hí hkûn gumlau kut mù, byù sat wún bang myi hkyîng lé, yoso shut shuî htoq lô é sù, Egutuq byû a nghut l hú?" ga tau myî ri.

³⁹ Haú hkûn, Poluq gi, "Ngò gi, Kiliki mau Tarshu myuq mâ é Yudaq byû nghut lhê; ngò nyi é wà gi, wà chyap wà zo za a nghut, jeju mai, byù shí bang lé ngò dang tai râ ahkáng byi laq." ga dúng ri.

⁴⁰ Gyedap up zau hpó ahkáng byi jáng, Poluq gi, zumhtâng má yap to mù, shiwa byu pê shut loq he ri. Haú hkûn, yhangmoq lhunglhâng bang zim byuq kômù, Poluq, yhangmoq lé Hebre myíng dông tai é gi,

22

¹ "Gumang wuì eq îwa pé ê, ahkuî, ngò mara a bò nghu tai é dang lé gyô wú shi keq." gâ ri.

² Yhangmoq gi, yhang Hebre myíng dông tai é dang lé wó gyô bùm kôjáng, gyai yhang zím byuq bekô. Haú mù, Poluq xoq tai é gi, ³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlhang, wà mó shî má nyi kô lò sù nghut lhê. Ngò gi, nga-nhung îchyí îwa pê é jep é

tarâ lé, Gamalelaq é loq má jihkúm nuqquq mhoq yû luí, hkû-nyí lhê é nungmoq lhunghâng bang su, Garai Gasang lé gyai myit zìng zuq é sù nghut lhê. ⁴Ngò gi, shí Hkyô cháng bang lé shi é jé shoq, zing-rî wú é sù eq, myiwe yuqgè ó yuq lé nghut kôlháng, chyup yû mù htóng má lhûng pyâm wú bê sù nghut lhê. ⁵Hkyangjong mó eq byìn tú wap suwún wuì lhunghâng bang gi, ngá é saksê pé nghut akô. Ngò gi, Damaskuq myuq má nyi é yhangmoq é Yudaq gumang wuì lé byi râ laiká yhangmoq chyáng mai wó yu chûng luí, haú mâ é bang lé le Yerusalem wà mó má dam byi râ matú, chyup tuí ló râ nghû, Damaskuq myuq shut e é nghut lhê.

⁶Nyigûng tú zó lé, ngò Damaskuq myuq shut sô chyâng ló nyi é hkún, maubó gi, ngá é lhinghkyuq má mauhkûng mai byodàn tung duqbó to bê nghut ri. ⁷Haú mù, ngò myigûng má lêng gop tô le, wó gyô kat é danghtê gi, 'Sholuq, Sholuq, nàng ngo lé haí mù zing-rî nyi lhê lhú?' gâ ri.

⁸Ngò le, 'Yhumsîng ê, nàng ó nghut lhê lhú?' nghu myí kat jáng, 'Ngò gi, nàng zing-rî wún é sù, Nazaret wà byù Yesuq nghut lhê.' ga luí, Yhang tú taí kat ri. ⁹Ngò eq rahá e ló é bang kúm gi, maubó lé myàng kôlháng, ngo lé taí é danghtê lé a sê gyo kó nghut ri.

¹⁰Dum, ngò gi, 'Yhumsîng ê, ngò haí kut ra râ lhú?' nghu myí jáng, haú Yhumsîng gi, 'Toq mù, Damaskuq myuq má wang ló aq, nàng kut râ matú wò byí tô é hkyô pé lhungháng, nang lé haú má lhom taí kyo berá nghut lhê.' ga ngo lé dum taí ri. ¹¹Haú maubó é shingkâng é yanmai, ngò myoqjit byuq mù, ngá é byinzùm wuì gi, Damaskuq myuq

shut ngo lé loq mai she wang ló akô.

¹² Haú hkûn, Anani gâ é yuqgè rayuq ngá chyáng lé huí ri. Yhang gi, jep é tarâ lé gyuq hkunggâ é eq, haú má nyi é Yudaq byû lhunglhâng bâng é hí má myoqdong gyai wó é sù nghut ri. ¹³ Yhang gi, ngá nám má yap to luí, 'Gumang Sholuq ê, náng myoq myàng aq hkoi!' ga taí ri. Haú hkûn jáng yhang, yhang lé ngò wó myang kat bê nghut lhê.

¹⁴ Yhang dum xoq taí é gi, 'Nga-nhông íchyí îwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myâng luí, Yhâng é nhut mâ é mungdang lé wó gyo sháng gaq ga luí le, hkyin to bê nghut ri. ¹⁵ Haú mù, nàng gi, nàng myang é eq wó gyô yu é hkyô pé lé, byû lhunglhâng bâng é hí má, Yhâng é matú saksé hkám byi râ su dut râ nghut lhê. ¹⁶ Ahkuí, nàng haí lé láng nyi ashí lúh? Toq aq, Yhâng é myìng lé lang luí wui-myhup hkám yu é eq, náng é yubak mara pé lé chí sân pyám aq.' gâ ri.

¹⁷ Hau htâng, ngò gi, Yerusalem wà mó má dum taú jé ló mù, noqkuq yhûm má kyû ê dúng nyi le, moq byuq ló mù, ¹⁸ 'Nàng, ngá é hkyô lé saksé hkám râ dang lé, yhangmoq a lhom hap yù kó râ nghut é yanmai, Yerusalem wà mó mai hân htoq ló aq.' ga Yhumsîng ngo lé taí nyi é lé, myoqwup shing-rân dông myang ri.

¹⁹ Haú mù, ngò gi, 'Yhumsîng ê, tarajong ralhûm htâng ralhûm má nang lé lumjîng bang lé, htóng má chyup lhông pyâm é eq, hkat bat lhing wún é hkyô lé, yhangmoq sê bum akô. ²⁰ Náng é saksé Stehpan sat hui luí suí shun u lé, ngò nàm má yhang yap to mù, haú hkyô lé myit bo hui luí,

yhang lé sat pyám bâng é mebu lé zúng byî é nghut lhê.' nghû tû tái bê.

²¹ Haú hkûn, Yhumsîng gi, 'Ê aq, ngò, nang lé, wê gâng é tûngbàu pê chyáng nhang kat râ.' ga, ngo lé tái ri." gâ ri.

Poluq, Romaq Mingdán Byû Nghut É Hkyô

²² Shiwa byu pé gi, dang haû hkun jé za gyô yù kômù, "Shî sù é byù gi, myigùng htoq má nyi a gíng, sat pyám keq." ga, htê mó eq garû bum akô.

²³ Yhangmoq gi, haû su garu uchyang, yhum-sing buhîng lé hkyut dú pyâm lhê, hpuilhup lé mauhkûng shut kyaq tâng lhê, kut nyî kôjáng, ²⁴ dap up zau hpó gi, Poluq lé gyewap má shuí hâng yù nhâng mù, yhang lé shiwa byu pé haî mù shî su ga garû bùm kô é hkyô lé wó sé shoq ga, nhuq bat nhâng luî, myî choq nhang ri. ²⁵ Nhuq bat râ matú shokuq tuî eq tui kôjáng, Poluq gi, nàm má yap tô é shô up gyezau lé, "Romaq mingdán byû ru nghut sù lé nhîng, lháng a jéyáng shimá, nungmoq nhuq bat le gi, tarâ wang akô lhú?" ga tái ri.

²⁶ Rashô up gyezau gi, dang haû lé wó gyo jáng, dap up zaû chyáng ló mù, "Nàng haî kut râ dâ nyi lhê lhú? Shí yuq gi, Romaq mingdán byû sheq ru nghut ri." ga luî, yhang lé ló tái kyô ri.

²⁷ Haû mù, dap up zau gi, Poluq chyáng ê mù, "Nàng gi, Romaq mingdán byû nghut lhê lhú? Tái kyô wú laq." ga myî ri.

Poluq gi, "Ngò, Romaq mingdán byû nghut lhê." ga tû tái ri.

²⁸ Haú hkûn, dap up zau hpó gi, "Ngò lháng ah-pau myo myo byî pyám luî sheq, Romaq mingdán byû ru wó dut é nghut lhê." ga tû tái jáng, Poluq gi,

"Ngò kúm gi, Romaq mingdán byû dut gû hku lé lo é sù nghut lhê." ga taí ri.

²⁹ Yhang lé myî choq wú râ gâ é bang gi, haú hkûn jáng, yhâng chyáng mai huí zut ló bûm bekô. Gyedap up zau hpó le, Poluq gi, Romaq mingdán byû nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byìn Tú Wapdoq Suwún Wuí Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byìn tú wapdoq suwún wuí lhunglhang lé ji tsing to luí, yhangmoq é gung gung má Poluq lé shuí wàng mù, shap to bê nghut ri.

23

¹ Haú hkûn, Poluq gi, Yudaq byìn tú wapdoq suwún wuí lé wú tsuq to mù, "Ngá gumang wuí ê, ngò gi, hkû-nyí jé shoq Garai Gasâng é hí má sansêng é i-myt èq asak dui nyi bê nghut lhê." ga taí ri. ² Haú mù luí, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. ³ Haú hkûn, Poluq gi, yhang lé, "But hpyu tô é xewâm * nàng ê, nàng lé sheq Garai Gasâng èq bat râ nghut lhê. Nàng gi, tarâ eq rajung za ngo lé jéyáng rà matú shí má zung to luí nhing, haí mù tarâ eq shut shai é đông ngo lé bat nhang lhê lhú?" ga taí ri.

* **23:3** But hpyu tô é xewâm gâ é gi, gegùn labyoq kut bang lé gâ lhê.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lhú?" ga luî, chôm taî akô.

⁵ Poluq gi, "Gumang wuî ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Náng amyû lé up é sù lé wó rhoi râ a nghut.'* ga le kê tô é nghut lhê." ga tû taî ri.

⁶ Hau htâng, hau zîng tô é bang mâ é ra-am gi, Saduke pé, góbang gi, Hparishe pé nghut é lé, Poluq gi, sé jáng, Yudaq byìn tú wapdoq suwún wuî lé, "Gumang wuî ê, ngò gi, Hparishe awut ashín mâ é, Hparishe rayuq nghut lhê. Shî bê bang dum dui toq lô râ hkyô lé myit myoqbyù é yanmai, ngò jéyáng é huî nyi ri." ga luî, garû taî kat ri. ⁷ Yhang hau su ga taî kat jáng, Hparishe pé eq Saduke pé gi, dang jet jet lhûm lò kômù, Yudaq byìn tú wapdoq hpong gi, gam hkoq ló byuq bekô nghut ri. ⁸ (Hkâsu mù gâ le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga taî bum akô. Hparishe pé kúm gi, hau pé joq lhê ga, lumjîng bang nghut akô.)

⁹ Hau mù luî, gyai yhang taî garû bum akô. Hau hkûn, Hparishe hpúng mâ é tarâ sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taî bê nghut jáng gi, hkâsu nghû kó râ lhú?" ga luî, zuq zuq taî htîng lhûm akô nghut ri. ¹⁰ Hau su kut gyai yhang taî htîng lhûm lò kôjáng, dap up zau hpó gi, Poluq lé lâng myha pyám kó râ lé chiq é yanmai, yhangmoq chyáng gyó é mù, Poluq lé hau bâng é gung gûng

* 23:5 Htoq Ló 22:28

mai ê lú shuí lò luí, gyewap má shuí wang ló rã matú, gyezô pé lé nhang kat ri.

¹¹ Haú myîn, Yhumsîng gi, Poluq é nãm má yap to luí, "Hkâgyuq, Yerusalem wà mó má nãng ngá é hkyô lé saksé hkám bê eq rajung za, Romaq myuq má le saksé hkám ra shirâ nghut lhê." ga, yhang lé taí ri.

Poluq Lé Sat Rã Haq Dã É Hkyô

¹² Htâng napkyó, Yudaq byu pé gi, Poluq lé sat rã hpaqchyí chôm da kômù, yhang lé a wó sat sat gi, a zo a shuq rã nghut lhê ga, ó le ó dakam yu akô nghut ri. ¹³ Hpaqchyí shí lé chôm dã é bang gi, myi xê yuq chyân nghut bum akô. ¹⁴ Yhangmoq gi, hkyangjong agyi pé eq suwún wui chyáng ê kômù, "Poluq lé a wó sat sat gi, ngamoq haí le a zo nghû, chôm dakam yu to bê nghut lhê. ¹⁵ Hau é yanmai, ahkuí nungmoq gi, Yudaq byìn tú wapdoq suwún wuê eq rahá kut luí, Poluq é hkyô lé rago za myí gon wú rã nghu mhaû é dông, yhang lé nungmoq chyáng wut yù rã matú, dap up zaû chyáng dũng kat keq. Haú hkûn, ngamoq gi, hkyolat má yhang lé lhom sat pyám rã rì rì kut to rã nghut lhê." ga taí akô.

¹⁶ Nghut kôlhang, haú lhom haq sat kó rã gã é hkyô lé, Poluq é yhâng nhammó é yhangzo yuqgè zo wó gyô yù luí, yhang gi, gyewap má wang ê mù, Poluq lé ê taí kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shí lé dap up zaû chyáng shuí ê aq, yhang, yhang lé shit kyo rã hkyô rajung joq lhê ga." ga taí ri. ¹⁸ Haú mù luí, shô up gyezau hpó gi, zorâm haú lé dap up zaû chyáng shuí ê mù, "Zorâm

shî nang lé shit kyo râ hkyô rajung joq lhê gê ri ga, yhang lé náng chyáng shuî lé râ matú, htóng byû Poluq gi, ngo lé ji yù mù taî ri." ga, yhang lé taî ri.

¹⁹ Haû jáng, dap up zau hpó gi, jauwò má zorâm haû lé yhâng loq mai she ê mù, "Nàng ngo lé haí jung shit kyó nau ri lhú?" ga, yhang lé baú tsik za myî ri.

²⁰ Haú hkûn, zorâm haû gi, "Yudaq byu pé gi, Poluq lé rago za saî myî wú râ su kut mhaú mù, napmá, Yudaq byìn tú wapdoq má shuî yù râ matú, náng chyáng dung kó râ ga, myit chôm huî to bekô nghut ri. ²¹ Haû mù luî, yhangmoq ô nau é dông hkâgyo byi, hkâsu mù gê le, Poluq lé a wó sat sat gi, haî le a zo a shuq râ nghut lhê ga, byù myi xê yuq chyân yhang, ó le ó dakam yù bekô nghut ri. Haú bang gi, yhang lé lhom chyup yû râ matú haq lhom to lánng kó râ nghut lhê. Ahkuî lháng, yhangmoq gi, mú haû kut râ matú rì rì nghut bûm bekô; náng é ahkáng lé za lánng nyi bum akô nghut ri." ga shit kyô ri.

²² Haú hkûn, dap up zau hpó gi, zorâm haû lé, "Nàng, ngo lé shí hkyô shit kyo bê hkyô lé, ó yuq lé le hkâtaî kyo." ga, sidiq byi mù, taû nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myîn sum hkyíng† má Kesare wà mó shut ê râ matú, gyezô pé í shô, myang ji bang nyhit xê, lhâm chûng bang í shô kut mù, rì rì hen to keq.

²⁴ Hau htoq agó, Poluq lé mingzau Hpilik chyáng

† **23:23** Myîn sum hkyíng gi, nga-nhûng é myîn gau hkyíng nghut lhê.

ngón za wó dé kat râ matú, yhang ji râ myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik ê, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pé êq chyup yû mù sat pyám râ dâ nyì bekô za nghut lhê. Nghut kôlhang, ngò gi, gyezô pé eq rahá ê wú le, yhang Romaq mingdán byû nghut é lé wó sê yu é yanmai, yhangmoq chyáng mai yhang lé hkyi lo é nghut lhê. ²⁸ Haû su mù, haî mù yhang lé mara hûn kô é hkyô lé sé nau é yanmai, yhangmoq é Yudaq byìn tú wapdoq má yhang lé shuí jé byî wú bê nghut lhê. ²⁹ Haú hkûn, yhangmoq é tarâ hkyô eq séng luî za mara hun bùm kô é lé ngò myang ri. Nghut kôlhang, shî gíng é eq htóng lhúng gíng é mara haî le a bò nghut ri. ³⁰ Shí yuq lé sat pyám râ hpaqchyî da kô é hkyô, ngo lé shit kyo kô é hkûn, radá dâm, yhang lé ngò náng chyáng dé nhang kat bê. Yhang lé mara hûn nau é bang lé gi, nang hí má yhang hun lhum keq ngû pying kat bê nghut lhê." gâ ri.

³¹ Haû mù luî, gyezô pé gi, haû pying kat é dang eq rajung za, myín lé yhang, Antipatri wà mó jé shoq Poluq lé dé kat bekô nghut ri. ³² Htang nyí, myang ji bang lé ê châng dé nhâng kômù, yhangmoq gi, gyewap shut dum taû lò bekô nghut ri. ³³ Myang ji é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byî akô nghut ri. ³⁴ Haú hkûn, mauzau hpó gi, laiká haû lé ban nghap jáng, Poluq hká mau mâ é byù nghut é hkyô lé myî wú luî, Kiliki mau mâ é

byù nghut é lé sé jáng, ³⁵ "Nang lé mara hùn bang jé jáng sheq, náng mù lé ngò gôn wú râ." ga taì ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hùn Huì É Hkyô

¹ Hau htâng, ngo nyí lai jáng, hkyangjong mó Anani gi, suwún wuî ra-am eq tarâ sé sù Tertulu lé shuí gyó ló mù, mauzau hpô hí má Poluq lé mara lé taì hun bum akô. ² Haú hkûn, Poluq lé hí má ji hâng tô é nghut mù, Tertulu, yhang lé mara hùn dang taì hi é gi, "Aróng wó dik é Hpilik ê, ngamoq gi, nyì-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nàng sê up sê hkanq é jeju lé, byù myû shí wó hkâm zô nyi é yanmai, ³ ngamoq gi, haú lé hkyô hkat hkanqmó eq jowò hkanqmó má jeju bûn é myit eq hkam yu nyi bê nghut lhê. ⁴ Nghut kôlhâng, ngò nang lé lhoq hkyik é dông a dut sháng gaq, taì râ dang ratot zo lé, myit hîng hîng to mù gyo byi laq nghû dúng tôngbán lhê ô!

⁵ Shí yuq gi, byù lé gunjang sù, mingkan gón mâ é Yudaq byu pé lhunglháng lé shuí gabyong sù eq, haú Nazaret hpúng mâ é hkyô-u shê sù nghut é lé, ngamoq myang ri. ⁶ Hau htoq agó, yhang gi, noqkuq yhùm lé achâq achyut kut râ dâ nyi luî, yhang lé ngamoq chyup yû mù, (ngamoq é tarâ dông jéyáng râ hen nyi é hkûn, ⁷ dap up zau Lusi gi, lé lô mù, ngamoq é loq mai yhang lé lé lú shuí yù luî, yhang lé mara hùn bang lé, náng chyáng jé

keq ga hkunmó hkyô tô é nghut lhê.) ⁸ Haû mù, nàng, yhang lé myî wú jáng, ngamoq yhang lé hun é mara banshoq têng é hkyô lé, nàng wó sé rà nghut lhê." gâ ri.

⁹ Yudaq byu pé le, haú pé gi, têng lhê ga bo chô m taî akô nghut ri.

Poluq, Mara A Bò É Lé Taî Hung É Hkyô

¹⁰ Mingzau hpó gi, Poluq lé dang taí rà đông loq lik kat jáng, Poluq taî é gi, "Zau ê, shí mau bâng é ahtoq má, nàng zanwut myo myo jéyáng byî nyi é hkyô lé, ngò sê é yanmai, ngò gabú myit èq yhumsing matú, mara a bo é hkyô taí bá. ¹¹ Ngò, Yerusalem wà mó má noqkuq rà matú doq e é buinyî raxe í nyî lhang a chyân shi é gi, nàng lui za wó sé rà nghut lhê. ¹² Noqkuq yhûm má ngò ó yuq eq taî htîng lhûm é lé lhang, tarajong, a nghut jáng, wà hkaû hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuî, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri. ¹⁴ Nghut kôlhang, náng hí má ngò yín yû rà hkyô rahkat gi, yhangmoq èq shut shaî hkyô ga myhîng tô é Hkyô lé cháng lui, ngamoq é îchyí îwâ pê é Garai Gasang lé noqkuq nyi lhê. Jep é tarâ eq myiqhtoi laiká pé má kê tô é lhunglhang lé le lumjîng lhê. ¹⁵ Ngò gi, dingmán é bang eq a dingmán bâng é dum dui toq lô rà hkyô joq é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haû mù lui, Garai Gasang eq byu é hí má, ngò gi, rà é hkyô a bo é za, myit é hkyô san za wó dut nyi shoq, shikut nyi lhê.

17 Zanwut tsómra laî é htâng má, ngò gi, ngá é byù myû mâ é myùng bang lé chyunghuq byi râ eq alu kat râ matú, Yerusalem wà mó shut ló jé bê nghut lhê. 18 Haû su kut nyi é hkûn, ngò eq rahá hai byù moq mó le a nyì, hai jung gabyông é hkyô le a htoq, ngò noqkuq yhûm má lhoq san lhoq yúng yû bê hkyô lé za, yhangmoq myang akô. 19 Nghut kôlhang, Asia mau mâ é Yudaq byù ra-am gi, haú má nyi tô é nghut lhê; yhangmoq mai ngo lé mara hûn râ hkyô joq kô é nghut le gi, shî náng é hí má yhangmoq lé jé kó ra nghut lhê. 20-21 Haû a nghut jáng, shî má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq râ hkyo é yanmai, hkû-nyí nungmoq ngo lé jéyáng nyi akô.' nghû luî, garû é dang hkûn mai lai luî, ngò má gotû mara myàng shi kô é nghut le gi, yhangmoq yhang taî kyo kó sháng gaq." gâ ri.

22 Hpilik gi, Hkyô haû lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi râ nghut lhê." ga luî, yhangmoq lé ahkýing htot kat byi ri. 23 Poluq lé le, zúng za zúng to mù, yhâng é buinùm ji-myi wuì mai yhang ra châ é hkyô lajang byi naû kô é bang nyi le gi, ahkáng byi keq ga luî, shô up gyezau lé hkunmó hkyô kat ri.

24 Buinyì rayoq zo laî é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luî, yhang, Hkrisduq Yesuq lé lumjíng hkyô taî kyô é le gyô yu ri. 25 Poluq gi, dínghán hkyô, yhumsing gùng lé hkang é hkyô eq, jé lô râ tarâ dara hkyô lé mhòqshit jáng, Hpilik gi, gyô gyuq mù, "Nàng ahkuî wó ló bê, ngò jìn

jáng sheq nang lé dum ji yù râ nghut lhê." ga tâi ri.
²⁶ Hpilik kúm gi, Poluq èq ngùn haq byi râ lé myit myoqbyù mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaî kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhûng pyâm to bê nghut ri.

25

Poluq, Kehtaq Chyang Jé Râ Matú Dûng È Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. ² Haú hkún, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyâm râ dâ to kômù luí, jeju ralhum kut byî é dông Poluq lé Yerusalem wà mó shut dé kat byi râ matú, Hpestu lé lhom dûng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhûng tô lhê, hkâ-myháng a myáng má, ngò yhang le haú má dum taû ló râ nghut lhê. ⁵ Haú mù, nungmoq mâ é hkyô-u shê bang ra-am, ngò eq rahá gyó ló mù, haú yuq kut shut é hkyô bo é nghut jáng gi, yhang lé mara lé hûn kó sháng gaq." ga tû tâi ri.

⁶ Hau htâng, yhang gi, shit nyi, raxê nyí kô yhangmoq chyang nyi yù luí, Kesare wà mó má taû ló mù, htang nyí gi, tarâ tanghkuq má zùng luí, Poluq lé yhâng hí má shuí wang lò râ matú hkunmó hkyô kat ri. ⁷ Poluq jé jáng, Yerusalem

wà mó mai gyó lo é Yudaq byu pé gi, yhâng é lhinhkyyuq má yap to kôluî, saksé a wó tân shít é mara mó myo myo lé, yhâng é ahtoq má chôm taî hun akô nghut ri.

⁸ Haú hkûn, Poluq gi, "Yudaq byu pé é jep é tarâ eq shai é dông le, noqkuq yhûm lé shut é dông le, Kehta^q* lé shut é dông le, ngò a kut wú." ga luî, mara a bo é hkyô taî ri.

⁹ Nghut kôlhang, Hpestu gi, Yudaq byu pé é hí má myoqdong wó naû mù, Poluq lé, "Nàng, Yerusalem và mó má doq ló luî, shí hkyô pé lé ngò haú má doqdan byi râ matú, nàng dóng lhê lú?" ga myî ri.

¹⁰ Poluq kúm gi, "Ngò gi, doqdan hui râ nghut jáng, shí doqdan é jowò, Kehta^q é tarâ hpyit wap má ahkuî yap to bê nghut lhê. Nàng sê é eq rajung za, ngò gi, Yudaq byu pé lé haî lhang a shut wú sủ nghut lhê. ¹¹ Laqmá mù, shí gíng é mara lé, ngò kut shut pyâm é nghut le gi, shí hkám râ hkyô lé ngò a he pyâm; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi râ ahkáng wó râ a nghut, ngò gi, Kehta^q chyáng wang taî râ nghut lhê." ga tû taî ri.

¹² Haú hkûn, Hpestu gi, yhâng é byìn tú wap bang eq ban hpyê lhum jáng, "Nàng Kehta^q chyáng wang taî râ ga bê nghut lhê, Kehta^q chyáng wang ló aq hko!" ga taî kat ri.

Poluq Lé, Hkohlkâm Agripa Hí Má Shuí Hâng Yu É Hkyô

* **25:8** Kehta^q gâ é gi, "hkoséng" gâ é nghut lhê.

13 Hau htâng, buinyi hkâ-myháng a myáng má, Hkohlâm Agripa eq yhanggu myiwe zo Bernike gi, Kesare và mó má jé lé mù, Hpestu lé lé huí nyo akô nghut ri. 14 Haû mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haû Poluq é hkyô lé hkohlâm wa eq taí kyô lhùm é gi, "Hpilik, lhùng to lánng é htóng byû rayuq nyi ri. 15 Ngò Yerusalem và mó má nyi tô é hkûn, hkyangjong agyi pé eq Yudaq byu pé é suwún wuí gi, haú yuq é hkyô lé taí kyo kôluí, haú yuq lé mara byi râ matú ngo lé chôm dúng akô.

16 Haú hkûn, ngò gi, mara hun é hui sù, mara hun é bang eq chyung chyong yoq kut luí, yhangmoq hun é mara lé yhumsing matú mara a bo é hkyô a wó taí shi lé, ó yuq lé ap byi pyám râ le, Romaq htúng a joq nghû luí yhangmoq lé taí kyo bê nghut lhê. 17 Yhangmoq ngá htâng châng gyó lô kô é hkûn, ngò gi, a nô yu é za, htang nyí jâng tarâ tanghkuq má zúng luí, haú yuq lé shuí wang lò râ matú hkunmó hkyô kat é. 18 Haú hkûn, haú yuq lé yhangmoq mara chôm hun bùm kôle, ngò myit ngàm tô é su mara ralhum le a hun htoq lô kó nghut ri. 19 Yhangmoq é noqkuq htúng hkyô eq, haú dui nyi ri ga Poluq eq taí é, shi byuq bê Yesuq é hkyô lé za dang jet jet lhùm bum akô. 20 Haû mù, ngò gi, haú hkyô lé hká dông gon yù râ le a sé lô é yanmai, haú hkyô lé Yerusalem và mó má doqdân é ló hkam yù râ matú, yhang dóng a dóng é hkyô lé myí wú le, 21 Poluq yhang sheq, Hkoséng mó chyáng jé râ ga taí é yanmai, Kehtaq chyáng a dé kat shi é u lé, yhang lé zúng nyí shirâ matú, ngò hkunmó hkyô kat é nghut lhê." gâ ri.

²² Haú hkûn, Agripa gi, "Ngò le haú yuq é dang gyô wú nau ri." ga, Hpestu lé taí jáng, yhang gi, "Napmá, nàng wó myang gyo râ nghut lhê." ga tú taí ri.

²³ Htâng nyí, Agripa eq Bernike nhiktâng gi, shing kang bò bò za lé lô mù, dap up zau wuî eq wà mà é agyì suwún wuî eq rahá, rûng gok mó má wang zung tô bùm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu taí é gi, "Hkohkâm Agripa eq ahkuí shí má zup zîng tô é lhunglhâng bang ê, Yerusalem wà mó eq shí wà mà é Yudaq byu pé banshoq bang, ngá chyáng lé taí kôluí, shí yuq lé asak a wó duì nhang to lo ga garû bùm é gi, ahkuí nungmoq myang é shí yuq yhang nghut bê. ²⁵ Nghut kôlhâng, shí yuq zui saí é má shí gíng é mara haí lé lháng ngò a myàng nghut ri. Yhang gi, Hkosêng chyáng wâng râ ga taí é yanmai, yhang lé Romaq myuq shut dé kat râ matú ngò myit hpyit to bê. ²⁶ Dé kat bá nghû jáng le, ngá é yhumsîng Hkosêng chyáng yhang é hkyô jihkúm nuqguq kê hun kat râ haí le a bò nghut ri. Haú mù luí, yhang lé ban myí gôn wú jáng sheq, ká râ hkyô rajung jung hkâlhang ngò myàng abe nghû, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byû rayuq yuq lé dé kat é hkûn, yhang lé hun é mara a wó tún shit lé gi, a htuk nghû luí, ngò myit lhê." gâ ri.

26

Poluq É Hí Hpyang Lhê É Nyì Yap Hkyô

¹ Haú hkûn, Agripa gi, Poluq lé, "Nàng, náng matú dang tai râ ahkáng wó bê." ga taí ri.

Haú mù luí, Poluq loq tú kat mù mara a bo é hkyô taí é gi, ²⁻³ "Hkohkâm Agripa ê, nàng gi, Yudaq byu pé é htunghking banshoq eq taí htíng lhúm é hkyô hkat hkangmó lé, gyaí sê to sù nghut é yanmai, Yudaq byu pé ngo lé hun é mara hkat hkangmó lé, ngò hkû-nyí náng é hí má mara a bò é hkyô myang taí é gi, ngá matú gabú hpo yhang nghut ri nghû myit yu nyi lhê; haú mù luí, ngá dang lé myit hing é eq gyô yù byi laq nghû, dúng tôngbán kat lhê.

⁴ Ngò gi, zoshâng hkûn mai, ngá amyû má le, Yerusalem wà mó má le, hkâsu kut nyi kô lo é hkyô lé, Yudaq byu pé lhunglhâng bang gi, sé gû nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung mâ é tarâ htan dik é hpúng má bo é Hparishe rayuq nghut é hkyô lé, saksé hkám naú kô é nghut jáng, yhangmoq wó hkâm lhê. ⁶ Nghut kôlhâng, doqdân é hui zo râ matú, ahkuí ngò shî má yap tô é gi, Garai Gasang eq ngamoq é íchýí îwa pé lé byí tô é danggidiq lé myit myoqbyù nyi é yanmai nghut lhê. ⁷ Ngamoq é byù myû raxe í hú gi, danggidiq jeju haú lé wó hkam yù shoq ga, Garai Gasang lé nyí myín noqkuq dojaú shikut nyi bum akô; Hkohkâm wa ê, myit myoqbyù hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shî bê bang lé dum lhoq tui lhê gâ é hkyô lé, a wó lúm nghû, haí mù myit yu akô lhú?

⁹ Ngò le, Nazaret wà byù Yesuq é myìng eq shai lhúm é dông myo myo wó kut râ nghut lhê nghû,

gè gè yhang myit yu wú bê nghut lhê. ¹⁰ Gè gè haú đông le Yerusalem wà mó má kut wú bê nghut lhê; hkyangjong agyi pê chyáng má é ahkáng wó yú luí, ngò gi, sân-yúng bang myo myo lé htóng má kat pyâm é eq, yhangmoq sat hui kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lhing lhing yhangmoq lé dam byi luí, Yesuq lé rhoí dang táí kó shoq shikut wú bê nghut lhê; nhik mó góng yo luí, gó mau má é wà pé lhang jé shoq, yhangmoq lé châng zing-rî wú bê nghut lhê.

Poluq Hpúng Byú Dut Lo É Hkyô

¹² Haú hkûn, radàm lé, ngò gi, hkyangjong agyi pê chyáng mai ahko ahkáng eq hkunmó lé yu chûng mù, Damaskuq myuq shut e ló nyi le, ¹³ Hkohkâm wa ê, nyigûng tu ló zó lé, bui htoq má je duq é maubó gi, haú hkyô má, ngò eq ngá é luzúm wui é lhinghkyuq má, mauhkûng mai duq bó htoq lo é lé myang ri. ¹⁴ Haú hkûn, ngamoq banshoq bang myigûng má lêng gop tô bum le, Hebre myíng đông, 'Sholuq, Sholuq, nàng, ngo lé haí mù zing-rî nyi lhê lú? Zuchûn lé pik le gi, náng é matú gyai yhang wui lhê.' ga luí, ngo lé taí é danghtê lé ngò wó gyô kat ri.

¹⁵ Haú mù, ngò gi, 'Yhumsíng ê, nàng gi, ó yuq nghut lhê lú?' nghu luí, myi jáng, haú Yhumsíng tû taí é gi, 'Nàng zing-rî nyi é Yesuq nghut lhê. ¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tûn shit shirâ nghut é hkyô pê é matú, ngá é mù wùn râ byù eq saksé dut nhâng râ đông nang lé hkyin to râ nghu, ngò náng chyáng lé htoq shit é nghut lhê. ¹⁷ Náng é amyû pê é loq mai le, tûngbàu pê é

loq mai le, ngò, nang lé hkyi yù nyi râ nghut lhê.
¹⁸ Yhangmoq, yubak hkyut pyám byi é jeju wó yù râ eq, ngo lé lumjínq é yanmai, lhoq sân-yúng huí é bang eq rahá silí wunlí wó hkam yù kó sháng gaq nghû, yhangmoq é myoq lhoq hpóng byi mù, mauchut hkaû mai maubó shut, Tsadán é a-tsam hkaû mai Garai Gasâng shut yhangmoq lhing ló râ matú, ngò, nàng lé yhangmoq chyáng nhang kat râ nghut lhê.' gâ ri.

Poluq Kut É Muzó Hkyô

¹⁹ Haû mù luí, hkohkâm Agripa ê, ngò gi, mauhkûng mâ é myoqwup shing-rán haû lé a gyô é a wó é nyi nghut lhê. ²⁰ Ngò gi, yhangmoq myit lhing luí, Garai Gasang shut lhing taû lò mù, myit lhing bê hkyô lé, hkyí zó loq zó đông mai tân shít kó sháng gaq nghû, sânq-hi má Damaskuq myuq má nyi é bâng chyáng mai hî luí, Yerusalem wà mó mâ é bâng chyáng má le, Yuda mau gón mâ é bâng chyáng má le, tûngbaù pé chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhûm má chyup yù luí, sat pyám râ da kô é nghut lhê. ²² Nghut kôlhang, ngò gi, hkû-nyí jé shoq Garai Gasâng eq garúm é lé wó yù luí, ahkuí shî má yap to mù, tiq ko banshoq bang lé saksé wó hkâm kyô é nghut lhê. ²³ Ngò taí é má, Hkrisduq gi, hpuzo luí, shî bê bang mai sânq-hi dui toq lô mù, Yhâng é amyû eq tûngbaù amyû pé lé maubó é hkyô lé wó taí kyo râ nghut lhê ga luí, dut lò râ hkyô lé, myiqhtoí pé eq Mosheq taí tô é hkyô mai lai luí, ngò gotú haí le a taí é nghut lhê." gâ ri.

²⁴ Yhang haû su ga mara a bo é hkyô taí é lé, Hpestu gi, "Poluq ê, nàng na bê! Lûm mhoq myô yu

é yanmai na bê nghut ri." ga luî, htê mó eq dang lat taî hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taî é dang gi, tengmán é dang eq dang gyíng nghut lhê. ²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taî é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haî le a joq ra nghut lhê nghû, ngò myit lum nyi lhê. ²⁷ Hkohkâm Agripa ê, nàng gi, myiqhtoî pê é dang lé lumjíng lhê lhú? Nàng lumjíng é hkyô lé ngò sê lhê." ga tû taî ri.

²⁸ Haú hkûn, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhò ngam ri lhú?" ga taî ri.

²⁹ Dum Poluq gi, "Razup za má nghut nghut, myáng myáng má nghut nghut, shî shamtoq-tui pé mai lai luí, nàng za a nghut, hkû-nyí ngò taî é dang lé gyô nyi é lhunglhâng bang, ngò su dut râ matú, ngò gi, Garai Gasang lé kyûdûng nyi lhê." ga tû taî ri.

³⁰ Haú hkûn, hkohkâm wa gi, ginwáng zau hpó eq Bernike le mù, haú má zùng tô é bang eq rahá toq yap ri. ³¹ Yhangmoq htoq ló kô é hkûn, "Shí yuq gi, sat gíng é mara eq htóng lhúng gíng é mara haî le a kut shut nghut ri." ga, rayuq eq rayuq taî lhum bum akô nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé râ ga a taî tô é nghut le gi, yhang lé wó nhang pyám berâ nghut lhê." ga taî ri.

27

Poluq, Romaq Myuq Shut Wuì-sanghpo Mai E Ló É Hkyô

¹ Ahkuî, ngamoq lé Itali ming shut wuì-sanghpo mai gû dap ló nhâng râ matú myit hpyit to kôluî, yhangmoq gi, Poluq eq htongbyû góbang ra-am lé, Augustuq Hkosêng é gyewap mó mâ é, Yuliu gâ é shô up gyezaû é loq má ap byî kat akô. ² Haú hkûn, Asia mau mâ é wuimau gin-gau cháng luî wà pé má wang jón ló é, Adramuti myuq mai toq é wuì-sanghpo má ngamoq wang ji bê nghut lhê. Htesaloni wà mó mâ é Aristakuq gâ é Makedoni byù rayuq le ngamoq eq rahá nghut lhê.

³ Htang nyî, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng râ é hkyô lé yhâng é buinùm wuì mai lhom lajang byi kó sháng gaq ga, yhangmoq eq ê hui râ matú ahkáng byî kat ri. ⁴ Haú mai dum toq ló é hkûn, lai tau mut é yanmai, Kupru zinlóng lé lai hkaú uchyang jî lai ló mù, ⁵ Kiliki eq Pamhpuli mau mâ é wuimau dông lai byit ló le, Laiki mau mâ é Mura myuq má jé bê nghut lhê. ⁶ Haú má, shô up gyezau hpó gi, Itali ming shut dap e ló é, Alesandru myuq mâ é wuì-sanghpo lé myang hkyup luî, ngamoq lé haú má ji nhâng bê nghut ri. ⁷ Haú mai buinyì myo myo yhó yhó lé za jî e ló luî, awui ahke yhang Kidu wà mó eq ang má wó jé ló jáng, lai tau mut é yanmai, hí shut a wó lai ló lo mù, ngamoq gi, lai lé cháng luî, Kreti zinlóng lé lai hkaú mù, Salamone kongzô é tû tap âng é mai lai ló é nghut lhê. ⁸ Haú mâ é wuiyàm mai awui ahke

ji ló lé, Lasea wà eq a wê lhùm é Yuqyo é Guhkan gâ é jowò má jé ri.

⁹ Ahkuî, buinyì tsómra lhoq lhai pyám luî, haú Zoshuq gám poî lai bê nghut é yanmai, wui-sanghpo mai sô wún le gi, gyuq chiq râ nám jé bê nghut ri. Haú mù, yhangmoq lé Poluq taî pun taî kyîng é gi, ¹⁰ "Àhkaû pé ê, shí dàm lhê é wui hkyô gi, wuîhke mó hui luî, wui-sanghpo eq zè pé sùm pyám râ htoq agó, nga-nhông é asak lhang sum râ dut é hkyô lé, ngò byu myang ri." gâ ri. ¹¹ Nghut kôlhang, shô up gyezau hpó gi, Poluq é dang lé gyo râ malaî, wui-sanghpo hkâng sù eq wui-sanghpo yhumsing é dang lé, je lum ri. ¹² Guhkan haú gi, gyoqmyò* wó lhoq lhai râ su a dut é yanmai, myo hpyang gi, Hponik guhkan má wó jé le jé mù, haú má gyoqmyò ló nyi lhai râ matú chôm myit huî akô. Guhkan haú gi, Kreti zinlóng má maupyî buiwàng hkyam eq mautsung buiwàng hkyam shut hu tô é jowò nghut ri.

Wuimau Má, Laidun Mó Htông Huî É Hkyô

¹³ Maupyî shut mâ é lai yhó le hik lô jáng, yhangmoq myit tô é má hkyak nghut bê su ngam pyám kôluî, shamtoq goknghe lé lhoq toq yû kômù, Kreti zinlóng yâm dông jî e ló bê nghut lhê. ¹⁴ Nghut kôlhang, hkâ-myháng a myáng má, Buihtoq mautsung lai gâ é laidun mó gi, haú zinlóng mai mut lò luî, ¹⁵ wui-sanghpo lé lo mut htông é yanmai, hí shut a wó ló lo jáng, ngamoq gi, lai mut ló é shut châng yông ló bê nghut lhê. ¹⁶ Ngamoq gi, Koda

* **27:12** Gyoqmyò lé, haú mau má laidun mó lò lò dut mù, yông wún le gyuq chiq nám nghut lhê.

gâ é zínlóng zo lé lai hkaû uchyang yông ló nyi é hkûn, haû sakhkyîlhaî lé gyai shikut é èq wó láng yù luî, ¹⁷ wui-sanghpo ahtoq má láng toq to bê. Wui-sanghpo lé gi, a byoq lo shoq tuî èq tuî kîng to bê nghut lhê. Dum, yhangmoq gi, Surti gâ é semuî bùm má ló kê gyâm to râ lé chiq kô é yanmai, wui-sanghpo mâ é panlong pé lé lhoq nyhum hkyô yù mù, châng yông ló bekô nghut ri. ¹⁸ Laidun mó lúm htan é yanmai, htang nyí yhangmoq gi, hpugá zê pé lé hkyom dú hkyó pyám bekô nghut ri. ¹⁹ Sum nyí ngu é nyí má, yhangmoq gi, wui-sanghpo zè pé lé yhumsing é loq èq yhang hkyô pyám bekô. ²⁰ Buinyî myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut râ nghû myit myoqbyu tô é hkyô lé, ngamoq tô pyám bê nghut lhê.

²¹ Yhangmoq zoshuq a zô é, buinyî tsómra myáng lô bê nghut mù luî, Poluq gi, yhangmoq é gung gûng má yap to mù, "Âhkaú pé ê, nungmoq ngá é dang gyo luî, Kreti zínlóng mai a htoq ló é nghut le gi, shî su htên byoq é marop hui zo râ a nghut. ²² Ahkuî nghut kôlhang, ngò taî é dang lé gyô yù mù myit wum yù keq; nungmoq mâ é hká yuq lé asak sum râ a nghut, wui-sanghpo za sheq htên byoq byuq râ nghut lhê. ²³ Hkâsu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé taî é gi, ²⁴ 'Poluq ê, hkâgyuq, Kehtaq é hí má nàng wó yap râ nghut lhê. Wui-sanghpo shî má nàng eq rahá ji tô é lhunglhâng bâng é asak lé, Garai Gasang gi, náng é yanmai, láí láí byi râ nghut lhê.' gâ ri. ²⁵ Hau é yanmai, âhkaú pé ê, myit wum yù keq, ngo

lé taí kyô é eq rajung za dut lò râ nghut lhê nghû luí, Garai Gasang lé ngò lumjínng nyi lhê. ²⁶ Nghut kôlhang, nga-nhúng gi, zinlóng ralhum lhum má ló htùng chyap to râ nghut lhê." ga luí, yhangmoq lé i-myit taí títg ri.

²⁷ Buinyì raxe myi nyí myín má, gunggàm yoq lé, ngamoq gi, Adria wuimau má yông lhing wún é hkûn, sanghpo hkâng bang gi, dùng yàm eq chyâng lo nyi é su gâ é lé sê gyo kat akô. ²⁸ Haû su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri. ²⁹ Haû mù luí, luqmó má ló záng htung râ lé chiq kômù, yhangmoq gi, wui-sanghpo htâng shut mâ é shamtoq goknghe myí lhum lé lhoq hkyô kat luí, mau hân bó sháng gaq ga kyûdùng nyi bum akô nghut ri. ³⁰ Wui-sanghpo hkâng bang gi, wui-sanghpo lé tô pyâm to luí hpâng râ dâ é myit eq, wui sanghpo-u shut mâ é shamtoq goknghe pé lé lhoq hkyó râ su kut mhaú luí, sakhkyílhaí lé wui má lhoq hkyô nyi bum akô. ³¹ Haû mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut râ a nghut." ga taí ri. ³² Haú hkûn, gyezô pé gi, sakhkyílhaí lé tuí tô é tui lé zân hpyit kat kôluí, sakhkyílhaí gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq haí le a zô é, hkû-nyí raxe myi nyí myáng lô bê. ³⁴ Haû mù luí, zoshuq rajung jung zo keq! Haû gi, nungmoq wó lut râ matú nghut lhê. Nungmoq chyâng mâ é ó yuq é xâm rahkat lháng byuq râ a nghut." gâ ri. ³⁵ Haû su

ga ban taí é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkyá-on mù, muk lé hpé luí, zô hí bê nghut ri. ³⁶ Haú hkûn sheq, banshoq bang gi, myit wum wó yû kômù, zoshuq zô bùm bekô nghut ri. ³⁷ Wuì-sanghpo haú mâ é byù lhunglhang gi, í sho nyhit xe hkyuq yuq nghut lhê. ³⁸ Yuq hkangmó bàn zô gyí é htâng má, wuì-sanghpo sóm râ matú, sungso pé lé wuì má dú kat pyâm akô nghut ri.

Wuì-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowò haú lé a sé kôlhang, semuî-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyan râ matú chôm doqdân yu akô nghut ri. ⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yû luí, wuì-sanghpo ulhum mâ é panlong lé lhoq toq yû mù, lai hkyô cháng luí wuiyàm shut mut ló bê nghut ri. ⁴¹ Nghut kôlhang, semuî lo bum tô é jowò ralhum má, wuì-sanghpo ló htûng chyap byuq luí, sanghpo u gi, a wó duí lo mù, sanghpo htâng lé gi, wuìheng èq lò bat hkyop myha pyám bê nghut ri.

⁴² Haú hkûn, gyezô pé gi, htongbyû pé wuili lí hpanq byuq kó râ lé gyuq kô é yanmai, yhangmoq lé sat pyám râ chôm dâ akô. ⁴³ Nghut kôlhang, shô up gyezau hpó gi, Poluq lé hkyi yù naù luí, yhangmoq dâ é hkyô lé hkûm pyám mù, wuili dat li bang gi, wuì má byam gyó luí wuiyàm shut hí li dap ló kó sháng ga luí le, ⁴⁴ góbang gi, siklong eq wuì-sanghpo mâ é gotû zè pé má zui mù, gu dap ló sháng ga le, hkunmó hkyô kat ri. Haú dông mai

lhunglhang bang gi, wuiyàm shut rago wó jé dap
ló bekô nghut ri.

28

Malata Zinlóng Má Jé Nyi Tô É U Lhê Hkyô

¹ Ngamoq wó lut dap ló jáng sheq, zinlóng haû gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tân shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô. ³ Haú hkûn, Poluq gi, htang rawaq guq tsîng yù mù, myihkyóm má kat kat é hkûn, myi soq htan lò jáng, duq htân lhangmuì radu gi, htoq ló mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmuì haû htê lhâng tô é lé myàng kôjáng, "Shí yuq gi, gè gè yhang byù sat é sù teng rá dut ri; wui mai wó lut ló kôlhang, yhang asak dui nyi rá matú, Tengmán tarâ gi, a dóng lo nhung!" ga luí, rayuq eq rayuq taí lhum bum akô nghut ri. ⁵ Poluq kúm gi, lhangmuì haû lé myihkyóm má ko hkyô kat luí, haí le a dut é za nyi tô ri. ⁶ Yhangmoq gi, yhânggùng wâm lò berâ, haû a nghut jáng, byodàn ratung shí hkyaq lêng ló berâ, ga myit lánng nyi bum akô. Nghut kôlhang, myáng myáng lánng wú nyi bum le, yhang má haí le a dut lo é lé myàng kôjáng, yhangmoq é i-myit dum htaí pyám kôluí, shí yuq gi, hparà rayuq sheq nghut ri ga dum taí bum akô nghut ri.

⁷ Hau é nàm má, zinlóng agyì hpó Popli sing é maumyî pé joq tô ri. Haú yuq gi, ngamoq lé lhom te yù mù, yhâng yhûm má sum nyi yhang lalúm lanye lhom hkûlum yu ri. ⁸ Haú u lé, Popli é yhângwa

gi, alì nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luî, yhang é ahtoq má loq ke byi mù, yhang lé lhoq gê byî ri. ⁹ Haú su dut é yanmai, zinlóng mâ é nò byù góbang banshoq le, lé luî lhoq gê byî é hui bekô nghut ri. ¹⁰ Yhangmoq gi, ngamoq lé a hkyô hkyô đông hkungga kôluî, ngamoq wui-sanghpo ji mù, dum toq ló râ hkûn, ngamoq râ é gû lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq mâ é, "Hparà zozûm nhiktâng" gâ é alhô dap é wui-sanghpo má, ngamoq wang jî htoq ló bê nghut lhê. Wui-sanghpo haú gi, gyoqmyò lé zinlóng haú má joq lai é nghut ri. ¹² Surakusa wà mó má jé jáng, haú má ngamoq sum nyí nô yu é nghut lhê. ¹³ Haú mai jî xoq lhing ló le, ngamoq gi, Regi wà mó má jé ri. Htang nyí gi, maupyí lai hik lô mù luî, í nyí nyí má nghut jáng, Potioli wà mó má jé lô bê nghut lhê. ¹⁴ Haú mâ é gumang wui ra-am eq hui luî, ngamoq lé nyhit nyí no râ matú lùng kômù, ngamoq gi, nô yù bê; hau htâng, Romaq myuq má jé ló bê nghut lhê. ¹⁵ Haú mâ é gumang wui gi, ngamoq jé lo nyi é hkyô lé wó gyo kôjáng, te yù râ ga, Api Gai gâ é wà eq Bíng Yhûm Sûm Lhum gâ é wà jé shoq lé akô. Poluq gi, haú bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wang ló é hkûn, Poluq gi, yhang lé zúng râ gyezo rayuq eq gotû san nyi râ matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyì sum nyí laí é htâng má, Poluq gi, haú mâ é Yudaq suwún wuî lé ji yu ri. Yhangmoq jé lé bûm kôjáng, yhang gi, "Gumang wuî ê, ngò gi, nga-nhûng é amyû lé le, îchyí îwa pê é htunghking lé le, shut shai é dông haí le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pê é loq má ap byî kat é hui bê nghut lhê. ¹⁸ Romaq zau wuî kúm gi, ngo lé ban jep gôn wú jáng, ngá chyáng shî gíng é mara lé a myàng kô é yanmai, ngo lé nhang kat nau akô nghut ri. ¹⁹ Nghut kôlhang, haú lé Yudaq byu pé a dông kô é yanmai, ngò hkâsu a dat kut lo mù, Kehtaq chyáng jé râ matú dúng é nghut lhê. Haú nghut kôle, ngá amyû lé mara hûn râ jowò joq é yanmai gi, a nghut. ²⁰ Haú mù luî, Israelaq amyû é myit myoqbyù hkyô* é yanmai, shî shamtoq-tuî èq tuî é ngò hui zô é hkyô eq séng luî, nungmoq eq nyo kún râ matú, ngò, nungmoq lé ji kat é nghut lhê." ga luî, yhangmoq lé taí ri.

²¹ Haú hkûn, yhangmoq gi, "Náng é hkyô eq séng luî Yuda mau mâ é laiká ngamoq a wó yû nghut ri. Haú mai lé é gumang wuî ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shî nàng lom é hpúng gi, jowò hkanmó má taí he pyâm é huí é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tû taí akô.

* **28:20** Israelaq amyû é myit myoqbyù hkyô gi, Mesaia gâ é hkyi yù sù lé myoqbyù nyi é nghut lhê.

²³ Yhangmoq gi, yhang eq huî kún râ buinyì ding to kôluî, yhang bíng é yhûm má byù myo myo lé zîng bum akô. Haú hkûn, yhang gi, napkyó mai myín htâng jé shoq, Garai Gasâng é mingdán hkyô lé saksé hkâm kyô é eq, Mosheq é tarâ eq myiqhtoî pê é dang má cháng mù, yhangmoq lé shikut luî, Yesuq é hkyô taî pun taî kyîng ri. ²⁴ Yhang taî é hkyô lé, ra-am gi, lumjîng bum akô; ra-am kúm gi, a lumjîng kó nghut ri. ²⁵ Yhangmoq rayuq eq rayuq haú su myit a huî lhûm bùm kô é yanmai, Poluq gi, yhangmoq lé, "Chyoiyúng Woi-nyí, Myiqhtoi Esai-aq é nhut mai nungmoq é îchyí îwâ pé lé taî é dang gi, gyai yhang têng ri. Dang haú gi,

²⁶ 'Byù haú hú chyáng ê mù,

"Nungmoq gyô tsuq to kôlhang, sê gyo kó râ a nghut;

wú tsuq to kôlhang, wú sé kó râ a nghut.", nghû ê taí aq.

²⁷ Hkâsu mù gâ le, amyû shi é i-myt gi, htan byuq luî,

yhangmoq é nohkyap gi, htu byuq bê nghut ri;

yhangmoq é myoq gi, chûm byuq bê nghut ri;

haú a nghut le gi, yhangmoq é myoq èq myàng mù,

yhangmoq é nohkyap èq wó gyo luî,

yhangmoq é i-myt má sê hkyâng kômù,

ngá chyáng lhing lò kôluî, ngò yhangmoq lé lhoq gê byi berá nghut lhê. [✧]

gâ ri.

²⁸ Haú mù luî, shî Garai Gasâng é hkyi yù hkyô lé, tûngbaù pê chyáng byí kat bê nghut luî, yhangmoq lhom gyô yù berá hkyô lé, nungmoq yhang sê nyí

keq ô!" ga luî, danghkun haû taî kat é htâng má, yhangmoq gi, htoq ló byuq bùm bekô nghut ri. ²⁹ (Poluq haû su ga taî é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhûm má í zân tup nyi é u lé, yhâng chyáng lé má lé é bang lé lhom hkûlum yu ri. ³¹ Haû mù, a gyuq a kyum é za, Garai Gasâng é mingdán hkyô lé hko taî kyô é eq, Yhumsîng Yesuq Hkrisduq eq sêng é hkyô lé mhoqshit byî ri; yhang lé, ó le a hkûm zing to kó nghut ri.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee